

ዮሀን ፩ ዓፊዳ ዩሱስ ኪሪስቶስ ዋንጌላ ጋላ ቆፋ

ዮሀን ፩ ዩሱስ፡ «አሴ ገዲዲ አሳ ገደን ቤንተዳ ያሳ ቃላ» ያገዲ ቆንጨሴስ። ሃ ዋንጌላይ ዓፊተዳይ፡ ኢያ ናባቢያ አሳይ ዩሱስ አሳ አሼይሳ ገዲዲ ያና ጌተተዳ ያሳ ናባ ገዳይሳ አማናና ማለኔ ኢያን አማኔይሳታስ ማሪና ዳያይ ዳዔይሳ ኤንተ ኤራና ማላሳ (20:31)።

ዋንጌላስ ኮይሮ ኪፊሌይ ማሪናባ ገዲዳ ያሳ ቃላይኔ ዩሱስ ኢሶ ገዳይሳ ኦዲ ሰሚዲ፡ ዩሱስ አሼይሳ ገዲዲ ያና ገዳ ያሳ ናባ ገዳይሳ ቤሲያ ዲማ ዲማ ማላታታ ቆንጨሴስ። ዓፊይ፡ ዩሱስ ኪሪስቶስ ባ ሁዔን ቱማ ያሳ ናባኔ ያሳ አዋራ ኢሶ ገዳይሳ (1:1) ቦላ ቆንጨሴስ። ዩሱስ ባ ሁዔን ታ አብራሃማፔ ካሴ ዳዓይስ (8:58) ያገሰ። ወርሴላን ቶማሲ፡ «ታ ጎዳው፡ ታ ያሳው» ያገዲ ያገሰ (20:28)። ሃሳፊ ካሊዲ ቃሲ ሃ ማላታታፔ ቤንተዳ አይፊያ ኦዲያ ታሪኬተ ካሎሶና። ሃ ኪፊሌይ ኢሲ ኢሲ አሳይ ዩሱስ አማኒዲ ኢያ ካሌይሳታ ገዲዳይሳ ኦዳስ፤ ቃሲ ሃራቲ ኢያራ ዋኒዲ ኤቁተዳኮኔ ዋኒዲ አማናና ኢዳዳኮ ኦዳሶና። ሼምፖ 13-17 ጋካናው ዩሱስ ኦይኬተዳ ኦማርሲ ኢያው፡ ኢያ ታማሬታራ አይ ማላ ማኖ ጋሃተሊ ዳዓያኮ፡ ቃሲ ዋንጌላ ጋላስ ካቁታናፔ ሲንሌ ገጌተላ ቃላኔ ማንሌላ ቃላ ኤንታው ኦዲዳይሳ ቆንጨሴስ። ወርሴላ ሼምፖቲ ዩሱስ ኦይኬተዳባኔ ፒርዳስ ሺቁዳባ፡ ኢያ ካቁተላኔ ኢያ ዳንዲዋ፡ ሃሳዳካ ዳንዲዋፊ ጉዩ ባ ታማሬታስ ኢ ቆንጨዳ ቆንጨላባ ኦዳሶና።

ዮሀን ዋንጌላ አይፊ ቆፋታ

- ጌሎ ቆፋ 1:1-18
- ዓማቂያ ዮሀንሳኔ ዩሱስ ኮይሮ ታማሬታ 1:19-51
- ዩሱስ ቆንጨን ኦሶ ኦይኮይሳ 2:1-12:50
- ወርሴላ ቃማታ ዩሩሳላሚ ሄራን 13:1-19:42
- ጎዳ ዳንዲዋኔ ቆንጨላ 20:1-31
- ኩሻ ቆፋ፡ ጋላላን ዛሪዲ ባ ታማሬታስ ቆንጨይሳ 21:1-25

ዳያ ቃላ
 1 ቃላይ ኮይሮ ዳዓስ። ቃላይካ ያሳራ ዳዓስ፤ ሄ ቃላይ ያሳ።
 2 ኮይሮፔ ቃላይ ያሳራ ዳዓስ።

3 ያሳይ ኡባባ ቃላ ባጋራ ሜዲሰ። ሜዴቲዳባፔ ኢሶይካ ኢያ ባጋራ ሜዴቶናባይ ባዋ።

4 ኢያን ዴያይ ዴዔሰ፤ ሄ ዴያይ ኣሳሰ ፖ።

5 ፖያይ ዲማን ፖዔሰ፤ ዲማይ ፖዑዋ ያኒቤና።

6 ያሳይ ከቲዳ፣ ኢሲ ዮሃንሳ ጊያ ኣሲ ዴዔሰ።

7 ኣሳ ኡባይ ፖዑዋን ኣማናና ሜላ ኢ ፖዖሰ ማርካ ጊዲዲ ዩሰ።

8 ኢ ፖዑዋባ ማርካታናው ዩሲፔ ኣቲን ባ ሁዔን ፖፖ ጊዴና።

9 ኣሳ ኡባሰ ፖዒሲያ ቱማ ፖያይ ኣላሚያ ዩሰ።

10 ቃላይ ኣላሚን ዴዒሰ። ያሳይ ቃላን ኣላሚያ ሜዲሰ፣ ሺን ኣላሚይ ኢያ ኤሪቤና።

11 ኢ ባይሳታኮ ዩሰ፣ ሺን ኢያይሳቲ ኢያ ኤኪቦኮና።

12 ሺን ኢ ባና ኤኪዲይሳታሲኔ ኢያ ሱንላን ኣማኒዲይሳታሰ ያሳ ናይታ ጊዳና ሜላ ማታ ኢሚሰ።

13 ኤንቲ ያሳፌ ዩሌቲዶሶናፔ ኣቲን ኣሲ ዩሌቲያ ዋጋን ዋይኮ ኣዴ ሸኔን ዋይኮ ኣሳ ኣሞን ዩሌቲቦኮና። ያሳይ ኢ ኤንታ ኣዋ።

14 ቃላይ ኣሴ ጊዲሰ፤ ኣዶ ከሃቴላኔ ቱማ ኩሚዲ ኑ ጊዶን ዴዒሰ። ኢ ኣዋሰ ኢሲ ናባ ጊዲዲ ኤኪዳ ኢያ ቦንቹዋ ኑኒ ቤዒዳ።

15 ዮሃንሲ ኢያባ ማርካቲሰ። ባ ቃላ ዶቁ ኦሲዲ፣ «ታኒ፣ ታፔ ጉዬራ ዩይሲ ታፔ ካሴ ዴዒያ ጊሾ ታፔ ኣዴሰ» ጋዲ ማርካቲዲይሲ ሃይሳ» ያገሰ።

16 ኑኒ ኡባይ ኢያ ኣዶ ከሃቴላ ኩሜላፌ ኣንጆ ቦላ ኣንጆ ኤኪዳ።

17 ያሳይ ሃጊያ ሙሴ ባጋራ ኢሚሰ፣ ሺን ኣዶ ከሃቴላይኔ ቱማቴላይ ዩሱሰ ኪሪሰቶሳ ባጋራ ዩሰ።

18 ያሳ ቤዒዳ ኣሲ ኦኒካ ባዋ፤ ባ ኣዋ ማታን ዴዒያ ኢሲ ናባ ዓላሊ ባው ያሴ ጊዲዲይሲ ኢያ ቆንጨሲሰ።

ዓማቂያ ዮሃንሳ ማርካቲሳ
(ማቶ 3:1-12፤ ማር 1:1-8፤ ሉቃ 3:1-8)

19 ዩሩሳላሚን ዴዒያ ኣይሁዴ ሃላቃቲ፣ ካሂኔታኔ ለዌታ፣ «ኔኒ ኦኔ?» ጊዲ፣ ዮሃንሳ ኦይቻና ሜላ ኢያኮ ከቲን፣ ዮሃንሲ ኤንታው ማርካቲዳ ማርካቲሳይ ሃይሳ።

20 ዮሃንሲ፣ «ታኒ ኪሪሰቶሳ ጊዲኬ» ያገዲ፣ ጌሺዲ ማርካቲሲፔ ኣቲን ካዲቤና።

21 እንተ፣ «ያተን፣ ኔኒ ኦኔ? ኔኒ ኤሊያሴዬ?» ያጊዲ ኦይቺዶሶና።

ዮሀንሳ፣ «አካይ ጊዲኬ» ያጊሰ።

ቃሲ እንተ፣ «ኔኒ ያና ጌቴተዳ ናቢያዬ?» ያጊዲ ኦይቺዶሶና።

ዮሀንሳ፣ «አካይ» ጊዲ ዛሪሰ።

22 ያተን፣ «ኔኒ ኦኔ? ኦኒ ኑና ከተዳይሳታሰ ኦዳና ሜላ ኔኒ ኔና ኦና ጋይ?» ያጊዶሶና።

23 ዮሀንሳ ዛሪዲ፣ «ናቢያ ኢሳያሲ ጊዳይሳዳ፣ ሳዳ ኦጊያ ሱሪሰቲ!»

ጊዲ ባዙ ቢታን ዋሲያ ኡራ ቃላይ ታና» ያጊሰ።

24 ቃሲ ፋሪሳዌቲ ከተዳ አሳቲ

25 ዮሀንሳኮ፣ «ኔኒ ከሪሰቶሳ ዋይኮ ኤሊያሳ ዋይኮ ናቤ ጊዶና ኢጻኮ፣ ያተን አይሰ ፃማቃይ?» ጊዲ ኦይቺዶሶና።

26 ዮሀንሳ ዛሪዲ፣ «ታኒ ሃላን ፃማቃይሰ፣ ሺን ሂንቴ ኤርና አሲ ሂንቴ ጊዶን ኦቁሰ።

27 ኢ ታፔ ጉዬራ ዬሰ። ታኒ ሃሪ አቶሺን ኢያ ጫማ ዋዶሩዋ ቢላናው ቤሲኬ» ያጊሰ።

28 ሄሲ ኡባይ ዮርዳኖሴ ሻፋፔ ሄፊንላን፣ ቢታኒያ ካታማን፣ ዮሀንሳ ፃማቁያ ቤሳን ሃኒሰ።

ፆሳ ዶርሳ

29 ዮሀንሳ ዋንቴላ ጋላሰ ዬሱሲ ባኮ ዪሺን ቤዒዲ፣ «አላሚያ ናጋራ ቁቺያ ፆሳ ዶርሳይ ሃይሳ!

30 ታኒ፣ ሳፔ ጉዬራ ኢሲ አሲ ያና። ኢ ታፔ ካሴ ዳዒያ ጊሾ ታፔ አዲሰ» ጋዳ ኦዲዳይሲ ሃይሳ።

31 ኢ ኦኔኮ ታኒ ኤሪኬ። ሺን ኢሰራዔሌ አሳሰ ኢያ ቆንጨሳናው ሃላን ፃማቃሽ ያሰ» ያጊሰ።

32 ዮሀንሳ ሃይሳዳ ያጊዲ ማርካቲሰ፣ «ጌሻ አያናይ ሳሎፔ ሆሌዳ ዋዲሺኒኔ ኢያራ ዳዒሺን ቤዓሰ።

33 ሄሲ ሃናናፔ ካሴ ታኒ ኢያ ኤሪኬ። ሺን ሃላን ፃማቃናው ታና ከተዳ ፆሳይ፣ ጌሻ አያናይ ዋዲዲ ኢያራ ዳዒሺን ኔኒ ቤዓናይሲኔ ጌሻ አያናን ፃማቃናይሲ ኢያ» ያጊዲ ታው ኦዲሰ።

34 ታኒ ሄሲ ሃኒሺን ቤዓዳ፣ ኢ ፆሳ ናዓ ጊዲዳይሳ ማርካታይሰ» ያጊሰ።

ዬሱሳ ካሊዳ ኮይሮ ታማራታ

35 ቃሲ ዋንቴላ ጋላሰ የሃኒሲ ባ ታማሬታፔ ናምዓታራ ኢሲፊ ኤቂሰ።

36 ዩሱሲ አጲሺን የሃኒሲ ቤዒዲ፣ «ያሳ ዶርሳይ ሃይሲሸ!» ያገሰ።

37 ናምዑ የሃኒሳ ታማሬቲ የሃኒሲ ጌይሳ ሲዒዲ ዩሱሳ ካሊዲሶና።

38 ዩሱሲ ባና ካሌይሳታ ጉዩ ሲሚ ቤዒዲ፣ «አይ ኮዩቲ?» ያገዲ አይቸሰ።

ኤንቲ ዛሪዲ፣ «አስታማሪያው፣ ኔኒ አውን ዳዓይ?» ያገደሶና።

39 ዩሱሲ ኤንታኮ፣ «ሃ ዩዲ ቤዒቲ» ያገሰ። ኤንቲ ቢዲ ኢ ዳዒያሱዋ ቤዒደሶና። ሄ ጋላሰ ሳዓይ ታሙ ሳቲ ሄራ ገዲያ ገሸ ኢያ ማታን ፔዒደሶና።

40 የሃኒሲ ገዲይሳ ሲዒዲ፣ ዩሱሳ ካሊዲ ናምዑ ታማሬታፔ ኢሶይ፣ ሲሞን ጳዒሮሳ አሻ ኢንዲሪያሳ።

41 ኢንዲሪያሲ ኮይሮ ባ አሻ ሲሞናራ ጋሄቲዲ፣ «ኑኒ ኪሪሰቶሳ ዳሚዳ» ያገሰ።

42 ኢንዲሪያሲ ሲሞና ዩሱሳኮ ኤሂሰ።

ዩሱሲ ሲሞና ቤዒዲ፣ «ኔኒ ዮና ናዓ ሲሞና፤ ኔ ሱንላይ ኬፋ * ገዲ ያጌታና» ያገሰ።

ዩሱሲ ፊልጶስ ናቲናዔላ ያገሰ

43 ዋንቴላ ጋላሰ ዩሱሲ ጋሊላ ቢታ ባናው ቆፋ ቃቸሰ። ኢ ፊልጶሳራ ጋሄቲዲ፣ «ታና ካላ!» ያገሰ።

44 ፊልጶሲ፣ ኢንዲሪያሲኔ ጳዒሮሲ ዳዒዳ ቤቲሳይዳ ካታማፔ ዩዳ አሴ።

45 ፊልጶሲ ናቲናዔላራ ጋሄቲዲ፣ «ሙሴይ ሂጌ ማፃፋን፣ ቃሲ ናቤቲካ ኢያባ ፃፊዳ ዮሴፋ ናዓ ናዚሬቲ ዩሱሳ ኑኒ ዳሚዳ» ያገሰ።

46 ናቲናዔሊ ዛሪዲ፣ «ናዚሬቲ ካታማፔ ሎዖባይ ኬያናው ዳንዳዒ?» ያገሰ።

ፊልጶሲ፣ «ያዳ ቤዓ» ያገሰ።

47 ናቲናዔሊ ባኮ ዩይሳ ዩሱሲ ቤዒዲ፣ «ጌይይ ባይና ቱማ ኢሰራዔሌ አሲ ሃይሳ!» ያገሰ።

48 ናቲናዔሊ ዩሱሳኮ፣ «ኔኒ ታና አውን ኤራይ?» ያገሰ።

ዩሱሲ ዛሪዲ፣ «ፊልጶሲ ኔና ያጋናፔ ሲንሌ፣ ኔኒ ባላሴ ሚላ ጋርሳን ዳዒሺን ታኒ ኔና ቤዓሰ» ያገሰ።

* **1:42 ኬፋ**: ጌያ ቃላይ አራማይኬ ዶና ገዲሺን፣ ገሪኬ ዶናን ቢርሸላይ ጳዒሮሳ ዋይኮ ዛላ ጉሱ።

49 ናቲናዔሊ ዛሪዲ፥ «አስታማሪያው፥ ኔኒ ያሳ ናባ! ኔኒ ኢስራዔሌ ካዎ!» ያገሰ።

50 ዩሱሲ ኢያኮ፥ «ታኒ ኔና ባላሴ ሚላ ጋርሳን ቤዓስ ገዳ ገሾ አማናይ? ኔኒ ሃይሳፌ አዲያባ ቤዓና!» ያገሰ።

51 ቃሲ ዩሱሲ፥ «ታኒ ሂንቴው ቱማ ኦዲይሰ፤ ሳሎይ ዶዬቴን፥ ያሳ ኪታንቸቲ አሳ ናባ ቦላ ከዪሺኒኔ ዋዲሺን ሂንቴ ቤዓና» ያገሰ።

2

ዩሱሲ ያጋኖ ቤሳን

1 ሄቸንሉ ጋላስ ጋላላ ቢታን ቃና ካታማን ያጋኖይ ያጋኔቲስ። ዩሱሳ አያ ሄ ያጋኑዋን ዳዓዉሱ።

2 ዩሱሲካ ባ ታማሬታራ ኢሲፌ ሄ ያጋኑዋ ያገቲስ።

3 ዋይኔ ኡሻይ ዉሪን፥ ዩሱሳ አያ ዩሱሳኮ፥ «ኤንታው ዋይኔ ኡሻይ ዉሪስ» ያጋሱ።

4 ዩሱሲ ዛሪዲ፥ «ታ አዬ፥ ኔ ሃይሳን ጌሎፓ? ታ ዋዴይ ቡር ጋኪቤና» ያገሰ።

5 ዩሱሳ አያ ኦሳንቸታኮ፥ «ኢ ሂንቴው ኦዲያባ አይቢባ ገዲኮካ ኦላቲ» ያጋሱ።

6 አይሁዳቲ ባንታ ጌሾ ዋጋስ ጎዔቲያ ኡሱፑን ሹቻ ባላቲ ሄ ቤሳን ዳዖሶና። ኢሲ ኢሲ ባላይ ናምዑ ዋይኮ ሄቸ ፀጋ ኦይኬስ።

7 ዩሱሲ ኦሳንቸታኮ፥ «ባላታን ሃሌ ኩንላቲ» ያገሰ። ኤንቲ ባላታስ ዶና ጋካናው ሃሌ ኩንላዶሶና።

8 ዩሱሲ ኤንታኮ፥ «ሃዒ ዲቂዲ ያጋኑዋ አዋቲላን ፖሊሴይሳስ አሚቲ» ያገሰ። ኤንቲ ኢያው ኤፊዲ አሚዶሶና።

9 ያጋኑዋ አዋቲላን ፖሊሴይሲ ዋይኔ ኡሺ ላሜቲዳ ሃላ ጋንዲ ኤኪዲ አዉፔ ዩዳኮ ኤሪቤና፥ ሺን ሃላ ኩንላዳ ኦሳንቸቲ ኤርሶና። ያጋኑዋ አዋቲላን ፖሊሴይሲ ማቸው ኤኬይሳ ያገዲ፥

10 «ኦኒካ ሎዖ ዋይኔ ኡሻ አሳ ኮይሮቲዲ ኡሾስ። ያቲዲ አሳይ ኡዬ ካሊዳፔ ጉዬ ቂራሪያ አሜስ። ሺን ኔኒ ሎዖ ዋይኔ ኡሻ ሃኖ ጋካናው ዋሳ አጋዳሳ» ያገሰ።

11 ዩሱሲ ሃ ኮይሮ ማላታ ጋላላ ቢታን ቃና ካታማን ኦላስ፤ ሄሳን ባ ገታቲላ ቤሲስ። ኢያ ታማሬቲ ኢያ አማኒዶሶና።

12 ሄሳፌ ጉዬ፥ ዩሱሲ ባ አዬራ፥ ባ አሻታራኔ ባ ታማሬታራ ኢሲፌ ቂፊርናሆሜ ካታማ ቢዲ ጉላ ጋላስ ጋምዒስ።

ዩሱሲ ያሳ ከላፌ ዛልዔይሳታ ከሲስ
(ማቶ 21:12-13፤ ማር 11:15-17፤ ሉቃ 19:45-46)

13 አይሁዳቲ ቦንቺያ ፓሲካ ባሌ ጋላሳይ ማታቲን ዩሱሲ ዩሩሳላሜ ቢስ።

14 ቢዲ ያሳ ከላን ቦራታ፣ ሚዛታ፣ ደርሳታኔ ሆሌታ ባይዜይሳታኔ ባንታ ኦይዲያን ኡቲዲ ሚሼ ላሜይሳታ ዳሚስ።

15 ኢ ፀርቃፌ ዶቂዲ አሳ ኡባ ኤንታ ሜሃታራ ያሳ ከላፌ ጎዲዲ ካሬ ከሲስ። ሚሼ ላሜይሳታ ፃርጴዛታካ አሌ ዩጊዲ ኤንታ ሚሺያ ላሊስ።

16 ሆሌ ባይዜይሳታ፣ «ሃ ሆሌታ ሃይሳፌ ከሲቲ፤ ታ አዋ ከላ ጊያ ኦሎፊቲ» ያጊስ።

17 ኢያ ታማሬቲ ጌሻ ማፃፋን፣ «ታኒ ኔ ከላስ ሚሹቲያ ሚሻይ ታታማዳ ፀጌስ» ጌቲቲዲ ፃፊቲዳይሳ አኬኪደሶና።

18 ሃሳፌ ጉዩ፣ አይሁዳቲ ዛሪዲ፣ «ኔ ሃይሳ ኦላናው ኔው ማቲ ዳዔይሳስ ኑና አይ ማላታ ኦላዳ ቤሳኔ?» ያጊደሶና።

19 ዩሱሲ፣ «ሃ ያሳ ከላ ላሊቲ፤ ታኒ ሃሹ ጋላሳን ዛራዳ ከፃና» ያጊስ።

20 ቃሲካ አይሁዳቲ፣ «ሃ ያሳ ከላ ከፃናው አይታማኔ ኡሱቸን ላይሌ ኤኪስ፣ ሺን ኔኒ ሃሹ ጋላሳን ከፃኔ?» ያጊደሶና።

21 ሺን ዩሱሲ ኦዲያ ያሳ ከላይ ባ አሳቴላባ።

22 ሃሳ ጊሾ፣ ዩሱሲ ሃይቆፔ ዳንዲዳፔ ጉዩ ኢያ ታማሬቲ ኢ ሃሳ ጊዳይሳ አኬኪደሶና። ቃሲ ኤንቲ ጌሻ ማፃፋን ፃፊቲዳይሳኔ ዩሱሲ ኦዲዳይሳ አማኒደሶና።

23 ዩሱሲ ፓሲካ ቦንቺያ ቤሳን ዩሩሳላሜን ዳዒሺን፣ ኢ ኦሊዳ ማላታታ ቤዒዲ ዳሮ አሳይ ኢያ አማኒደሶና።

24 ሺን ዩሱሲ አሳ ኡባ ኤሪያ ጊሾ ኤንታ አማኒቤና።

25 አሳ ዋዛናን ዳዒያባ ኢ ባ ሁዔን ኤሪያ ጊሾ አሳባ ኦኒካ ኢያው ኦዳና ሜላ ኮሺቤና።

3

ዩሱሳኔ ኒቆዲሞሳ

1 ፋሪሳዊታ ያራፔ ጊዲዳ፣ አይሁዳታ ሃላቃይ፣ ኒቆዲሞሳ ጊያ ኢሲ አዳይ ዳዔስ።

2 ኒቆዲሞሲ ቃማ ዩሱሳኮ ዩዲ፣ «አስታማሪያው፣ ኔኒ ያሳይ ከቲዳ አስታማሬ ጊዳይሳ ኑኒ ኤሮስ። አይስ ጊኮ፣ ያሳይ ኢያራ

2:13 ከሳ 12:1-27 2:17 ማዝ 69:9 2:19 ማቶ 26:61፤ 27:40፤ ማር 14:58፤ 15:29

ደና ኢዲኮ ሃ ኔኒ ኦሌያ ማላታ ኦላናው ደንዳዲያ አሲ ባዎ» ያገሰ።

3 ዬሱሲ ዛሪዲ፡ «ታኒ ኔው ቱማ ኦዳይሰ፤ ኦኒካ ዛሪ ዬሌቶና ኢዲኮ ያሳ ካዎቱላ ቤዓናው ደንዳዲና» ያገሰ።

4 ኒቆዲሞሲ፡ «ጨጋ አሲ ዋኒዲ ዛሪ ዬሌታናው ደንዳዲ? ባ አዬ ኡሎ ሲሚ ጌሊዲ ዛሪ ዬሌታናው ደንዳዲ?» ያገሰ።

5 ዬሱሲ ዛሪዲ፡ «ታኒ ኔው ቱማ ኦዳይሰ፤ ኦኒካ ሃላፊኔ ጌሻ አያናፔ ዬሌቶና ኢዲኮ፡ ያሳ ካዎቱላ ጌላናው ደንዳዲና።

6 አሾ ናዓቲላ አጫፔኔ አዩፔ ዬሰ፤ ያሳ ናዓቲላ ጌሻ አያናፔ ኢሜቲሰ።

7 ታኒ፡ «ሂንቴ ዛሪ ዬሌታናው ቤሴሰ) ጋዳ ሂንቴው ኦዲዳ ጊሾ ኔኒ ማላሌቶፋ።

8 ጫርኮይ ባ ኮዩዳ ቤሲ ጫርኮሰ። ኔኒ ኢያ ኮሺንቻ ሰዓሳፔ አቲን ኢ አጫፔ ያኮ ዎይኮ አው ቢያኮ ኤራካ። አያናፔ ዬሌቲዳ ኡባይ ሄሳ ሜላ» ያገሰ።

9 ያቲን ኒቆዲሞሲ፡ «ሄሲ ዋኒዲ ሃናናው ደንዳዲ?» ያገዲ ኦይቺሰ።

10 ዬሱሲ ዛሪዲ፡ «ኔኒ ኢሰራዔላታ አሰታማሬ ጊዳሾ ሃይሳ ኤሪኪ?»

11 ታኒ ኔው ቱማ ኦዳይሰ፤ ኦ ኤሪያባ ኦደሲኔ ቤዒዳባ ማርካቶሰ፡ ሺን ኦ ማርካቲላ ሂንቴ ኤኬኬታ።

12 ታኒ ሂንቴው ሳዓባ ኦዲን ሂንቴ አማኖናባ ጊዲኮ ሳሎባ ኦዲን ዋቲ አማናኔ?»

13 ሳሎፔ ዎዲዳ አሳ ናዓፔ አቲን ሳሎ ኬዩዳይ ኦኒካ ባዎ፤ [ሳሎን ዳዲያ አሳ ናዓይ ታና]» * ያገሰ።

14-15 ሙሴይ ባዞ ቢታን ቢራታ ሾሺ ካቂዳይሳዳ ታና አማኒዳ ኡባይ ሜሪና ዴዑዎ ኤካና ሜላ አሳ ናዓይ ቶቁ ጋናው ቤሴሰ።

16 ያሳ ናዓ አማኒያ ኡባይ ሜሪና ዴዑዎ ላታናፔ አቲን ጳዮና ሜላ ያሳይ ሃ አላሚያ ዳር ዶሲዳ ጊሾ ባ ኢሲ ናዓ ኢሚሰ።

17 ያሳይ ባ ናዓ ሃ አላሚያ ከቲዳይ አላሚያ ፐርዳናው ጊዳናሺን አላሚያ ኢያ ባጋራ አሻናሳ።

18 ናዓ አማኒያ ኦኒካ ፐርዳቲና፡ ሺን ናዓ አማኖና ኦኒካ ኢሲ ያሳ ናዓ አማኒሶና ጊሾ ሃዒ ፐርዳቲሰ።

19 ፐርዳይካ ሃይሳ፡ ፖዖይ አላሚያ ዩሰ፡ ሺን አሳ ኦሶይ ኢታ ጊዲያ ጊሾ አሳይ ፖዑዎፔ አሊዲ ቋማ ዶሴሰ።

* 3:13 ሳሎን ዳዲያ አሳ ናዓይ ታና፡ ኢሲ ኢሲ ቤኒ ማፃፋቲ ጉጃሶና፡ 3:14-15 ታይ 21:9

20 ኢታባ ኦሊያ ኦኒካ ፖፖ ኢጻሰ። ኣይሰ ገኮ፣ ባ ኦሶይ ቆንጮና ማላ ፖዑዋኮ ዬና።

21 ሺን ቱማ ኦሊያ ኦኒካ ያሳይ ከቲዳይሳዳ ኢ ኦሊዳይሳ ፖፖይ ቆንጪሳና ማላ ፖዑዋኮ ዬሰ።

ዬሱሳኔ ፃማቂያ የሃኒሳ

22 ሄሳፌ ጉዬ፣ ዬሱሳኔ ኢያ ታማሬቲ ዪሁዳ ቢታ ቢዶሶና። ዬሱሳኔ ያን ፃማቂሼ ኤንታራ ጉላ ዎዴ ኡቲሰ።

23 ቃሲ የሃኒሲ ሳሌማ ማታን ዴዲያ ሄኖና ገያሶን ገዲያ ሃላ ዴዲያ ገሾ ኣሳ ያን ፃማቂሰ። ኣሳይካ ያ ቢዲ ፃማቂቶሶና።

24 ሄ ዎዴ የሃኒሲ ቡሮ ቃሹቲቤና።

25 ሄሳፌ ጉዬ፣ የሃኒሳ ታማሬቲኔ ኢሲ ኣይሁዴ ኣዴይ ተ ገሾ ዎጋባ ፓላሚዶሶና።

26 ኤንቲ የሃኒሳኮ ቢዲ፣ «ኣስታማሪያው፣ ዮርዳኖሴ ሻፋፔ ሄፊንላን ኔራ ዴዴይሲ፣ ኔኒ ኢያባ ማርካቲዳይሲ፣ ሄኮ ፃማቂሰ። ኣሳይ ኡባይካ ኢያኮ ቦሶና» ያገደሶና።

27 የሃኒሲ ዛሪዲ፣ «ያሳይ ኢሞና ኣሲ ኣይቢባካ ኤካናው ዳንዳዔና።

28 ሓኒ ከሪሰቶሳ ገዲኬ፣ ሺን ኢያፔ ሲንሌ ከቲታሰ) ገዳይሳሰ ሂንቲ፣ ሂንቲ ሁዔን ታው ማርካ።

29 ጌሎሰ ገገዳሪ ኤኬናው ገገዳይሳሳ። ኤኬይሳ ላጌይ ኢያ ማታን ኤቂዲ ኢ ጌይሳ ሲዲያ ዎዴ ዳሮ ኡፋይቲሰ። ሄሳ ገሾ፣ ሃይሲ ታ ኡፋይሳይ ፖሊቲሰ።

30 ኢ ገታታናው ታኒ ጉፃናው ቤሴሰ» ያገሰ።

31 ቦላፌ ዬይሲ ኡባፌ ቦላ። ሳዓፔ ቤንቲዳይሲ ሳዓባ። ኢ ሳዓባ ኡዴሰ። ሳሎፔ ዬይሲ ኡባፌ ቦላ።

32 ኢ ባ ቤዲዳባኔ ሲዲዳባ ማርካቲሰ፣ ሺን ኢያ ማርካቲሳ ኤኬይ ባዎ።

33 ኢያ ማርካቲሳ ኤኪያ ኦኒካ ያሳይ ቱማ ገዴይሳ ቆንጪሴሰ።

34 ያሳይ ባ ጌሻ ኣያና ኢያው ኩሜላ ኢሚያ ገሾ ያሳይ ከቲዳይሲ ያሳ ቃላ ኡዴሰ።

35 ኣዎይ ባ ናዓ ዶሲዲ ኡባባ ኢያ ኩሼን ዎላሰ።

36 ናዓ ኣማኒያ ኡራሰ ሚሪና ዴይይ ዴዔሰ። ሺን ናዓ ኣማኖናይሳ ቦላ ያሳ ሃንቆይ ዴዔሲፔ ኣቲን ኢ ዴይ ዴሜና።

3:24 ማቶ 14:3፤ ማር 6:17፤ ሉቃ 3:19-20 † 3:25 ኢሲ ኣይሁዴ ኣዴይ፡ ኢሲ ኢሲ ማፃፋቲ «ጉላ ኣይሁዴ ኣሳቲ» ያጎሶና። 3:28 የሃ 1:20 3:35 ማቶ 11:27፤ ሉቃ 10:22

4

ዩሱሳኔ ሳማሬ ማጫሲው

1 ዩሱሱ የሃሊሳይሳፌ ዳሪያ ካሌይሳታ ባኮ ሺሼይሳኔ ፃማቄይሳ ፋሪሳዌቲ ሲዲደሶና።

2 ጊዲኮካ ዩሱሳ ታማሬቲ ፃማቄደሶናፕ ኣቲን ዩሱሱ ኦናካ ፃማቄቤና።

3 ዩሱሱ ኣሳይ ኢያባ ጌይሳ ሲዲዳ ዎዴ ዪሁዳፕ ዴንዲዲ ጋሊላ ቢስ።

4 ጋሊላ ቢሽ ሳማሬራ ኣቆናይሲ ኢያው ኣቶናባ ጊዲስ።

5 ሄሳ ጊሾ፣ ያይቆቢ ባ ናዓ ዮሴፋስ ኢሚዳ ጋዲያ ማታን ዴዒያ ሰካሬ ጊያ ሳማሬ ካታማ ቢስ።

6 ሄ ቤሳን ያይቆባ ሃላ ኦላይ ዴዒስ። ዩሱሱ ሃሙላን ዳቡሪዲ ሄ ሃላ ኦላ ማታን ኡቲስ። ሄ ዎዴ ሳዓይ ኡሱፑን ሳቲ ሄራ።

7 ኢሲ ሳማሬ ካታማ ማጫስ ሄ ኦላፌ ሃሌ ቲካናው ያሱ። ዩሱሱ ሄ ማጫሴኮ፣ «ታና ሃሌ ኡሻርኪ» ያገሰ።

8 ሄ ዎዴ ዩሱሳ ታማሬቲ ካሌ ሻማናው ካታማ ቢደሶናሺን።

9 ሄ ማጫሲያ ዛራዳ፣ «ኔኒ ኣይሁዴ ኣሴ ጊዳሺ፣ ሳማሬ ማጫስ ጊዲያ ታና ዋናዳ ሃሌ ኡሻ ጋይ?» ያጋሱ። ሄሳ ኢያ ጊዳይ ኣይሁዴቲ ሳማሬታራ ጋሄቶና ጊሾሳ።

10 ዩሱሱ ዛራዳ፣ «ኔኒ ፆሳ ኢሞታኔ ሃሌ ታና ኡሻ ጌይሲ ኦኔኮ ኤሪዳባ ጊዲያኮ ኢያ ኔ ዎሳና፤ ኢካ ኔው ዴዎ ኢሚያ ሃሌ ኢማናሺን» ያገሰ።

11 ማጫሲያ ዛራዳ፣ «ጎዳው፣ ኔው ዲቂያባይ ባዎ፤ ኦላይካ ዚቃ። ያቲን፣ ዴዎ ኢሚያ ሃሌ ኔ ኣጫፕ ኤካኔ?»

12 ኑስ ሃ ሃላ ኦላ ኢሚዳ ኑ ኣዎ ያይቆባፕ ኔኒ ኣቆይ? ኢ፣ ኢያ ናይቲኔ ኢያ ሜሄይ ሃ ኦላፌ ኡዪደሶና» ያጋሱ።

13 ዩሱሱ፣ «ሃ ሃላፌ ኡዪዳ ኦኒካ ዛሪ ሳሞታና።

14 ሺን ታኒ ኢማና ሃላ ኡያ ኦኒካ ኡባካ ሳሞቲና። ታኒ ኢማና ሃላይ ኢያ ጊደን ሜሪና ዴዎ ኢሚያ ጎጊያ ፑልቶ ጊደና» ያገሰ።

15 ማጫሲያ ዛራዳ፣ «ጎዳው፣ ታኒ ሳሞቶና ሜላኔ ሃሌ ቲካናው ሃ ቤሳ ዮና ሜላ ታው ሄ ሃላ ኢማ» ያጋሱ።

16 ዩሱሱ ኢኮ፣ «ባዳ ኔ ኣዚና ፃጋዳ ያ» ያገሰ።

17 ማጫሲያ ዛራዳ፣ «ታው ኣዚኒ ባዎ» ያጋሱ።

ዩሱሱ ኢኮ፣ «ታው ኣዚኒ ባዎ ጉሳን ባላባካ።

18 ኔው ካሴ ኢቻሹ አዚናቲ ዳዎሶና። ሃዒ ኔራ ዳዒያ አዳይ ኔ አዚና ገደና። ኔኒ ሃዒ ቱማ ኦዳዳሳ» ያገሱ።

19 ማጫሲያ ዛራዳ፣ «ጎዳው፣ ኔኒ ናቤ ገዳይሳ ታኒ ኤራሰ።

20 ኑ አዋቲ ሃ ዳሪያ ቦላ ዎሳ ጎይኒደሶና። ሺን ሂንቲ አይሁዳቲ አሲ ዎሴ ጎይናናው ቤሲያ ቤሳይ ዩሩሳላሜና ጌታ» ያገሱ።

21 ዩሱሲ፣ «ሃ ማጫሴቱ ታና አማና፤ ሃ ዳሪያ ቦላ ዎይኮ ዩሩሳላሜን አዋ ሂንቲ ጎይናና ዎዳይ ያና።

22 ሂንቲ ሳማሬቲ ኤሮናይሳ ጎይኔታ። ሺን ኑኒ አቶቴላይ አይሁዳፕ ያ ገሾ ኑ ኤሪይሳ ጎይናሰ።

23 ሺን አዋ ቱማን ጎይኔይሳቲ አያናኒኔ ቱማቴላን ጎይናና ዎዳይ ማታቲሰ፤ ሃዒካ ጋኪሰ። ሂዛ፣ አዋይ ኮዬይ ሃይሳ ሜላ ኦጊያን ጎይኔይሳታ።

24 ዎሳይ አያና፤ ኢያው ጎይኔይሳቲ አያናኒኔ ቱማቴላን ጎይናናው ቤሴሰ» ያገሱ።

25 ማጫሲያ ዛራዳ፣ «ኪሪሰቶሲ ያናይሳ ታኒ ኤራይሰ። ኢ ያ ዎዳ ኑሰ ኡባባ ኑዳና» ያገሱ።

26 ዩሱሲ፣ «ሃ ኔራ ኦዳቴይ ታኒ ኢያ» ያገሱ።

27 ኤንቲ ኦዳቲሺን፣ ዩሱሳ ታማሬቲ ቤዳ ቤሳፌ ሲሚደሶና። ዩሱሲ ማጫሳራ ኦዳቲሺን ኤንቲ ቤዒዲ ዳሮ ማላሌቲደሶና። ሺን ማጫሴኮ፣ «አይ ኮያይ?» ዎይኮ ዩሱሳኮ፣ «ኢራ አይሰ ኦዳታይ?» ገዳይ ኦኒካ ባዋ።

28 ሂሳፌ ጉዬ፣ ማጫሲያ ባ ሃላ ኦቱዋ አጋዳ ጉዬ ካታማ ባዳ አሳኮ፣

29 «ታኒ ኦሲዳባ ኡባ ታው ኦዲዳ አዲያ ቤዓናው ዩዲቱ። ኢ ኪሪሰቶሳ ገዳንዳሻ?» ያገሱ።

30 አሳይ ካታማፕ ከዩዲ ዩሱሳኮ ቢደሶና።

31 ሂሲ ሃኒሺን፣ ኢያ ታማሬቲ ዩሱሳኮ፣ «ጉላባ ማርኪ» ያገዲ ዎሲደሶና።

32 ሺን ኢ፣ «ታው ሂንቲ ኤሮና ካሊ ታ ሚይሲ ዳዔሰ» ያገሱ።

33 ሂሳ ገሾ፣ ኢያ ታማሬቲ ባንታ ገደን፣ «ኢያው ሚያባ አሲ ኤሆና አጌና?» ያገደሶና።

34 ዩሱሲ ኤንታኮ፣ «ታ ካላይ ታና ኪቲዳይሳ ሼኒያ ኦላናይሳኔ ኢያ ኦሱዋ ፖላናይሳ።

35 ሂንቲ፣ (ኦይዲ አጌናፕ ጉዬ ካላይ ጫኬታና) ጌኬቲዬ? ሺን ታኒ ሂንቲው ኦዳይሰ፤ ካላይ ካዲዲ ሺሾሰ ጋኪዳይሳ ሎይሊ ያለቱ።

36 ዜሬይሰኔ ጫኬይሲ ኢሲፌ ኡፋይታና ሜላ ጫኬይሲ ዳዋዜ ኤኬሰ ቃሲ ካላ ሜሪና ዳዎሰ ሺሼሰ።

37 ሂዛ፡ ሳኢሶይ ዘሬሰ፤ ሃንኮይ ቃሲ ጫኬሰን ገያ ኦዳይ ቱማ።

38 ሂንቴ ዳቡሪሪናይሳ ሺሻና ማላ ታኒ ሂንቴና ኪታሰ። ሃራቲ ኦሊ ዳቡሪሪሳቡዋን ጌሊዲ ሂንቴ ኤንታ ዳቡሪ ኣይፊያ ኤኪዳታ» ያገሰ።

39 ማጫሲያ፡ «ኢ፡ ታኒ ኦሊዳ ኡባባ ኦዲሰ» ጋዳ ማርካቲዳ ገሾ ሄ ካታማን ደዒያ ሳማሬ ኣሳፔ ዳሮቲ ዩሱሳ ኣማኒደሶና።

40 ሳማሬ ኣሳይ ዩሱሳኮ ዩዲ፡ ባንታ ማታን ጋምዓና ማላ ዩሱሳ ዋሲን ኢ ያን ናምዑ ጋላሰ ኡቲሰ።

41 ኢ ኦዲያ ቃላ ገሾ ካሴይሳፊ ዳሮ ኣሳይ ኣማኒደሶና።

42 ቃሲ ኤንቴ ማጫሴኮ፡ «ሃዒ ኑ ኣማኔይ ኑ ሁዒን ኢ ጌይሳ ሲዒዳ ገሾሳፊ ኣቲን ኔኒ ማርካቲዳ ገሾሳ ገዳና። ቃሲ ኢ ቱማ ሃ ኣላሚያ ኣሼይሳ ገዳይሳ ኑኒ ኤሪዳ» ያገደሶና።

ዩሱሲ ኢሲ ሹማ ናዓ ፓሊሰ

43 ናምዑ ጋላሳፔ ጉዩ፡ ዩሱሲ ያፔ ከዩዲ ጋሊላ ቢታ ቢሰ።

44 ዩሱሲ ባ ሁዒን፡ «ናቤይ ባ ቢታን ቦንቹቱና» ያገዲ ካሴቲዲ ኦዲሰ።

45 ዩሱሲ ጋሊላ ጋኪዳ ዋዴ ጋሊላ ኣሳይ ኢያ ሞኪደሶና። ኣይሰ ገኮ፡ ፓሲካ ባሌ ቦንቹያ ጋላሰ ኤንቴ ዩሩሳላሚን ደዒያ ገሾ ኢ ኦሊዳባ ኡባ ቤዒደሶና።

46 ዩሱሲ ሃላ ዋይኔ ኡሺ ላሚዳ ቤሳ፡ ጋሊላን ደዒያ ቃና ካታማ ቢሰ። ቁፊርናሆሚን ካዋ ከላን ኦሊያ ኢሲ ሹማሰ ናዓይ ሃርጌቲሰ።

47 ዩሱሲ ዩሁዳፔ ጋሊላ ዩዳይሳ ሄ ሹማይ ሲዒዲ ኢያኮ ዩሰ። ሃይቃናው ማቲዳ ባ ናዓ ቢዲ ፓላና ማላ ዩሱሳ ዋሲሰ።

48 ዩሱሲ ሹማኮ፡ «ፆሳይ ኦሊያ ማላታታኔ ኦራላባታ ቤዖና ደዒሼ ሂንቴ ኡባራካ ኣማኔኬታ» ያገሰ።

49 ሹማይ ዘሪዲ፡ «ሳዳው፡ ታ ናዓይ ሃይቆና ደዒሺን ታራ ዩቆርኪ» ያገሰ።

50 ዩሱሲ፡ «ኔ ሶ ባ፤ ኔ ናዓይ ፓፃና» ያገሰ።

ሄ ሹማይ ዩሱሲ ገዳይሳ ኣማኒዲ ባ ሶ ቢሰ።

51 ኢ ባ ሶ ቢሺን ኢያ ኣይሌቲ ኢያኮ ዩሼ ኢያራ ኦጌን ጋሄቲዲ፡ «ኔ ናዓይ ፓፂሰ» ገደሶና።

52 ኢ ባ አይሌታ ባ ናዓስ አይ ሳቲን ሎዒዳኮ ኦይቸሰ።
 ኤንቲ ዛሪዲ፣ «ዚኔ ላቸን ሳቲን ሚሻይ ኣገሰ» ያገደሶና።
 53 ናዓ አዋይ ዩሱሲ ባኮ፣ «ኔ ናዓይ ፓፃና» ገዳይ ሄ ሳቲያን
 ገዳይሳ ኣኬኪሰ። ሄሳ ገሾ፣ ኢኔ ኢያ ሶ ኣሳ ኡባይ ኣማኒደሶና።
 54 ሄሲ ዩሱሲ ዪሁዳፔ ጋለላ ዪዲ ኦሲዳ ናምዓንፉ ማላታ።

5

ዩሱሲ ኢሲ ጉንዳ አዲያ ፓሴሰ

1 ሄሳፌ ጉዬ፣ ዩሱሲ አይሁዳቲ ቦንቺያ ባሊያስ ዩሩሳላሜ ቢሰ።
 2 ዩሩሳላሜን ደርሳ ፔንጊያ ማታን ኢብራይስጭ ደናን ቤቲሳይዳ ጊያ ቲቁቲዳ ሃሊ ዴዔስ። ሄ ቲቁቲ ኡቲዳ ሃላ ማታን ኢቻሹ ሹምፒያ ቤሳቲ ዴዖሶና።
 3 [ሄሳን ሃላይ ቃፃናይሳ ናጊያ] ዳር ሃርጋንቸቲ፣ ቆቁቲ፣ ዋቤቲኔ ጉንዳቲ ዚንዒደሶና።
 4 [አይሰ ገኮ፣ ኢሲ ኢሲ ቶሆ ጎዳ ኪታንቸይ ቲቁቲዳ ሃላን ዋዲዲ ሃላ ቃሌስ። ሃላይ ቃፂያ ዋዴ ኮይር ጌሊዳ ኡራይ ባና ኦይኪዳ አይ ሃርጌፌካ ፓፂሰ።] *
 5 ሄ ቤሳን ሃስታማኔ ሆሰቸን ላይሊ ሃርጌቲዳ ኢሲ አዳይ ዴዔስ።
 6 ዩሱሲ ያን ዚንዒዳ አዲያ ቤዒዲ፣ ቃሲ ዳር ዋዴ ሃርጌቲዳይሳ ኤሪዲ አዲያኮ፣ «ፓፃናው ኮያይ?» ያገሰ።
 7 ሃርጋንቸይ ዛሪዲ፣ «ጎዳው፣ ሃላይ ቃፂያ ዋዴ ታና ሃላን ዩጊያ ኣሲ ባዋ። ታኒ ጌላና ሃኒያ ዋዴ ሃራይ ታፔ ሲንፋቲዲ ጌሊ ኪቸሰ» ያገሰ።
 8 ዩሱሲ ኢያኮ፣ «ዴንዳ ኤቃ፤ ኔ ኣልጋ ቶካዳ ባ» ያገሰ።
 9 አዳይ ሶሁዋራካ ፓፂሰ፤ ባ ኣልጋ ቶኪዲ ቢሰ።
 ሄሲ ሳምባታ ጋላሳን ሃኒሰ።
 10 ሄሳ ገሾ፣ አይሁዳቲ ፓፂዳ አዲያኮ፣ «ሃቺ ሳዓይ ሳምባታ፤ ኔ ኔ ኣልጋ ቶኬይሲ ዋጋ ጌዴና» ያገደሶና።
 11 ሺን አዳይ፣ «ታና ፓሴዳይሲ፣ ኔ ኣልጋ ቶካዳ ባ ገሰ» ያገዲ ዛሪሰ።
 12 ኤንቲ ኢያኮ፣ «ኔና፣ ኔ ኣልጋ ቶካዳ ባ ገዳይ ኢ ኦኔ?» ያገዲ ኦይቸደሶና።

* 5:4 ኢሲ ኢሲ ቤኒ ማፃፋቲ ፓይዳ ሄሻስ ኮይር ባጋኔ ፓይዳ ኦይዳ ጉጃኮና።
 5:10 ናህ 13:19፤ ኤር 17:21

13 ሺን ዩሱሲ ሄ ቤሳን ዳሮ ኣሳ ጊዶራ ኤሪሶና ካንሊዲ ቢዳ ጊሾ ኣዳይ ባና ፓሊዳይ ኦኔኮ ኤሪና።

14 ዩሱሲ ጉዩፔ ሄ ኣዲያ ያሳ ኬላን ዳሚዲ፥ «ሄኮ፥ ኔኒ ፓፃዳሳ፤ ሃይሳፌ ኢታባይ ኔና ጋኮና ሜላ ዛራዳ ናጋራ ኦሶፋ» ያገሰ።

15 ሃሳፌ ጉዩ፥ ኣዳይ ቢዲ ባና ፓሊዳይሲ ዩሱሳ ጊዲዳይሳ ኣይሁዴታሰ ኦዲሰ።

16 ዩሱሲ ሃሳ ሳምባታ ጋላሰ ኦሊዳ ጊሾ ኣይሁዴቲ ዩሱሳ ጎዳ ኦይኪዶሶና።

17 ዩሱሲ ዛሪዲ፥ «ታ ኣዋይ ኡባ ዎዴ ኦሌሰ፤ ታካ ኦላናው ቤሴሰ» ያገሰ።

18 ዩሱሲ ሳምባታ ቦንቾና ጊሾ ፃላላሰ ጊዶናሺን ያሳይ ባ ኣዎ ጊዲ ባና ያሳራ ገሊሲዳ ጊሾ ኣይሁዴቲ ኢያ ዎፋናው ካሴፔ ሚንሊዲ ኮዩዶሶና።

ያሳ ናዓ ማታ

19 ዩሱሲ ዛሪዲ፥ «ታኒ ሂንቴው ቱማ ኦዳይሰ፤ ናዓይ ባርካ ኣይኮካ ኦላናው ዳንዳዔና። ኢ ባ ኣዋይ ኦሊሺን ቤይይሳ ፃላላ ኦሌሰ። ኣዋይ ኦሌይሳ ናዓይካ ኦሌሰ።

20 ኣዋይ ባ ናዓ ዶሲያ ጊሾ ኢ ኦሊያ ኦሶ ኡባ ባ ናዓ ቤሴሰ። ሂንቴ ማላሌታና ሜላ ኢ ሃይሳፌ ኣጂያ ኦሶ ባ ናዓ ቤሳና።

21 ኣዋይ ሃይቂዳይሳታ ሃይቆፔ ዳንሊዲ ኤንታው ዴዎ ኢሚይሳዳ ናዓይካ ባ ኮዩይሳታሰ ዴዎ ኢሚሰ።

22 ኣዋይ ናዓሰ ፐርዳ ማታ ኡባ ኢሚሰፔ ኣቲን ኢ ኦናካ ፐርዳና።

23 ኣሳይ ኡባይ ኣዎ ቦንቾይሳዳ ናዓካ ቦንቻና። ናዓ ቦንቻና ኦኒካ ናዓ ኪቲዳ ኣዎካ ቦንቻና።

24 «ታኒ ሂንቴው ቱማ ኦዳይሰ፤ ታ ቃላ ሲዔይሳሰኔ ታና ኪቲዳይሳ ኣማኔይሳሰ ሜሪና ዴይይ ዴዔሰ። ኢ ሃይቆፔ ዴዎን ፐኒዳ ጊሾ ፐርዳቲና።

25 ታኒ ሂንቴው ቱማ ኦዳይሰ፤ ሃይቂዳ ኣሳይ ያሳ ናዓ ቃላ ሲዒያ ዎዴይ ያና፤ ሄሲካ ሃዒ። ሄ ቃላ ሲዒይ ዴዎን ዳና።

26 ኣዋይ ዴዎሰ ፑልቶ ጊዲዳይሳዳ ናዓካ ዴዎሰ ፑልቶ ኦሊሰ።

27 ናዓይ ኣሳ ናዓ ጊዲያ ጊሾ ኣዋይ ናዓሰ ፐርዳ ማታ ኢሚሰ።

28 «ዱፎን ዴዔይሳቲ ኢያ ቃላ ሲዒዲ ዴንዲያ ዎዴይ ያና ጊሾ ሃይሳን ማላሌቶፊቴ።

29 ሎዎ ኦሊዳይሳቲ ዴዎን ዳናው ቃሲ ኢታ ኦሊዳይሳቲ ፐርዳ ኤካናው ዱፎፔ ዴንዳና።

ዬሱሳስ ማርካቲዳ አሳታ

30 «ታኒ ታ ማታን አይቢባካ አላናው ዳንዳዒኬ። ያሳይ ታው ኦሊዳይሳቲ ፐርዳይስ። ታኒ ታና ከቲዳይሲ ኮያባ ኦላይሲፔ አቲን ታ ኮያባ ኦላና ጊሾ ታ ፐርዳይ ቱማ።

31 «ታኒ ታባ ማርካቲኮ ታ ማርካቲላይ ቱማ ጊዴና።

32 ታባ ማርካቲያ ሃሪ ዴዔስ፤ ኢ ታባ ማርካቲይሲ ቱማ ጊዴይሳ ታኒ ኤራይስ።

33 «ሂንቴ ዮሀንሳኮ አሴ ከቲን ኢ ቱማስ ማርካቲስ።

34 ታኒ ሄሳ ሂንቴው ኦዴይ፣ ሂንቴ አታና ማላ ጋዳፔ አቲን አሳ ማርካቲላ ታው ኮሺን ጊዴና።

35 ዮሀንሲ ሙቃዳዳ ኤዲሼ ፖሲስ። ሂንቴ ጉላ ዎዴ ኢያ ፖዑዋን ኡፋይቲዴታ።

36 «ሺን ታው ዮሀንሳፔ አዲያ ማርኪ ዴዔስ። ታኒ አላና ማላ ታ አዎይ ታው አሚዳ ኦሶቲ ታባ ማርካቶሶና፤ አዎይ ታና ከቲዳይሳ ቆንጪሶሶና።

37 «ቃሲ ታና ከቲዳ አዎይካ ባ ሁዒን ታባ ማርካቲስ። ሂንቴ ኢያ ቃላ ኡባራካ ሲዒቤኬታ ዎይኮ ኢያ ማላ ቤዒቤኬታ።

38 ኢ ከቲዳይሳ ሂንቴ አማኖና ጊሾ ኢያ ቃላይ ሂንቴ ዎዛናን ባዎ።

39 «ጌሻ ማፃፋታፔ ሜሪና ዴዎ ዴማናባ ሂንቴው ዳኒን ኤንታ ፒልጌታ፤ ኤንቲ ታባ ማርካቶሶና።

40 ሺን ሂንቴ ዴዎ ዴማናው ታኮ ያናው ኮዬኬታ።

41 «አሳፔ ታኒ ቦንቾ ኮዬኬ።

42 ሺን ታኒ ሂንቴ ዎዛናን ያሳ ሲቆይ ባይናይሳ ኤራይስ።

43 ታኒ ታ አዎ ማታን ያስ፣ ሺን ታና ሞኪቤኬታ። ሃራይ ባ ማታን ያ ዎዴ ኢያ ሞኬታ።

44 ሂንቴ ኢሶይ ኢሱዋፌ ቦንቾ ኮዬይሳቲ፣ ኢሲ ያሳፌ ያ ጋላታ ኤካናው ኮዮናይሳቲ፣ ዋኒዲ ታና አማናናው ዳንዳዒቲ?

45 «ታኒ ታ አዎ ሲንፋን ሂንቴና ሞቲያባ ሂንቴው ዳኖ። ሂንቴና ሞታናይ ሂንቴ ኡፋይሳን ናጊያ ሙሴ።

46 ሂንቴ ሙሴ አማኒዳባ ጊዲያኮ ኢ ታባ ዓፊዳ ጊሾ ታናካ አማናናሺን።

5:29 ዴ 12:2 5:33 ዮሃ 1:19-27፤ 3:27-30 5:37 ማቶ 3:17፤ ማር 1:11፤ ሉቃ 3:22

47 ሺን ሂንቲ ኢ ፃፊዳይሳ አማኖና ኢዲኮ ታ ቃላ ዋቲዲ አማናኔ?» ያጊሰ።

6

ዩሱሲ ኢቻሹ ሙኩሉ አሳ ሙዚሰ
(ማቶ 14:13-21፤ ማር 6:30-44፤ ሉቃ 9:10-17)

1 ሄሳፌ ጉዬ፣ ዩሱሲ ዲባርዮሳ ጊያ ጋለላ አባፌ ሄፊንላ ፒረሰ።

2 ኢ ሃርጋንቸታ ፓሶን ኦሊዳ ማላታ ቤዒዳ ጊሾ ዳር አሳይ ኢያ ካሊዳሶና።

3 ዩሱሲ ዳሪያ ቦላ ኬዩዲ፣ ያን ባ ታማሬታራ ኢሲፌ ኡቲሰ።

4 አይሁዴቲ ቦንቺያ ፓሲካ ባሌ ጋላሳይ ጋኪሰ።

5 ዩሱሲ ዳር አሳይ ባኮ ዩይሳ ቤዒዲ ፊልጶሳኮ፣ «ሃ አሳ ኡባ ሙዛናው ጊዲያ ካሏ አዉፔ ሻማኔ?» ያጊሰ።

6 ኢ ሄሳ ፊልጶሳ ፓጫናው ጊሲፔ አቲን ኢ ባ ሁዔን አይ ኦላኔኮ ኤሬሰ።

7 ፊልጶሲ ዛሪዲ ዩሱሳኮ፣ «ሃሪ አቶሺን፣ ሁዔን ሁዔን፣ ኢሲ ኢሲ ባርሲ ጋላናው፣ ናምቡ ያቱ ዲናሬን * ኡይሉ ሻማንካ ጊዳና» ያጊሰ።

8 ቃሲ ዩሱሳ ታማሬታፔ ኢሶይ፣ ሲሞን ጳዲርሳ አሻይ ኢንዲሪያሲ፣

9 «ኢቻሹ ባንጋ ሶሎኔ ናምቡ ሞሎ ኦይኪዳ ኢሲ ናዓይ ሃይሳን ዳዔሰ፣ ሺን ሃ አሳ ኡባሰ ሄሲ አይ ማዳኔ?» ያጊሰ።

10 ዩሱሲ ባ ታማሬታኮ፣ «አሳ ኡቲሲቲ» ያጊሰ። ሄ ቤሳን ዳር ማቲ ዳዔሰ፤ አሳ ኡባይ ኡቲሰ። አዳ አሳ ታይቦይ ኢቻሹ ሙኩሉ ጊዳና።

11 ዩሱሲ ኡይላ ኤኪዲ ያሳ ጋላቲ ሲሚዲ ያን ኡቲዳ አሳሰ ጊሺሰ። ሞሉዋካ ኤኪዲ ሄሳዳ ኦሊዲ አሚን፣ አሳይ ባ ኮዩዳይሳ ሜላ ሚሰ።

12 ኤንቲ ኡባይ ካሊዳፔ ጉዬ ዩሱሲ ባ ታማሬታኮ፣ «ኢሲባይካ ኢቶና ሜላ አቲዳ ቲፊያ ሺሺቲ» ያጊሰ።

13 ሄሳ ጊሾ፣ ኤንቲ ኡባ ሺሺዳሶና። አሳይ ሚን አቲዳ ባንጋ ሶሎ ቲፊያ ሺሺዲ ታማኔ ናምቡ ጋይታ ኩንሊዳሶና።

* 6:7 ዲናሬ፣ ኢሲ ዲናሬይ ኢሲ አሲ ኢሲ ጋላሰ ኦሊ ፒዒዲ ኤኪያ ሚሹ። ናምቡ ያቱ ዲናሬይ ኢሲ አሲ ላይላ ባጋ ኦሊዲ ኤኪያ ሚሹ ከና። (ማቶ 20:2) ያለቲ።

14 አሳይ ዬሱሲ አሊዳ ማላታታ ቤዒዳ ዋዴ «ሃይሲ ቱማ ሃ አላሚያ ያና ጌቲቲዳ ናቢያ» ያጊደሶና።

15 ዬሱሲ ኤንቲ ኢያ ኦይኪዲ ዋልቃን ካዋ ኦላናው ሃኔይሳ ኤሪዲ፣ ባርካ ዴሪያ ቦላ ዛሪ ኬደሰ።

ዬሱሲ አባ ቦላራ ሃሙቲሰ
(ማቶ 14:22-33፤ ማር 6:45-52)

16 ሳዓይ ኦማርሲዳ ዋዴ ዬሱሳ ታማሬቲ አባኮ ዋዲደሶና።

17 ሳዓይ ቃሚዳ ጊሾኔ ዬሱሲ ቡሮ ኤንታኮ ዪቦና ጊሾ ኢያ ታማሬቲ ዋጎሎን ጌሊዲ አባ ፒኒዲ ቁፊርናሆሜ ባናው ዴንዲደሶና።

18 ዋልቃማ ጫርኮይ ጫርኪዳ ጊሾ አባይ ቃዳሰ።

19 ኢቻሹ ዋይኮ ኡሱፑን ኪሎ ሚቲሬ ጊዴይሳ ሜላ ኤንቲ አባ ፒዲዲ ቢዳፔ ጉዬ ዬሱሲ አባ ቦላራ ሃሙቲሾ ዬይሳ ቤዒዲ ያደደሶና።

20 ሺን ኢ፣ «ባቦፊቱ፣ ታና» ያጊሰ።

21 ኤንቲ ኡፋይቲዲ ኢያ ዋጎሎን ጌልሲደሶና፤ ኢራካ ዋጎሎይ ኤንቲ ቢያ አባ ጋፃ ጋኪሰ።

ዬሱሲ ዴያ ኡይላ

22 ዋንቱላ ጋላሰ አባፌ ሄፊንላን አቲዳ ዳሮ አሳይ ኢሲ ዋጎሎ ፃላሊ ዴዔይሳ ቤዒደሶና። ዬሱሲ ባ ታማሬታራ ዋጎሎን ጌሊዲ፣ ኤንታራ ቦናይሳኔ ኤንቲ ባንታርካ ቢዳይሳ አኬኪደሶና።

23 ሺን ዲባርዮሳፔ ሃራ ዋጎሎቲ ዬሱሲ ያሳ ጋላቲን፣ አሳይ ኡይላ ሚዳ ቤሳ ዪደሶና።

24 አሳይ ዬሱሲ ዋይኮ ኢያ ታማሬቲ ያን ባይናይሳ ቤዒዲ፣ ዬሱሳ ኮያናው ዋጎሎታን ጌሊዲ ቁፊርናሆሜ ቢደሶና።

25 አሳይ ዬሱሳ አባፌ ሄፊንላን ዴሚዳ ዋዴ «አሰታማሪያው፣ ሃ አዉዴ ያዲ?» ያጊሰ።

26 ዬሱሲ ዛሪዲ፣ «ታኒ ሂንቱው ቱማ ኦዳይሰ፤ ሂንቱ ታና ኮይይ ኡይሊ ሚዲ ካሊዳ ጊሾሳፌ አቲን ማላታ ቤዒዳ ጊሾሳ ጊዴና።

27 ሳሚያ ካላሰ ኦሎፊቱ፣ ሺን ሜሪና ዴያ ኢሚያ ካላሰ አሊቱ። ያሳ አዋይ ኢ ኦላና ሜላ ኢያው ማታ ኢሚዳ ጊሾ ሄ ካላ አሳ ናዓይ ሂንቱው ኢማና» ያጊሰ።

28 ያቲን ኤንቲ፣ «ኦኒ ያሳ ኦሱዋ ኦላናው አይ ኦላኔ?» ያጊዲ ዬሱሳ ኦይቺደሶና።

29 ዬሱሲ ዛሪዲ፣ «ሂንቱ ኦላና ሜላ ያሳይ ኮያ ኦሶይ ሃይሳ፣ ኢ ኪቲዳይሳ አማኒቱ» ያጊሰ።

30 ኤንቲ ዛሪዲ፡ «ኑኒ ቤዒዲ፡ ኔና አማናና ሜላ ኣይ ማላታ ኔ ቤሳኔ? ኔ ኣይ ኦላኔ?

31 ጌሻ ማፃፋን፡ «ኤንቲ ማና ሜላ ኡይሉ ሳሎፔ ኢሚስ» ጌቲቲ ፃፊቲዳይሳዳ ኑ አዋቲ ባዙ ቢታን ማና ሚደሶና» ያጊደሶና።

32 ዬሱሲ፡ «ታኒ ሂንቲው ቱማ ኦዲይሰ፤ ሂንቲው ሳሎፔ ቱማ ኡይላ ኢሚዳይ ታ አዋፔ ኣቲን ሙሴ ጊዳና።

33 ሂዛ፡ ያሳይ ኢሚያ ኡይላይ ሳሎፔ ዋዲዳይሲ አላሚያሰ ዴዎ ኢሚይሳ» ያጊሰ።

34 ኤንቲ ዛሪዲ፡ «ሳዳው፡ ኑስ ሄ ኡይላ ኡባ ዋዴ ኢማ» ያጊደሶና።

35 ዬሱሲ፡ «ታኒ ዴዎ ኢሚያ ኡይላ፤ ታኮ ያ ኦኒካ ኡባራካ ኮሻቲና። ቃሲ ታና አማኒያ ኡራይ ኡባራካ ሳሞቲና።

36 ሺን ታኒ ሂንቲው ኦዲሰ፤ ሂንቲ ታና ቤዒዴታ፡ ሺን አማኔኬታ።

37 ታ አዋይ ታው ኢሚያ ኡባይ ታኮ ያና፤ ቃሲ ታኮ ያ ኦናካ ካሬ ዬዲኬ።

38 ታኒ ታ ኮያባ ኦላናው ጊደናሺን ታና ከቲዳይሲ ኮያባ ኦላናው ሳሎፔ ያሰ።

39 ታና ከቲዳይሲ ኮዬይ ሃይሳ፡ ታኒ ኢ ታው ኢሚዳ ኡባታካ ወርሴላ ጋላሰ ሃይቆፔ ዴንላና ሜላፔ ኣቲን ኢሱዋካ ቋይሳና ሜላ ኮዬና።

40 ሂዛ፡ ታ አዋይ ኮዬይ ሃሳ፡ ናዓ ቤዒዲ አማኒያ ኡባይ ሜሪና ዴዑዋ ኤካና፤ ታኒ ሄ ኡባ ወርሴላ ጋላሰ ሜሪና ዴዎሰ ሃይቆፔ ዴንላና» ያጊሰ።

41 ዬሱሲ፡ «ታኒ ሳሎፔ ዋዲዳ ኡይላ» ጊዳ ጊሾ ኣይሁዴቲ ኢያ ቦላ ዙዙሚደሶና።

42 ኤንቲ፡ «ሃይሲ ኑኒ ኢያ አዋኔ ኢያ ኣዪው ኤሪያ ዮሴፋ ናዓ ዬሱሳ ጊዴኔ? ያቲን፡ ኢ ዋኒዲ፡ «ታኒ ሳሎፔ ዋዲሰ» ጋናው ዳንዳዒ?» ያጊደሶና።

43 ዬሱሲ ዛሪዲ፡ «ኢሶይ ኢሱዋራ ዙዙሚይሳ ኣገቲ።

44 ታና ከቲዳ ታ አዋይ ታኮ ኤሂያ ኣሳፔ ኣቲን ታኮ ያናው ዳንዳዒያ ኦኒካ ባዋ። ታኒ ወርሴላ ጋላሰ ኢያ ሜሪና ዴዎሰ ሃይቆፔ ዴንላና።

45 ናቤቲ፡ «ያሳይ ኣሳ ኡባ ታማርሳና» ያጊዲ ፃፊደሶና። አዋ ሲዔይሲኔ ኢያፔ ታማሪያ ኦኒካ ታኮ ዬሰ።

46 ያሳ ማታፔ ዩዳይሳፊ ኣቲን አዋ ቤዒዳይ ኦኒካ ባዋ፤ ኢያ ፃላሊ አዋ ቤዒሰ።

47 «ታኒ ሂንቱው ቱማ ኦዲይሰ፤ ታና አማኒያ ኦዲሰካ ሜሪና ዴያይ ዴዔስ።

48 ታኒ ዴያ ኢሚያ ኡይላ።

49 ሂንቱ አዋቲ ባዞን ማና ሚደሶና፣ ሺን ሃይቂደሶና።

50 ሳሎፔ ያ ኡይላይ ሃይሳ፤ ሄ ኡይላ ሚያ ኦኒካ ሃይቆና።

51 ሳሎፔ ዩዳ ዴያ ኡይላይ ታና። ኦኒካ ሃ ኡይላ ሚኮ ሜሪናው ዳና። ቃሲ ሃ አላሚይ ዴያን ዳና ሜላ ታኒ ሂንቱው ኢማና ኡይላይ ታ አሹዋ» ያጊሰ።

52 አይሁዳቲ፣ «ሃ አዴይ ባ አሹዋ ኑ ማና ሜላ ኑስ ዋቲዲ ኢማናው ዳንዳዒ?» ያጊዲ ባንታ ጊደን ፓላሚደሶና።

53 ሄሳ ጊሹ፣ ዩሱሲ ኤንታኮ፣ «ታኒ ሂንቱው ቱማ ኦዲይሰ፤ አሳ ናዓ አሹዋ፣ ሂንቱ ሞና ኢዲኮ፣ ቃሲ ኢያ ሱላ ሂንቱ ኡዮና ኢዲኮ፣ ሂንቱው ዴያይ ባዋ።

54 ታ አሹዋ ሚያ ኡራሲኔ ታ ሱላ ኡያ ኡራሰ ሜሪና ዴያይ ዴዔስ። ታኒ ዉርሴላ ፓላሰ ኢያ ሃይቆፔ ዴንላና።

55 ታ አሾይ ቱማ ካሏ፤ ታ ሱላይካ ቱማ ኡሹ።

56 ታ አሹዋ ሚያ ኡራይኔ ታ ሱላ ኡያ ኡራይ ታናን ዴዔስ፤ ታካ ኢያን ዴዓይሰ።

57 ዴያ አዋይ ታና ከቲን፣ ታኒ ኢያ ባጋራ ዴያን ዴዔይሳዳ፣ ታና ሚያ ኡራይካ ታ ፓሶን ዴያን ዳና።

58 ሳሎፔ ዋጁዳ ኡይላይ ሃይሳ፣ ሂንቱ አዋቲ ሚዲ ሃይቂዳ ማና ሜላ ጊዳና፤ ሃ ኡይላ ሚያ ኡራይ ሜሪናው ዳና» ያጊሰ።

59 ዩሱሲ ቂፊርናሆሜ ካታማን አይሁዴ ዋሳ ኬላን ሃይሳ ታማርሲስ።

ሜሪና ዴያ ቃላ

60 ዩሱሳ ታማሬታፔ ዳሪያ ባጋይ ሄሳ ሲዒዳ ዋዴ «ሃይሲ ጌሎና ቲሚርቲ፤ ሃይሲ ኦዴሰ ጌሊ?» ያጊደሶና።

61 ዩሱሲ ባ ታማሬቲ ሄሳሰ ዙዙሚዳይሳ ኤሪዲ፣ «ሃይሲ ሂንቲና ጁቢ?»

62 ያቲን፣ አሳ ናዓይ ካሴ ዴዒያሱዋ ፑዴ ኬዩሺን ሂንቱ ቤዒዲ ዋይጋንዴቲ?

63 ጌሻ አያናይ ዴያ ኢሜስ፤ አሳ ዋልቂ አይኮካ ማዴና። ታ ሂንቱው ኦዲያ ቃላይ ዴያ ኢሚያ ጌሻ አያናፔ ዩስ።

64 ሺን ሂንቱ ጊደን አማኖይሳቲ ዴያሶና» ያጊሰ። አማኖይሳቲ ኦናንቲኮ ዩሱሲ ኮይርፔ ደሚዲ ኤሬሰ። ቃሲ ባና አሏ ኢማናይ ኦኔኮ ኤሬሰ።

65 ቃሲካ ዩሱሲ፡ «አዋይ ባ ጎና ኦኒካ ታኮ ያናው ዳንዳዔና ጋዳ ታኒ ኦዲዳይ ሄሳ ጊሾሳ» ያገሰ።

66 ሄሳ ጋሶን፡ ዩሱሳ ካሌይሳታፔ ዳሮቲ ኢያ አገዲ ጉዬ ሲሚደሶና፤ ዛሪ ኢያ ካሊቦኮና።

67 ዩሱሲ ታማኔ ናምዑ ባ ታማሬታ፡ «ሂንቴካ አገዲ ባናው ኮዬቲ?» ያገዲ ኦይቸሰ።

68 ሲሞን ጳጳርሲ ዛሪዲ፡ «ጎዳው፡ ኮኒ ኦዴኮ ባኔ? ኔው ሜሪና ዴያ ኢሚያ ቃላይ ዴዔሰ።

69 ኔኒ ያሳ ጌሻ ጊዴይሳ ኮኒ አማኖሲኔ ኤርሰ» ያገሰ።

70 ዩሱሲ ኤንታኮ፡ «ታኒ ሂንቴና ታማኔ ናምዓታ ዶራቢኪና? ሺን ሂንቴፌ ኢሶይ ፃላሄ» ያገሰ።

71 ዩሱሲ ሄሳ ጊዳይ ሲሞና ናባ አሰቆሮታ ዩሁዳሳ። ዩሁዲ ዩሱሳ አሊ ኢማናው ዴዒያ ታማኔ ናምዑ ታማሬታፔ ኢሱዋ።

7

ዩሱሳራኔ ኢያ አሻታራ

1 ሄሳፌ ጉዬ፡ አይሁዴቲ ዩሱሳ ዋቆናው ኮያ ጊሾ ኢ ዩሁዳ አገዲ ጋሊላን ሲሜሬቲሰ።

2 አይሁዴቲ ቦንቸያ ሻቃራ ባሌይ ቦንቸታናው ማቲሰ።

3 ሄሳ ጊሾ፡ ዩሱሳ አሻቲ፡ «ኔ ታማሬቲ ኔኒ ኦሊያ ማላታታ ቤዓና ሜላ ሃይሳፌ ዴንዳዳ ዩሁዳ ቢታ ባ።

4 ባው ኤሬታናው ኮያ አሲ ኦኒካ ባ ኦሱዋ ጌንጤና። ኔኒ ሃይሳታ ኦላዳ ኔባ አላሚያ ኤሪሳ» ያገደሶና።

5 ኢያ አሻቲ ሄሳ ጊዳይ ኢያን አማኒቦና ጊሾሳ።

6 ዩሱሲ ኤንታኮ፡ «ታው ኢንጄ ዋዴይ ጋኪቤና፡ ሺን ሂንቴው ኡባ ዋዴይ ኢንጄቲሰ።

7 አላሚይ ሂንቴና ኢፃናው ዳንዳዔና፡ ሺን ታኒ አላሚያ ኦሶይ ኢታ ጊዴይሳ ማርካቲያ ጊሾ ታና ኢፃሰ።

8 ሂንቴ ባሊያ ቤቴ፤ ታ ዋዴይ ጋኪቦና ጊሾ ታኒ ባሊያ ቤኬ» ያገሰ።

9 ኢ ሄሳ ጊዲ ጋሊላን ኣቲሰ።

ዩሱሲ ባሊያ ቦንቻናው ቢሰ

10 ኢያ አሻቲ ባሊያ ቦንቻናው ቢዳፔ ጉዬ ዩሱሲ ኦናካ ኤሪሶና ቆሳን ሄ ቤሳ ቢሰ።

11 አይሁዳት ባሊያ ቦንቺያ ቤሳን፣ «ኢ አዉን ዳዒ?» ያጊዲ ኢያ ኮፎዶሶና።

12 አሳይ ካልካሺዲ ኢያባ ኦዳቶሶና። ባጋይ፣ «ኢ ሎ? አሲ» ጊያ ዎዴ ሃራቲ ቃሲ፣ «አካይ፣ ኢ አሳ ባሌሴስ» ያገሶና።

13 ሺን አይሁዳ ሃላቃታሰ ያዪዳ ጊሾ ኦኒካ ኢያባ ቆንጨን ኦዴቲና።

14 ባሊያ ቦንቺዲ ጊዶ ጋሌያ ዎዴ ዩሱሲ ያሳ ከሌ ቢዲ ታማርሶ ኦይኪሰ።

15 አይሁዳት፣ «ሃ አዳይ ቲሚርቲ ታማርና ሃይሳ ኡባ ዋቲ ኤሪዳ?» ያጊዲ ማላሌቲዶሶና።

16 ዩሱሲ ዛሪዲ፣ «ታ ታማርሲያ ቲሚርቲይ ታና ከቲዳ ያሳ ማታፔ ያ ቲሚርቲፌ አቲን ታባ ጊዴና።

17 ያሳ ሺኒያ ኦላናው ኮያ ኦኒካ ሃ ቲሚርቲይ ያሳ ማታፔ ዪያኮኔ ዎይኮ ታኒ ታፔ ኦዲያኮ ኤራና።

18 ባባ ኦዲያ ኦኒካ ባ ሁዔ ቦንቺ ኮዬስ። ሺን ባና ከቲዳይሳ ቦንቺዎ ኮያ ኦኒካ ኢ ቱማንቺ፤ ኢያን ዎርዶይ ባዎ።

19 ሙሴይ ሂንቲው ሂጊያ ኢሚሰ፣ ሺን ሂንቲፌ ኦኒካ ሂጊያ ናጊቤና። ያቲን አይሰ ታና ዎቆናው ኮዬቲ?» ያጊሰ።

20 አሳይ ዛሪዲ፣ «ኔና ፃላሄይ ኦይኪሰ፤ ኔና ዎቆናው ኦኔ ኮዬይ?» ያጊዶሶና።

21 ዩሱሲ፣ «ታኒ ኢሲ ማላታ ኦሊን ሂንቲ ኡባይ ማላሌቲዳታ።

22 ሂንቲ፣ ሂንቲ ናይታ ቃፃራና ሜላ ሙሴይ ከቲሰ። ሺን ቃፃር ሂንቲ ማይዛቲ ዶሚዶሶናፔ አቲን ሙሴ ጊዴና። ሄሳ ጊሾ፣ ሂንቲ ሳምባታ ጋላስ አዴ ናይታ ቃፃሪታ።

23 ሙሴ ሂጊይ ከቲዳ ጊሾ ሂንቲ ሳምባታ ጋላስ ቃፃሪያባ ጊዲኮ፣ ታኒ ኢሲ አሳ ኩሜላ አሳቴላ ፓሊዳ ጊሾ ታራ አይሰ ካጨቲ?

24 ቱማ ፐርዳ ፐርዲቲፔ አቲን አሳ ሶምዎ ቤዒዲ ፐርዶፊቲ» ያጊሰ።

ዩሱሲ፣ ኢ ኪሪሰቶሴ?

25 ዬሩሳላሜ አሳፔ ኢሶቲ ኢሶቲ፣ «ኤንቲ ዎቆናው ኮያ ኡሪይ ሃይሳ ጊዴኔ?

26 ሄኮ፣ ኢ ቆንጨን ኦዴሰ፤ ኤንቲ ኢያ አይኮካ ጎኮና። ኢ ኪሪሰቶሳ ጊዴይሳ አይሁዳ ሃላቃቲ ቱማ ኤሪዶናሻ?

27 ኪሪሰቶሲ ያ ዎዴ ኢ ኣጣፎ ያኮ ኦኒካ ኤሬሪ፣ ሺን ኢ ኣጣፎ ዩዳኮ ኑ ኤሮሰ» ያጊደሶና።

28 ዩሱሲ ያሳ ከላን ታማርሲሼ ባ ቃላ ጶቁ ኦሊዲ፣ «ቱማ ሂንቴ ታኒ ኦኒኮኔ ታ ኣጣፎ ዩዳኮ ኤሬሪ? ታኒ ታ ማታን ያቢኬ፣ ሺን ታና ከቲዳይሲ ቱማንቸ፣ ሂንቴ ኢያ ኤሬኬታ።

29 ሺን ታኒ ኢ ከቲን ኢያ ማታፎ ዩዳ ጊሾ ኢያ ኤሬይሰ» ያጊሰ።

30 ሄሳ ጊሾ፣ ኤንቲ ኢያ ኦይካናው ኮዩደሶና። ሺን ኢያ ዎዴይ ቡሮ ጋኪቦና ጊሾ ኦኒካ ኢያ ቦላ ኩሼ ዎሊቤና።

31 ሺን ዳሮ ኣሳይ ዩሱሳ ኣማኒዲ፣ «ኪሪሰቶሲ ያ ዎዴ ሃ ኡራይ ኦሊዳ ማላታታፎ ዳሪያ ማላታ ኦላኔዬ?» ያጊደሶና።

ዩሱሳ ኦይካናው ዎታዳሬቲ ከቲቲደሶና

32 ፋሪሳዌቲ ዳሮ ኣሳይ ዩሱሳ ባ ካልካሼይሳ ሲዒደሶና። ካሂኔ ሃላቃቲኔ ፋሪሳዌቲ ኢያ ኦይሊዲ ቃሺሳናው ያሳ ከሌ ናጌይሳታ ከቲደሶና።

33 ዩሱሲ፣ «ታኒ ሂንቴራ ጉላ ዎዴ ጋምዳና፣ ሄሳፌ ጉዬ ታና ከቲዳይሳኮ ባና።

34 ሂንቴ ታና ኮያና፣ ሺን ዴማኬታ። ታኒ ዴዒያሱዎ ሂንቴ ያናው ዳንዳዔኬታ» ያጊሰ።

35 ኣይሁዴቲ ኢሶይ ኢሱዋራ፣ «ሃይሲ ኑኒ ዴምናሶ ኣው ባና ሃኒ? ጊሪኬ ካታማን ዴዒያ ኣይሁዴታኮ ቢዲ ጊሪኬታ ታማርሳናው ሃኒዬ?

36 «ሂንቴ ታና ኮያና፣ ሺን ዴማኬታ» ቃሲ፣ «ታኒ ዴዒያሱዎ ሂንቴ ያናው ዳንዳዔኬታ» ጉሳይ ኣይ ጉሰ?» ያጊደሶና።

ዴዎ ሃላ

37 ባሊያ ቦንቹያ ጋላሳታፎ ዎልቃማኔ ወርሴላ ጋላሳን ዩሱሲ ዴንዲዲ፣ ባ ቃላ ጶቁ ኦሊዲ፣ «ሳሞቲዳ ኦኒካ ታኮ ዩዲ ኡዮ።

38 ታና ኣማኒያ ኦኒካ ጌሻ ማፃፋይ ጊዳይሳዳ ዴዎ ኢሚያ ፑልቶ ሃላይ ኢያፎ ጎጋና» ያጊሰ።

39 ኢ ሄሳ ጊዳይ ኢያ ኣማኒዳይሳቲ ኤካናው ዴዒያ ጌሻ ኣያናባ። ዩሱሲ ቡሮ ቦንቹቲቦና ጊሾ ሄ ዎዴ ጌሻ ኣያናይ ኢሜቲቤና።

ኣሳ ጊደን ሻኬቴላ ማዴቲሰ

40 ሄ አሳፔ ዳርቲ ኢ ጌይሳ ሲዲዲ፥ «ቱማ ሃይሲ ናቢያ» * ያጊደሶና።

41 ሃራቲ ቃሲ፥ «ሃይሲ ኪሪሰቶሳ» ያጊደሶና።

ሺን ሃራቲ ቃሲ፥ «ኪሪሰቶሲ ጋለላፔ ዋኒዲ ኬዪ?»

42 ጌሻ ማፃፋይ፥ «ኪሪሰቶሲ ዳዊቲ ሹሻፔ ዳዊቲይ ዳዲዳ ቤቴሌማ ካታማፔ ያና» ያጊደሶና።

43 ሄሳ ጊሾ፥ ዬሱሳ ጋሶን አሳይ ባንታ ጊዶን ሻኬቲደሶና።

44 ሄ አሳፔ ኢሶቲ ኢሶቲ ኢያ ኦይካናው ኮዪደሶና፥ ሺን ኦኒካ ኢያ ቦላ ኩሼ ዋሊቤና።

አይሁዳ ሃላቃቲ አማኒቦኮና

45 ያሳ ኬላ ናጌይሳቲ ካሂኔ ሃላቃታኮኔ ፋሪሳዊታኮ ጉዬ ሲሚ ዪን ኤንቲ፥ «አይሰ ኢያ ኤሂቤኬቲ?» ያጊዲ ኦይቺደሶና።

46 ያሳ ኬላ ናጌይሳቲ ኤንታኮ፥ «ሃ አዳይ ኦዴቴይሳላ ኦኒካ ኦዴቴና» ያጊዲ ዛሪደሶና።

47 ፋሪሳዊቲ ዛሪዲ፥ «ኢ ሂንቴናካ ባሌላዴ?»

48 አይሁዳ ሃላቃታፔ ዋይኮ ፋሪሳዊቲፔ ኢያ አማኒዳ አሲ ዳዲ?

49 ሙሴ ሂጊያ ኤርና ሃ አሳይ ቃንጌቲዳባ» ያጊደሶና።

50 ፋሪሳዊታፔ ኢሶይ ቃማ ዬሱሳኮ ቢዳ ኒቆዲሞሲ ኤንታኮ፥

51 «አሲ አሲ ጊያባ ሲያና ዋይኮ ኢ አይ ኦሊዳኮ ኤርና ዳዲሼ ኮይርቲዲ ኢያ ቦላ ፐርዴይሲ ኑ ሂጊያን ዳዲ?» ያጊሰ።

52 ኤንቲ ዛሪዲ፥ «ኦኒካ ቃሲ ጋለላ ቢታ አሴ? ጋለላ ቢታፌ ናቤይ ኬዮናይሳ ጌሻ ማፃፋፔ ፐልጋዳ ዳማ» ያጊደሶና።

8

ላይማቲላን ኦይኬቲዳ ማጫሲው

1 ኢሶይ ኢሶይ አጊዲ ባ ሶ ባ ሶ ቢሰ፥ ሺን ዬሱሲ ሻማሆ ዳሪያ ቦላ ቢሰ።

2 ቃሲ ዋንቲላ ጋለሰ ጉራ ያሳ ኬላ ሲሚሰ። ዳር አሳይ ኢያኮ ዪን ኡቲዲ ኤንታ ታማርሲሰ።

3 ሂጌ አሰታማሬቲኔ ፋሪሳዊቲ ላይማቲሺን ኦይኪዳ አሲ ማጫሲው ኢያኮ ኤሂደሶና። ኤንቲ አሳ ኡባ ሰንላን ኢዮ ኤሲዲ፥

4 «አሰታማሪያው፥ ሃ ማጫሲያ ላይማቲሺን ኑ ኦይኪዳ።

* **7:40** ናቢያ፡ ሃ ቤሳን ናቢያ ጌቲቲዳይ ያና ጊዲ ኤንቲ ናጊያ ናቢያ ቆንጨሲሰ። (የሃ 1:21 ጴላቲ።) **7:42** 2ሳሙ 7:12፤ ሚክ 5:2 **7:50** የሃ 3:1፤ 2

5 ሙሴ ሂይይ ሃኒ ሜላ ማጫሰ ሹቻን ጫዳታ ሃይቃና ሜላ ከቲሰ። ያቲን፣ ኔኒ ዋይጋይ?» ያጊደሶና።

6 ኤንቲ ሄሳ ጊዳይ ዩሱሳ ፓጪዲ ኢያ ሞቲያባ ዳማናሳ። ሺን ዩሱሲ ሆኪዲ ባ ቢራጄን ቢታ ቦላ ፃፊሰ።

7 ኤንቲ ኢያ ዛሪ ዛሪ ኦይቺዲ አጎና ኢዲን፣ ፑዴ ጶቁ ጊዲ፣ «ሂንቲ ጊደን ናጋራ ኦሊቦና አሲ ኮይሮቲዲ ኢዮ ሹቻን ጫዳ» ያጊሰ።

8 ቃሲካ ሆኪዲ ቢታ ቦላ ፃፊሰ።

9 ኤንቲ ሄሳ ሲዲዳ ዋዴ ጪማታፔ ደሚዲ ኢሶይ ኢሶይ ኬዩሼ ወሪደሶና። ዩሱሳ ፃላሊ ሄ ቤሳን ኤቁዳ ማጫሰራ አቲሰ።

10 ኢ ፑዴ ጶቁ ጊዲ ማጫሰኮ፣ «ማጫሰቲ፣ አሳቲ አው ቢደና? ኔ ቦላ ፐርዲዳይ ኦኒካ ባዌ?» ያጊሰ።

11 ማጫሲያ፣ «ጎዳው፣ ኦኒካ ባዌ» ያጋሱ።

ዩሱሲ ዛሪዲ፣ «ታኒካ ኔ ቦላ ፐርዲኬ። ባ፤ ዛራዳ ናጋራ ኦሶፋ» ያጊሰ።

ዩሱሲ አላሚያሰ ፖፖ

12 ቃሲካ ዩሱሲ አሳኮ፣ «ታኒ አላሚያሰ ፖፖ። ታና ካሊያ ኦኒካ ዴፖ አሚያ ፖፐዋ ኤካናፔ አቲን ቆማን ሲሜሬቲና» ያጊዲ ኦዲሰ።

13 ፋሪሳዌቲ፣ «ኔ ኔባ ማርካታሳ፣ ሺን ኔ ማርካቴላይ ቱማ ጊዴና» ያጊደሶና።

14 ዩሱሲ ዛሪዲ፣ «ታኒ ታባ ማርካቲኮካ ታ ማርካቴላይ ቱማ። አይሰ ጊኮ፣ ታኒ አዉፔ ዩዳኮ ቃሲ አው ቢያኮ ኤራይሰ፣ ሺን ሂንቲ ኤሬኬታ።

15 ሂንቲ አሳ ቆፋን ፐርዴታ፤ ታኒ ኢሲ አሳ ቦላካ ፐርዲኬ።

16 ታኒ ፐርዲያባ ጊዲኮካ ታ ፐርዳይ ቱማ። አይሰ ጊኮ፣ ታና ከቲዳ ታ አዋይ ታራ ዴዬሲፔ አቲን ታኒ ታርካ ዴዲኬ።

17 ናሞ- አሳ ማርካቴላ ቱማ ጊዴይሲ ሂንቲ ሂጊያን ፃፊቲሰ።

18 ታኒ ታባ ታ ሁዔን ማርካታይሰ፤ ቃሲ ታና ከቲዳ ታ አዋይካ ታባ ማርካቴሰ» ያጊሰ።

19 ኤንቲ፣ «ኔ አዋይ አዉን ዴዲ?» ያጊዲ ኢያ ኦይቺደሶና።

ዩሱሲ ዛሪዲ፣ «ሂንቲ ታና ዋይኮ ታ አዋ ኤሬኬታ። ታና ኤሪዳባ ጊዲያኮ፣ ሂንቲ ታ አዋካ ኤራናሺን» ያጊሰ።

8:5 ለዌ 20:10፤ ዛሬ 22:22-24 8:12 ማቶ 5:14፤ የሃ 9:5 8:13 የሃ 5:31 8:17 ዛሬ 19:15

20 ዩሱሲ ያሳ ከላን ሙፃታ ሚሺያ ዩጊያ ሳጂኔይ ዳዲያ ቤሳን ሄሳ ታማርሲስ። ኢያ ቃማይ ቡሮ ጋኪቦና ገሾ ኦኒካ ኢያ ኦይኪቤና።

21 ቃሲካ ዩሱሲ ኤንታኮ፣ «ታኒ ባና፤ ሂንቴ ታና ኮያና፣ ሺን ሂንቴ ኦቶቴላ ዳሞና ሂንቴ ናጋራን ሃይቃና። ታኒ ቢያሱዋ ባናው ሂንቴ ዳንዳዔኬታ» ያገሰ።

22 አይሁዴ ሃላቃቱ፣ «ኢ፣ ሳኒ ቢያሱዋ ሂንቴ ባናው ዳንዳዔኬታ» ያገሰ። ኢ ባና ባርካ ዋቋኔዬ?» ያገደሰና።

23 ዩሱሲ ዛሪዲ፣ «ሂንቴ ጋርሳፌ፤ ታኒ ቦላፌ። ሂንቴ ሃ አላሚያፕ፣ ታኒ ሃ አላሚያፕ ገዲኬ።

24 ሂንቴ ኦቶቴላ ዳሞና ሂንቴ ናጋራን ሃይቃና ጋዳ ታኒ ሂንቴው ኦዲዳይ ሄሳሳ። ታኒ ታና ገዴይሳ ሂንቴ አማኖና ኢዲኮ ሂንቴ ኦቶቴላ ዳሞና ሂንቴ ናጋራን ሃይቃና» ያገሰ።

25 ኤንቴ፣ «ኔኒ ኦኒ?» ያገዲ ኦይቸደሰና።

ዩሱሲ ዛሪዲ፣ «ታኒ፣ ኮይሮፕ ሂንቴው ኦዲዳ ታና።

26 ታኒ ሂንቴባ ኦዲዳ ፐርዲያባይ ዳርባይ ዳዔስ። ሺን ታና ከቲዳይሲ ቱማንቸ፤ ቃሲ ታኒ ኢያፕ ሲዲዳይሳ ፃላላ አላሚያስ ኦዳይስ» ያገሰ።

27 ዩሱሲ ባ አዋባ ኦዴይሳ ኤንቴ ኦኬኪቦኮና።

28 ሄሳ ገሾ፣ ዩሱሲ ኤንታኮ፣ «ሂንቴ ኦሳ ናባ ፑዴ ቶቁ ኦሊያ ዋዴ ታኒ ታና ገዴይሳ ሂንቴ ኤራና። ቃሲካ ታኒ ታ ማታን ኦይኮካ ኦላናይሳኔ ታ አዋይ ታና ታማርሲዳይሳ ኦዴይሳ ሂንቴ ኤራና።

29 ታና ከቲዳይሲ ታራ ዳዔስ። ታኒ ኡባ ዋዴ ኢያ ኡፋይሲያባ ኦሊያ ገሾ ኢ ታና ታ ፃላላ ኦጊቤና» ያገሰ።

30 ዩሱሲ ሄሳ ኦዲሺን ሲዲዳ ዳሮ ኦሳይ ኢያ አማኒደሰና።

ናጋራ አይሌቴላፌ ኬሲ

31 ዩሱሲ ባና አማኒዳ ኦሳታኮ፣ «ሂንቴ ታ ቲሚርቲያስ ከቴቲኮ ቱማ ታና ካሌይሳታ።

32 ሂንቴ ቱማ ኤራና፤ ቱማይካ ሂንቴና አይሌቴላፌ ኬሳና» ያገሰ።

33 ኤንቴ ዛሪዲ፣ «ኦኒ ኦብራሃሜ ሸሸ፤ ኦኒ ኦዴሰካ አይሌቴሰኮ። ኔኒ ዋይጋዳ፣ ሳኒቴ አይሌቴላፌ ኬያና» ጋይ?» ያገደሰና።

34 ዩሱሲ ዛሪዲ፣ «ታኒ ሂንቴው ቱማ ኦዳይስ፤ ናጋራ ኦሊያ ኦኒካ ናጋራ አይሌ።

35 አይሌይ ሜሪናው ሶ አሳራ ዳና፣ ሺን ናዓይ ሜሪናው ሶ አሳራ ዳዔስ።

36 ናዓይ ሂንቴና አይሌቴላፊ ኬሲኮ ሂንቴ አይሌቴላፊ ቱማ ኬያና።

37 ሂንቴ አብራሃሜ ሸሸ ገዴይሳ ታኒ ኤራይስ። ሸን ታ ቃላይ ሂንቴ ዋዛናን ባይና ጊሾ ታና ዋቆናው ኮዬታ።

38 ታኒ ታ አዋይ ታና ቤሲዳይሳ ኦዳይስ፣ ሸን ሂንቴካ ሂንቴ አዋፔ ሲዒዳይሳ ኦፊታ» ያገሰ።

39 ኤንቲ ዛሪዲ፣ «ኮ አዋይ አብራሃሜ» ያገደሶና።

ዩሱሲ ኤንታኮ፣ «ሂንቴ አብራሃሜ ናይታ ገዲያኮ ኢ ኦፊዳይሳ ኦላና።

40 ሸን ያሳፊ ሲዒዳ ቱማ ኦዲዳ ታና ሂንቴ ዋቆናው ኮዬታ። አብራሃሜይ ሂሳዳ ኦፊቤና።

41 ሂንቴ፣ ሂንቴ አዋይ ኦፊዳይሳ ኦፊታ» ያገሰ።

ኤንቲ ዛሪዲ፣ «ኮኒ ቱማ ያሳ ናይታ፤ ኮሰ ኢሲ አዋይ ያሳ ፃላሊ ዳዔስ» ያገደሶና።

42 ዩሱሲ ኤንታኮ፣ «ያሳይ ቱማ ሂንቴ አዋ ገዲያኮ ሂንቴ ታና ደሳና፤ አይስ ገኮ፣ ታኒ ያሳ ማታፔ ያዳ ሃይሳን ዳዓይስ። ታና ኢ ከቲሰፔ ኦቲን ታኒ ታ ማታን ያቢኬ።

43 ታኒ ገይሳ ሂንቴ ሲዳናው ኮዮና ጊሾ ታ ገያባይ ሂንቴው ጌሌና።

44 ሂንቴ፣ ሂንቴ አዋ ፃላሂ ናይታ። ቃሲ ሂንቴ፣ ሂንቴ አዋይ አሞቲያባ ኦላናው ኮዬታ። ኢ ኮይርፔ ዶሚዲ ሸምፖ ዋጄይሳ። ቱሚ ኢያን ባይና ጊሾ ኢ ቱማ ኢፃስ። ዋርዶይ ኢያው ሜቶ ገዲዳ ጊሾኔ ኢ ዋርዶ አዋ ገዲያ ጊሾ ዋርዶ ኦዴቲሽ ባፔ ኦዴቲስ።

45 ታኒ ቱማ ሃሳያይስ፣ ሸን ሂንቴ ታና አማኔኬታ።

46 ሂንቴፊ፣ «ኮኒ ናጋራ ኦፊሸን ታ ቤዓስ) ጋናው ዳንዳዔይ ኦኔ? ታኒ ቱማ ኦዴቲያባ ገዲኮ ታና አይስ አማኔኬታ?

47 ያሳ አሲ ያሳይ ገያባ ሲዔስ። ሂንቴ ያሳ አሲ ገደና ጊሾ ያሳይ ገያባ ሲዔኬታ» ያገሰ።

ዩሱሲ አብራሃሜፔ ሲንፊ

48 አይሁዴቲ ዛሪዲ፣ « ኮኒ ሳማሬ አሲ፤ ኮናን ቱና አያናይ ዳዔስ) ጊሽ ሊኬ ገደኮ?» ያገደሶና።

49 ዩሱሲ ኤንታኮ «ታ ቦላ ቱና አያኒ ባዋ። ታኒ ታ አዋ ቦንቻይስ፣ ሸን ሂንቴ ታና ካዉሼታ።

50 ታኒ ታ ሁዔ ቦንቾ ኮዪኬ፤ ታኒ ቦንቾታና ማላ ኮዪይሲኔ ታው ፐርዴይሲ ዴዔስ።

51 ታኒ ሂንቴው ቱማ ኦዲይስ፤ ታ ቃላ ናጊያ ኦኒካ ሃይቄና» ያጊሰ።

52 አይሁዳቲ ዛሪዲ፥ «ኔ ቦላ ቱና አያናይ ዴዔይሳ ኦኒ ሃዒ ኤሪዲ። አብራሃማይ ሃይቄስ፤ ናቤቲካ ሃይቄዶሶና። ሺን ኔኒ፥ ታ ቃላ ናጊያ ኦኒካ ሃይቄና» ያጋሳ።

53 ኔኒ ሃይቄዳ ኑ አዋ አብራሃማፔ አጳዬ? ናቤቲካ ቃሲ ሃይቄዶሶና። ኔኒ ኔና ኦና ጋዳ ቆፓይ?» ያጊደሶና።

54 ዬሱሲ፥ «ታኒ ታና ቦንቾኮ ታ ቦንቾይ ሃዳ። ሂንቴ፥ ሉ ያሳ) ጊያ ታ አዋይ ኢ ታና ቦንቾስ።

55 ሂንቴ ኢያ ኤሮና ኢዲኮ ታኒ ኢያ ኤሪይስ። ታኒ ኢያ ኤሪኬ ጊኮ ሂንቴ ማላ ዋርዶታይስ። ሺን ታኒ ኢያ ኤሪይስ፤ ቃሲ ኢያ ቃላካ ናጋይስ።

56 ሂንቴ አዋይ አብራሃማይ ታ ዩሳ ጋላሳ ቤዒዲ ኡፋይታናው አሞቲስ፤ ቤዒዲካ ኡፋይቲስ» ያጊሰ።

57 አይሁዳቲ ዛሪዲ፥ «ሃሪ አቶሺን፥ ኔው ኢሻታው ላይሊ ኩሚቤናሺን ዋናዳ አብራሃማ ቤዒስ ጋይ?» ያጊደሶና።

58 ዬሱሲ ኤንታኮ፥ «ታኒ ሂንቴው ቱማ ኦዲይስ፤ አብራሃማይ ዬሌታናፔ ካሴ ታኒ ታና » ያጊሰ።

59 ሂሳ ጊሾ፥ ኤንቲ ዬሱሳ ጫዳናው ሹቺ ኤኪዶሶና። ሺን ዬሱሲ ኤንታፊ ጌሚዲ ያሳ ኬላፊ ኬዪዲ ቢስ።

9

ዮሱሲ ቆቄ ጊዲዲ ዬሌቲዳ አዲያ ፓሊስ

1 ዮሱሲ ቢሼ ዬሌቶሳፔ ቆቄ ጊዲዲ ዴዒያ ኢሲ አዲያ ቤዒስ።

2 ኢያ ታማራቲ፥ «አስታማሪያው፥ ሃ አዳይ ቆቄ ጊዲዲ ዬሌታና ማላ ናጋራ ኦሊዲይ ኦኔ? ኢ ኦሊዴዬ ዋይኮ ኢያ ዬሊዲይሳቲ ኦሊዶና?» ያጊዲ ኦይቺደሶና።

3 ዮሱሲ፥ «ያሳ ኦሶይ ኢያ ቦላ ቆንጫና ማላፔ አቲን ኢ ዋይኮ ኢያ ዬሊዲይሳቲ ናጋራ ኦሊዲ ጊሾ ጊዳና።

4 ሳዒ ጋላስ ዴዒሺን ታና ኪቲዲይሳ ኦሶዋ ኑ ኦላናው ቤሴስ። ኦኒካ ኦላናው ዳንዲያና ቃማይ ዬስ።

5 ታኒ አላሚያን ዴዒሼ አላሚያስ ፖ» ያጊሰ።

9:5 ማቶ 5:14፤ የሃ 8:12

6 ዩሱሲ ሄሳ ገዲ ሳዓን ጩቲሰ። ባ ጩቻን ጉላ ቢታ ላኮሊዲ ሄ ኡርቃን ቆቄ አዲያ አይፊያ ቲዩሰ።

7 ያቲዲ፣ «ባዳ ሳሊሆሜ (ሳሊሆሜ ጉሳይ ከቲቲዳይሳ ጉሱ) ገያ ቲቄቲዳ ሃላን ኔ አይፊያ ሜጩታ» ያገሰ። ሄሳ ገሾ፣ አዳይ ቢዲ ባ አይፊያ ሜጩቲዲ ያሊሾ ሲሚሰ።

8 አዲያ ሾርቲኔ አዳይ ካሴ ዎሲሺን ቤዲዳ አሳይ፣ «ሃይሲ ኡቲዲ ዎሲያ አዲያ ገዴኔዬ?» ያገደሰና።

9 ኢሲ ኢሲ አሳይ፣ «ሃይሲ ኢያ» ያገደሰና። ሃራቲ ቃሲ፣ «አካይ፣ ሃይሲ ኢያ ዳኔሲፔ አቲን ኢያ ገዴና» ያገደሰና።

ሺን አዳይ፣ «ኤ፣ ታና» ያገሰ።

10 ኤንቲ ኢያኮ፣ «ያቲን ኔ አይፊይ ዎኒዲ ያሊዴ?» ያገዲ ኦይቸደሰና።

11 ኢ ዛሪዲ፣ «ዩሱሳ ገያ አዳይ ጉላ ኡርቃ ላኮሊዲ ታ አይፊያ ቲዩዲ፣ ሳሊሆሜ ባዳ ኔ አይፊያ ሜጩታ» ያገሰ። ታኒ ባዳ ሜጩታዳ ያላ አጋሰ» ያገሰ።

12 ኤንቲ ኢያኮ፣ «ኢ አገን ዴዲ?» ያገዲ ኦይቸደሰና።

አዳይ፣ «ታኒ ኤሪኬ» ያገሰ።

ፋሪሳዊቲ ሃኒደባ ኤራናው ኮዩደሰና

13 ኤንቲ ካሴ ቆቄ፣ ሺን ሃዲ ያሊዳ አዲያ ፋሪሳዊታኮ ኤፊደሰና።

14 ዩሱሲ ኡርቃ ላኮሊዲ አዲያ አይፊያ ፓሊዳ ጋላሳይ ሳምባታ ጋላሰ።

15 ሄሳ ገሾ፣ አዳይ ዎኒዲ ያሊዳኮ ፋሪሳዊቲ ኢያ ዛሪ ኦይቸደሰና። አዳይ ኤንታኮ፣ «ኢ ታ አይፊያን ጉላ ኡርቃ ቲዩሰ። ታ አይፊያ ሜጩታዳ ሃዲ ያላይሰ» ያገሰ።

16 ፋሪሳዊታፔ ኢሶቲ ኢሶቲ፣ «ሃይሳ ኦሊዳ አዳይ ሳምባታ ሂገያ ናኅና ገሾ ያሳ ማታፔ ዩቤና» ያገደሰና።

ሺን ሃራቲ፣ «ናጋራንቸ አሲ ሃይሳ ሜላ ማላታ ዋቲ ኦላናው ዳንዳዲ?» ያገዲ ባንታ ገደን ሻኬቲደሰና።

17 ሄሳ ገሾ፣ ፋሪሳዊቲ አዲያኮ፣ «ኢ ኔ አይፊያ ያሊሲዳ ገሾ ኔ ኢያባ ዎይጋይ?» ያገደሰና።

አዳይ፣ «ኢ ናቤ» ያገሰ።

18 አይሁዴ ሃላቃቲ፣ ኢያ አዩጩ አዎ ያገዲ ኦይቸና ጋካናው፣ አዳይ ካሴ ቆቄ ገዲዳይሳኔ ሃዲ ኢ ያሌይሳ አማኒቦኮና።

19 ኤንቲ ኢያ አዩዉኔ ኢያ አዋኮ፡ «ሂንቲ ቆቄ ጊዲዲ ዩሉተሰን ጊያ ሂንቲ ናዓይ ሃይሴ? ያተን፡ ሃዒ ዋኒዲ ያሊዴ?» ያጊዲ ኦይቸደሶና።

20 ኢያ ዩሊዲይሳተ፡ «ሃይሴ ኮ ናዓ ጊዲዲይሳኔ ቆቄ ጊዲዲ ኢ ዩሉተዲይሳ ኮ ኤርሰ።

21 ሺን ሃዒ ኢ ዋኒዲ ያሊዲዮ ቃሲ ኢያ ኣይፊያ ኦኒ ፓሊዲኮ ኮኒ ኤርኮ። ኢያ ኦይቸቲ። ኢ ዓና ኤሪዳ ኣሲ ጊዲያ ጊሾ ዓባ ኦዳናው ዳንዳዔሰን» ያጊደሶና።

22 ኢያ ዩሊዲይሳተ ሄሳ ጊዲይ ኣይሁዴታሰ ያዩዳ ጊሾሳ። ኣይሰ ጊኮ፡ ኣይሁዴቲ፡ ዩሱሲ ኢ ኪሪሰቶሳ ያጊዲ ማርካቲያ ኣሲ ዴዒኮ ሄ ኡራ ኣይሁዴ ዋሳ ከላፊ ሂላናው ኮይርቲዲ ዘሪ ቃቸደሶና።

23 ኢያ ዩሊዲይሳተ፡ «ኢ ዓና ኤሪዳ ኣሲ፤ ኢያ ኦይቸቲ» ያጊዲይ ሄሳሳ።

24 ሄሳ ጊሾ፡ ቆቄ ጊዲዲ ዩሉተዳ ኣዲያ ኤንቲ ዛሪ ያጊዲ፡ «ቱማ ኦዳናው ያሳን ጫቃ፤ ሃ ኣዴይ ናጋራንቸ ጊዴይሳ ኮ ኤርሰ» ያጊደሶና።

25 ኣዴይ ዛሪዲ፡ «ኢ ናጋራንቸ ጊዲን፡ ጊደና ኢዳን ታ ኤሪኬ። ታኒ ቆቄ ጊዴይሳኔ ሃዒ ያሊይሳ ሄ ኢሲባ ኤራይሰን» ያጊሰ።

26 ኤንቲ ዛሪዲ፡ «ኢ ኔው ኣይ ኦሊዴ? ኢ ኔ ኣይፊያ ዋቲ ፓሊዴ?» ያጊደሶና።

27 ኢ ኤንታኮ፡ «ታኒ ሂንቲው ኦዳሰ፡ ሺን ሲዒቤኬታ። ኣይሰ ዛሪ ሲዓናው ኮይቲ? ሂንቲካ ኢያ ታማሪ ጊዳናው ኮይቲዬ?» ያጊሰ።

28 ኤንቲ ኢያ ጫዩዲ፡ «ኔ ሄ ኡራ ታማሪ ጊዳ፤ ኮኒ ሙሴ ታማሪ።

29 ያሳይ ሙሴሰ ኦዲዲይሳ ኮኒ ኤርሰ፡ ሺን ሃ ኡራይ ኢ ኣዉፔ ዩዳኮካ ኮ ኤርኮ» ያጊደሶና።

30 ኣዴይ ኤንታኮ፡ «ኢ ኣዉፔ ዩዳኮ ሂንቲ ኤርናይሲ ማላሊሲያባ፡ ሺን ኢ ታ ኣይፊያ ፓሊሰ።

31 ያሳ ሶንቸይሳኔ ኢ ኮያባ ኦሊያ ኡራ ያሳይ ሲዒሲፔ ኣቲን ናጋራንቸታ ሲዒና።

32 ሳሎይ ሳዒ ማዴቶሳፔ ቆቄ ጊዲዲ ዩሉተዳ ኣሳ ኣይፊ ፓሊዲይ ኦኒካ ባዋ።

33 ሃ ኣዴይ ያሳፊ ኪቲቲሶናባ ጊዲያኮ ኢሲባካ ኦላናው ዳንዳዔና» ያጊሰ።

34 ኤንቲ ዛሪዲ፣ «ኔኒ ናጋራን ዩሌታዳ ዲጨዳይሲ ኑና ታማርሳናው ኮያይ?» ያገደሱና። ኢያ ኣይሁዴ ዋሳ ኬላፊ ሂሊደሱና።

ዋዛና ቆቄቴሳ

35 ዩሱሲ ኤንቲ ኣዲያ ኬሲዳይሳ ሲዒዳ ዋዴ ኢያ ዴሚዲ፣ «ኣሳ ናዓ ኣማናይ?» ያገደዲ ኦይቸሱ።

36 ኣዳይ ዩሱሳኮ፣ «ኅዳው፣ ታኒ ኢያ ኣማናና ማላ ኢ ኦኔ? ታው ኦዳርኪ?» ያገሰ።

37 ዩሱሲ ኣዲያኮ፣ «ኔኒ ኢያ ቤዓዳሳ፤ ሃ ኔራ ኦዴቴይሲ ኢያ» ያገሰ።

38 ኣዳይ ዛሪዲ፣ «ኅዳው፣ ኣማናይሰ» ያገደዲ ዩሱሳሰ ሳይኒሰ።

39 ዩሱሲ፣ «ቆቄቴ ጭላና ማላኔ ጭይሳቴ ቆቃና ማላ ታኒ ፐርዳናው ሃ ኣላሚያ ያሰ» ያገሰ።

40 ኢያራ ዴዒያ ጉላ ፋሪሳዌቴ ሄሳ ሲዒዲ፣ «ኑ ቆቄዬ?» ያገደዲ ኦይቸደሱና።

41 ዩሱሲ፣ «ሂንቴ ቆቄ ገዲያኮ ሂንቴው ናጋራ ገዴና። ሺን ሃሲ ሂንቴ ጃሎሰ ገያ ገሾ ሂንቴ፣ ሂንቴ ናጋራን ዴዒታ» ያገሰ።

10

ዩሱሲ ሎያ ሂንሳንቸ

1 ዩሱሲ፣ «ታኒ ሂንቴው ቱማ ኦዳይሰ፤ ደርሳ ገርቤ ገዶ ፔንጌራ ገደና ሃራሶራ ጌሊያ ኦኒካ ካይሶኔ ፓንጋ።

2 ሺን ፔንጌራ ጌሊይሲ ደርሳታ ሄማይሳ።

3 ፔንገያ ናጌይሲ ኢያው ፔንገያ ዶዬሰ፤ ደርሳቴካ ኢያ ቃላ ሲያሶና። ኢ ባ ደርሳታ ኤንታ ሱንሳን ሱንሳን ጃጌሰ፤ ኤንታ ካሌሊዲ ካሬ ኬሴሰ።

4 ኢ ባይሳታ ካሬ ኬሲዳፔ ጉዬ ኤንታ ሲንሳን ሃሙቴሰ። ኤንቲ ኢያ ቃላ ኤሪያ ገሾ ኢያ ካሎሶና።

5 ሃራ ኡራ ቃላ ኤንቲ ኤሮና ገሾ ኢያፔ ባቃቶሶናፔ ኣቴን ኢያ ጌዶ ካሎኮና» ያገሰ።

6 ዩሱሲ ኤንታው ሃ ለሚሱዋ ኦዲሰ፣ ሺን ኢ ኣይ ገዳኮ ኤንቲ ኣኬኪሶኮና።

7 ዛሪዲ ዩሱሲ ኤንታኮ፣ «ታኒ ሂንቴው ቱማ ኦዳይሰ፤ ታኒ ደርሳታሰ ፔንጌ።

8 ታፔ ሲንጭ ዩዳ ኡባይ ካይሶኔ ፓንጋ፣ ሺን ደርሳቴ ኤንታ ሲዒሶኮና።

9 ፔንጌይ ታና፤ ታ ባጋራ ጌሊያ ኦኒካ አታና። ኢ ታ ባጋራ ጌላናኔ ኬያና፤ ሎዎ ሄሜቲያ ቤሲ ዳማና።

10 ካይሶይ ካይሶታናው፣ ሹካናዉኔ ጳይሳናው ዩሲፔ አቲን ሃራባሰ ዩና። ታኒ ኤንታው ዴይይ ዳና ማላኔ ኩሚዲ ፓላሃና ማላ ያሰ።

11 «ታኒ ሎዎ ሄንፋንቸ፤ ሎዎ ሄንፋንቸይ ባ ደርሳታ ጊሾ ባ ሼምፑዋ አላ ኢሜሰ።

12 ኬራ ሄሚያ አሲ ደርሳታ ጎዳኔ ሄንፋንቸ ጊደና ጊሾ ሱጵሜይ ያ ዎዴ ቤዒዲ ደርሳታ አጌዲ ቤሰ። ሄሳ ጊሾ፣ ሱጵሜይ ደርሳታ ኦይኪዲ ላሌሰ።

13 ኬራ ሄሜይሲ ሚሼሰ ሄሚያ ጊሾኔ ደርሳታባይ ኢያ ቆፊሶና ጊሾ ደርሳታ አጌዲ ባቃቴሰ።

14-15 «ታኒ ሎዎ ሄንፋንቸ። ታ አዋይ ታና ኤሬይሳዳ ታኒካ ታ አዋ ኤራይሰ። ሄሳዳካ፣ ታኒ ታ ደርሳታ ኤራይሰ፤ ታ ደርሳቲካ ታና ኤርሶና። ታኒ ታ ደርሳታ ጊሾ ታ ሼምፑዋ አላ ኢማይሰ።

16 ሃ ዉዲያን ባይና ሃራ ደርሳቲ ታው ዴዎሶና። ታኒ ኤንታካ ኤሃናው ቤሴሰ። ኤንቲ ታ ቃላ ሲዓና፤ ኤንቲ ኢሲ ዉዴ ጊዳና፤ ሄንፋንቸይካ ኢሱዋ።

17 «ታኒ ታ ሼምፑዋ አላ ኢማዳ ዛራ ኤኪያ ጊሾ ታ አዋይ ታና ደሴሰ።

18 ታ ደሳዳ ታ ሼምፑዋ አላ ኢማይሲፔ አቲን ታፔ ኦኒካ ኤኬና። ታ ታ ሼምፑዋ አላ ኢማናዉኔ ዛራ ኤካናው ማቲ ታው ዴዔሰ። ታኒ ኦላና ማላ ታ አዋይ ታና ከቲዳይሲ ሃይሳ» ያጌሰ።

19 ሄሳ ኢ ጊዳ ጊሾ አይሁዴታ ጊደን ቃሲካ ሻኬቴላ ማጴቲሰ።

20 ኤንታፊ ዳሪያ ባጋይ፣ «ኢያን ቱና አያኒ ዴዔሰ! ኢ ጎዬሰ! ኢ ጊያባ አይሰ ሲዔቲ?» ያጌደሶና።

21 ሃራቲ ቃሲ፣ «ፃላሄይ ኦይኪዳ አሲ ሃይሳዳ ኦዴቴና። ቱና አያኒ ቆቆ አይፌ ጸሊሳናው ዳንዳዒዬ?» ያጌደሶና።

ዩሱሲ አሳ ናዓ

22 ዩሩሳላሚን ያሳ ኬላ አንጂሲዳ ጋላሳታ ቦንቺያ ባሌይ ጋኪሰ፤ ሄ ዎዴ ሳዒ ባልጎ።

23 ዩሱሲ ያሳ ኬላን ሶሎሞኔ ባራንዳን ሲሜሬቴሰ።

24 አይሁዳይቲ ዩሱሳ የሾን ሸቂ ኤቁዲ፥ «ኔኒ ኑና አዉዴ ጋካናው ሲጴራ ዋላኔ? ኔኒ ከሪሰቶሳ ጊዲኮ እኔ ኑሰ ጌሻዳ ኦዳ» ያጊደሶና።

25 ዩሱሲ ዛሪዲ ኤንታኮ፥ «ታኒ ሂንቴው ኦዳሰ፤ ሸን ታና አማኔኬታ። ታኒ ታ አዋይ ታው ኢሚዳ ማታን ኦሊያ ኦሶይ ታባ ማርካቲሰ።

26 ሸን ታኒ ሂንቴው ኦዲዳይሳዳ ሂንቴ ታ ደርሴ ጊደና ጊሾ አማኔኬታ።

27 ታ ደርሳቲ ታ ቃላ ሲዖሶና። ታኒ ኤንታ ኤሪይሰ፤ ኤንቲካ ታና ካሎሶና።

28 ታኒ ኤንታው ማሪና ዴዑዋ አማይሰ፤ ኤንቲ ኡባራካ ጳዮኮና። ኦኒካ ታ ኩሼፔ ኤንታ ቦንቂ ኤካናው ዳንዳዔና።

29 ኤንታ ታው አሚዳ ታ አዋይ ኡባፌ አጴሰ * ኦኒካ ታ አዋ ኩሼፔ ኤንታ ቦንቂ ኤካናው ዳንዳዔና።

30 ታኔ ታ አዋይ ኢሰና» ያጊሰ።

31 አይሁዳይቲ ዩሱሳ ጫዳናው ቃሲካ ሹቺ ዴንሊደሶና።

32 ዩሱሲ ኤንታኮ፥ «ታኒ ኦላና ማላ ታ አዋይ ታው አሚዳ ዳር ሎዖ ኦሶታ ሂንቴና ኦላ ቤሳሰ። ሄሳታፔ አዉሳ ጊሾ ታና ሹቻን ጫዳናው ኮዬቲ?» ያጊሰ።

33 አይሁዳይቲ ዛሪዲ፥ «ኑኒ ኔና ኔ ሎዖ ኦሶ ጊሾ ሹቻን ጫዳናው ኮዮኮ። ሸን ኔኒ ዖሳ ጫያ ጊሾኔ ኦሴ ጊዳሼ ኔ ኔና ዖሴ ጊያ ጊሾሳ» ያጊደሶና።

34 ዩሱሲ ዛሪዲ፥ «ጌሻ ማፃፋን ዖሳይ፥ ሂንቴ ዖሳታ ጊዳይሲ ፃፌቲቤኔ?

35 ጌሻ ማፃፋይ ማሪናው ላማቴና። ዖሳይ ባ ቃላ አሚዳ አሳታ፥ ሆሳታ፥ ጊዲ ያጊኮ።

36 አዋይ ደሪዲ ሃ አላሚያ ከቲዳ ታና ዖሳ ናዓ ዋቲዲ ሆሳ ጫያሳ) ያጌቲ?

37 ታኒ ታ አዋይ ኦሌይሳ ኦላና ኢዲኮ ታና አማኖፒቴ።

38 ሸን ታኒ ኦሊያባ ጊዲኮ ሂንቴ ታና አማኖና ኢዲኮካ፥ ታ አዋይ ታናን ዴዔይሳኔ ታካ ታ አዋን ዴዔይሳ ሂንቴ ኤራና ማላ ታ ኦሶዋ አማኒቴ» ያጊሰ።

39 ቃሲካ ኤንቲ ኢያ ኦይካናው ኮዪደሶና፥ ሸን ኢ ኤንታፌ ኬሲ ኤኪሰ።

* 10:29 ታ አዋይ ኡባፌ አጴሰ፡ ኢሲ ኢሲ ቤኒ ማፃፋቲ፥ «ታ አዋይ ታው አሚዳ ኤንቲ ኡባፌ አጴሶና» ያጎሶና። 10:33 ሉዌ 24:16 10:34 ማዝ 82:6

40 ዮሀንሲ ካሴ ፃመቂያ ቤሳ፣ ዮርዳኖሴ ሻፋፔ ሄፊንሉ ዬሱሲ ፒኒዲ ያን ዳዒስ።

41 ዳሮ አሳይ ዬሱሳኮ ዪዲ፣ «ዮሀንሲ ማላታ ኦሌቤና፣ ሺን ኢ ሃ አዲያባ ኦዲዳባይ ኡባይ ቱማ» ያጊደሶና።

42 ያን ዳሮ አሳይ ዬሱሳ አማኒደሶና።

11

አላዛሪ ሃይቁዋ

1 ቢታኒያ ጉታን አላዛሪ ጊያ ኢሲ አዴይ ሃርጌቲስ። ቢታኔይ ማይራማኔ ኢ ሚቹያ ማርታ ዳዒያ ጉታ።

2 ማይራማ ጎዳ ቶሁዋ ሺቶ ቲያዳ ባ ቢናናን ኢያ ቶሁዋ ቁቹዳሮ። ሃርጌቲዳይ ኢ ኢሻ አላዛሪ።

3 ሄሳ ጊሾ፣ ሚቹቲ፣ «ጎዳው፣ ኔ ደሴይሲ ሃርጌቲስ» ጊዲ ዬሱሳኮ ከቲደሶና።

4 ዬሱሲ ሄሳ ሲዒዳ ዎዴ «ሃ ሃርጌይ፣ ያሳይኔ ኢያ ናዓይ ቦንቹታና ማላፔ አቲን ሃይቆስ ጋሊያ ሃርጌ ጊዳና» ያጊስ።

5 ዬሱሲ ማርታ፣ ኢ ሚቹዉኔ አላዛሪ ደሴስ።

6 ሺን አላዛሪ ሃርጊዳይሳ ዬሱሲ ሲዒዲ ባ ዳዒያ ቤሳን ናምዑ ጋላስ ጋምዒስ።

7 ሄሳፊ ጉዬ፣ ዬሱሲ ባ ታማሪታኮ፣ «ዛሪዲ ዪሁዳ ቢታ ቦስ» ያጊስ።

8 ኢያ ታማሪቲ ዛሪዲ፣ «አስታማሪያው፣ ጉላ ዎዴፔ ካሴ አይሁዳቲ ኔና ሹቻን ጫዲዲ ዎቆናው ኮዪደሶና፤ ሃዒካ ያ ባኔ?» ያጊደሶና።

9 ዬሱሲ፣ «ኢሲ ጋላሳን ታማኔ ናምዑ ሳቲይ ዳዒስ ጊዳኔዬ? ጋላስ ሃሙቲያ ኢሲ ሃ አላሚያ ፖዑዋ ቤዒያ ጊሾ ቆቤቲና።

10 ሺን ቃማ ሃሙቲያ ኦኒካ ፖያይ ባይና ጊሾ ቆቤቲስ» ያጊስ።

11 ዬሱሲ ሄሳ ጊዳፔ ጉዬ ኤንታኮ፣ «ኑ ደሴያ አላዛሪ ቋስኪስ፣ ሺን ኢያ ዳንፋናው ታኒ ባና» ያጊስ።

12 ኢያ ታማሪቲ ዛሪዲ፣ «ጎዳው፣ ኢ ቋስኪዳባ ጊዲኮ ኢያው ሎዓና» ያጊደሶና።

13 ዬሱሲ አላዛሪ ሃይቁዳይሳ ኦዲስ፣ ሺን ኤንታው ጮ ቋስኮ ዳኒስ።

14 ሄሳ ጊሾ፣ ዬሱሲ ጌሺዲ ኤንታኮ፣ «አላዛሪ ሃይቁስ።

15 ሂንቴ አማናና ማላ ታኒ ሄ ቤሳን ዴዎናይሳስ ሂንቴ ጊሾ ኡፋይታይስ። ኣኔ ዬቂቴ፤ ኢያኮ ቦስ» ያገሰ።

16 ሄሳፌ ጉዬ፣ ዲዲሞሳ * ጌቴቲያ ቶማሲ ባ ላጌ ታማሬታኮ፣ «ኣስታማሪያራ ሃይቃናው ኑካ ቦስ» ያገሰ።

ዬሱሲ ዴንዶኔ ዴዎ

17 ዬሱሲ ጋኪያ ዎዴ ኣላዛሪ ሞጌቲን ኦይዱ ጋላስ ጊዲስ።

18 ቢታኔይ ዬሩሳላሜፕ ሄቭ ኪሎ ማቲሬ ማላ ሃኬስ።

19 ዳሮ ኣይሁዴቲ ማርታኔ ማይራሞ ኤንታ ኢሻይ ሃይቁዳይሳስ ማንሌላናው ዪዶሶና።

20 ማርታ ዬሱሲ ዪዳይሳ ሲዓዳ ኢያ ሞካናው ኬያሱ፣ ሺን ማይራማ ሶን ኣታሱ።

21 ማርታ ዬሱሳኮ፣ «ጎዳው፣ ኔኒ ሃይሳን ዴዲዳባ ጊዲያኮ ታ ኢሻይ ሃይቁና።

22 ሺን ሃዒ ጊዲኮካ ኔኒ ዎሲያባ ያሳይ ኔው ኢማናይሳ ታኒ ኤራይስ» ያገሰ።

23 ዬሱሲ፣ «ኔ ኢሻይ ሃይቆፕ ዴንዳና» ያገሰ።

24 ማርታ ኢያኮ፣ «ዉርሴላ ጋላስ ኢ ሃይቆፕ ዴንዳናይሳ ኤራይስ» ያገሰ።

25 ዬሱሲ ኢኮ፣ «ታኒ ዴንዶኔ ዴዎ፤ ታና ኣማኒያ ኦኒካ ሃይቁኮካ ዴዎን ዳና።

26 ቃሲ ዴዎን ዴዔይኔ ታና ኣማኒያ ኦኒካ ሃይቁና። ሄሳ ኔኒ ኣማናይ?» ያገሰ።

27 ማርታ ዛራዳ፣ «ጎዳው፣ ኤ ታኒ ኣማናይስ! ኔኒ ያሳ ናዓ፣ ኣላሚያ ያናው ዴዒያ ኪሪስቶሳ ጊዴይሳ ታኒ ኣማናይስ» ያገሰ።

28 ማርታ ሄሳ ጊዳፕ ጉዬ፣ ባዳ ባ ማቺው ጌማን ዪጋዳ፣ «ኣስታማሪይ ዪዲ ኔና ኮዬስ» ያገሰ።

29 ማይራማ ሄሳ ሲዒዳ ዎዴ ኤሌሳ ዴንዳ ኤቃዳ ዬሱሳኮ ባሱ።

30 ሄ ዎዴ ዬሱሲ ማርታራ ጋሂቲዳ ቤሳን ዴዔስ፤ ቡሮ ጉታ ጋኪቤና።

31 ማይራሞ ማንሌሊሽ ኢራ ሶን ዴዒያ ኣይሁዴቲ፣ ኢያ ዴንዳ ኤቃዳ ኤሌሳዳ ካሬ ከዪዳይሳ ቤዒዲ፣ ዴፎ ባዳ ዬካናው ሃኒያ ዳኒን ኢዮ ካሊዲ ከዪዶሶና።

32 ማይራማ ዬሱሲ ዴዒያሱሞ ባዳ ኢያ ቤዒዳ ዎዴ ኢያ ቶሁዎ ቦላ ኩንዳዳ፣ «ጎዳው፣ ኔኒ ሃይሳን ዴዲዳባ ጊዲያኮ ታ ኢሻይ ሃይቁናሺን» ያገሰ።

* 11:16 ዲዲሞሳ፣ ጉሳይ ማንቴ ጉሱ።

33 ዩሱስ ማይራማኔ ኢራ ዳዒያ፣ አይሁዳት ዩኬይሳ በዒዲ፣ ባ ዎዛናን ዳሮ ሴሌቲዲ፣

34 «አውን ሞጊዳት?» ያጊዲ ኦይቸን፣ «ጎዳው፣ ያዳ በዓ» ያጊዲ ዛሪደሶና።

35 ዩሱስ አፋዲሰ።

36 ሄሳ ጊሾ፣ አይሁዳት፣ «ኢ አላዛራ አይ ማላ ደሲያኮ በዒቴ» ያጊደሶና።

37 ሺን ኤንታፊ ኢሶቲ ኢሶቲ፣ «ሃይሲ ቆቂያ ያሊሲዳይሲ ሃ አዳይ ሃይቆና ማላ ኦላናው ዳንዳዔኔሺን?» ያጊደሶና።

ዩሱስ አላዛራ ሃይቆፔ ዳንሊስ

38 ቃሲካ ዩሱስ ሴሌቲዲ፣ አላዛሪ ሞጌቲዳ ዲፋዎ ቢስ። ሄ ዲሮይ ሹቻን ጎርዳቲዳ ጎንጎሎ።

39 ዩሱስ፣ «ሹቻ ዳንሊቴ» ያጊዲ ከቲስ።

ማርታ፣ «ጎዳው፣ ኢ ሃይቆሳፔ ኦይዱ ጋላስ ጊዲዳ ጊሾ ሃዒ ዪንቃና» ያጋሱ።

40 ዩሱስ ማርታኮ፣ «ኔ አማኒያባ ጊዲኮ ያሳ ቦንቹዎ በዓናይሳ ታኒ ኔው ኦዳቢኪና?» ያጊሰ።

41 ኤንቲ ሹቻ ዳንሊን ዩሱስ ሳሎ ፑዴ ያሊዲ፣ «አዎው፣ ታና ኔ ሰዒዳ ጊሾ ኔና ጋላታይስ።

42 ኔ ኡባ ዎዴ ታና ሰዒይሳ ታኒ ኤራይስ። ሺን ሃይሳን ኤቂዳ አሳይ ኔኒ ታና ከቲዳይሳ አማናና ማላ ታኒ ኤንታ ጊሾ ሃይሳ ጋይስ» ያጊሰ።

43 ዩሱስ ሄሳ ጊዳፔ ጉዬ፣ ባ ቃላ ጶቁ ኦሊዲ፣ «አላዛራ፣ ሃ ኬያ!» ያጊሰ።

44 ሃይቂዳ አዳይ ዚዴቲዳ ማላ ኩሼይኔ ቶሆይ ሻሎን ቃሹቲዲ ዳዒሺን ኢያ አይፌ ካሬይ ጎዜቲዳ ማላ ዲፋዎፔ ኬዩስ። ዩሱስ ኤንታ፣ «ቢርሺቴ! ቦ ጌቴ!» ያጊሰ።

ከሪስቶሳ ቦላ ማቂቲደሶና

(ማቶ 26:1-5፤ ማር 14:1-2፤ ሉቃ 22:1-2)

45 ሄሳ ጊሾ፣ ማይራሚኮ ዪዳ አይሁዳታፔ ዳሮቲ ዩሱስ ኦሊዳይሳ በዒዲ ኢያ አማኒደሶና።

46 ሺን ኤንታፊ ኢሶቲ ኢሶቲ ፋሪሳዌታኮ ቢዲ ዩሱስ ኦሊዳይሳ ኤንታው ኦዲደሶና።

47 ሄሳፊ ጉዬ፣ ካሂኔ ሃላቃቲኔ ፋሪሳዌቲ ሻንጉዎ ሺሺዲ፣ «ሃ አዳይ ዳሮ ማላታታ ኦሊያ ጊሾ ኦ አይ ኦሊኖ?»

48 ኑኒ ኢያ ሲዒ ገዲ አገኮ አሳ ኡባይ ኢያ አማናና። ቃሲ ሮሜ ቢታ አሳቲ ዪዲ ኑ ያሳ ኩፋኔ ኑ ዴሪያ ቆይሳና» ያገደሰና።

49 ኤንታፊ ኢሶይ ቃያፋ ጌይሲ፣ ሄ ላይሌ ካሂኔ ሃላቃ ገዲዳይሲ፣ «ሂንቴ አይኮካ ኤሬኬታ!

50 አሳይ ኡባይ ቆይሳናፊ አሳ ኡባ ገሾ ኢሲ አሲ ሃይቄይሲ ሎዖ ገዴይሳ ኤሬኬታ?» ያገሰ።

51 ኢ ሄሳ ባፔ ገቤና። ሸን ሄ ላይሌ ካሂኔ ሃላቃ ገዲያ ገሾ ዩሱሲ አይሁዴ አሳ ገሾ ሃይቃናው ቤሴይሳ ቲንቢቲ ኦዲሰ።

52 ቃሲ ዩሱሲ አይሁዴ አሳ ዓላላሰ ገደናሺን ላሌቲዲ ዴዒያ ያሳ አሳ ኡባ ኢሲፊ ሸሻናዉኔ ኢሲ አሲ ኦፋናው ሃይቃና።

53 ሄ ጋላሳፔ ደሚዲ ኤንቲ ኢያ ዎቆናው ማቄቲደሶና።

54 ሄሳ ገሾ፣ ዩሱሲ አይሁዴታ ገደን ቆንጨን ሲሜሬቲቤና። ሸን ባዞ ቢታ ማታን ዴዒያ ኤፍሬሜ ጉታ ቢሰ። ባ ታማሬታራ ሄ ቤሳን ጋሞዒሰ።

55 አይሁዴቲ ቦንቺያ ፓሲካ ጋላሳይ ማቲሰ። ቃሲ ዳሮ አሳይ ባንታና ጌሻናው ፓሲካ ቦንቺያ ጋላሳይ ጋካናፔ ሲንጮ ሄ ቢታፊ ዩሬሳላሜ ቢደሰና።

56 ኤንቲ ያሳ ኩፋን ኤቄዲ ዩሱሳ ዩሳ ናገያ ገሾ «አይ ቆፔቲ? ዩሱሲ ባሊያ ቦንቻናው ዩኔ?» ያገዲ ኢሶይ ኢሱዎ ኦይቺደሶና።

57 ካሂኔ ሃላቃቲኔ ፋሪሳዌቲ ዩሱሳ አይካናው፣ ኢ ዴዒያሱዎ ኤሪያ ኦኒካ ባንታው ኦዳና ሜላ ኪቲደሶና።

12

ዩሱሳ ሸቶ ቲዩዳ ማጨሲው
(ማቶ 26:6-13፤ ማር 14:3-9)

1 ፓሲካ ቦንቺያ ጋላሳፔ ኡሱፑን ጋላሰ ሲንፋቲዲ፣ ዩሱሲ ሃይቆፔ ዴንጲዳ አላዛሪ ዴዒያ ጉታ፣ ቢታኒያ ቢሰ።

2 ሄ ቤሳን ኤንቲ ኢያው ካሆ ገጊሲደሶና። አላዛሪ ዩሱሳራ ኢሲፊ ጋይታ ቦላ ኡቲዳሺን ማርታ ኤንታና ሞካዉሱ።

3 ማይራማ ናርደሴ ገያ ዳሮ አልዖ ጌሻ ሸቶ ኤሃዳ ዩሱሳ ቶሁዎ ቲያሱ። ባ ቢናናን ኢያ ቶሁዎ ቁቻሱ፤ ኩፋ ኡባይ ሸቶ ሳዎን ቶንጉ ገሰ።

4 ሸን ዩሱሳ ታማሬታፔ ኢሶይ፣ ዩሱሳ አሉ አማናይሲ፣ አሰቆርታ ዪሁዲ፣

12:3 ሉቃ 7:37-38

5 «አይስ ሃ ሺቶይ ሃቸ ጭ ዲናሬን ባይዘቲዲ፡ ሚሼይ ማንቆታስ አሚቴኔ?» ያገሰ።

6 ኢ ካይሶ ጊዲዳ ገሾ ሄሳ ገሲፔ ኣቲን ማንቆታስ ቃዴቲዲ ገቤና። ኢ ሚሼ ካርጂታ ኦይኬይሳ ጊዲያ ገሾ ኡባ ዎዴ ኢያፔ ባው ኤኬስ።

7 ዩሱሲ፡ «ኢያ ባው ዴዲያባ ታ ሞሳ ጋላሳስ ሚንጂዳ ገሾ ኢዮ አጋገቲ።

8 ማንቆቲ ኡባ ዎዴ ሂንቴራ ዳና፡ ሺን ታኒ ኡባ ዎዴ ሂንቴራ ዴዲኬ» ያገሰ።

9 ሄ ዎዴ ዳር ኣሳይ ዩሱሲ ቢታኒያን ዴዲይሳ ሲዲዲ ያ ቢደሶና፡ ኤንቲ ዩሱሳ ፃላላ ገደናሺን ኢ ሃይቆፔ ዴንሊዳ አላዛራካ ቤዓናው ቢደሶና።

10 ሄሳ ገሾ፡ ካሂኔ ሃላቃቲ አላዛራካ ቃሲ ዎጳናው ማቁቲደሶና።

11 አይስ ገኮ፡ አላዛራ ጋሶን ዳር አይሁዴቲ ኤንታና ኢዲዲ ዩሱሳ አማሶሶና።

ዩሱሲ ቦንቸን ዩሩሳሌም ጌሊስ
(ማቶ 21:1-11፤ ማር 11:1-11፤ ሉቃ 19:28-40)

12 ዎንቴላ ጋላስ ፓሲካ ቦንቸያ ቤሳ ዩዳ ዳር ኣሳይ ዩሱሲ ዩሩሳሌም ቤይሳ ሲዲዲ፡

13 ዛምባ ሃይሊ ኤኪዲ ኢያ ሞካናው ኬዪደሶና። ባንታ ቃላ ቶቁ ኦሊዲ፡

«ሆሳና! ያሳይ ጋላቴቶ!

ጎዳ ሱጎላን ዩይሲ አንጄቶ!

ያሳይ ኢስራዴል ካዉዎ አንጀ!»

ያገደሶና።

14-15 ጌሻ ማፃፋን፡

«ጂዮኔ ካታማው፡ ባቦፋ!

ሄኮ፡ ኔ ካዎይ ሃሬ ማራ ቦላ ኡቲዲ ዩስ»

ጌቲቲዳይሳዳ ዩሱሲ ሃሬ ማሪ ዴሚዲ ኢያ ቶገሰ።

16 ዩሱሳ ታማሬቲ ሄሳ ካሴ አኬኪቦኮና። ሺን ዩሱሲ ቦንቸቲዳፔ ጉዬ ኤንቲ ሄሳ ኡባ አኬኪደሶና። ሄሲ ኡባይ ጌሻ ማፃፋይ ገዳይሳዳ ሃኒስ።

17 ዩሱሲ አላዛራ ዲፎፔ ጭዲ፡ ሃይቆፔ ዴንሊዳ ዎዴ ኢያራ ዴዲያ ዳር ኣሳይ ዩሱሳባ ማርካቲደሶና።

18 ዳር አሳይ ኢያ ሞካናው ከዬዳይ፣ ኢ ሄ ማላታታ ኦሊዳይሰሳ ሲዒዳ ገሾሳ።

19 ሄሳ ገሾ፣ ፋሪሳዊቲ ኢሶይ ኢሱዋኮ፣ «ኑ አይኮካ ኦላናው ዳንዳያናይሳ በዒቲ፤ ዳሬ ኡባይ ኢያ ካሌሰ» ያገደሶና።

20 ፓሲካ ቦንቹያ ጋላሰ ጎይናናው ዬሩሳላሜ ቢዳይሳታ ገደን ኢሲ ኢሲ ገሪኬ አሳቲ ዳያሶና።

21 ኤንቲ ጋለላ ቢታን በቴሳይዳ ካታማፔ ዬዳ ፊልጶሳኮ ቢዲ፣ «ጎዳው፣ ኑኒ ዬሱሳ በዓናው ኮኖሰ» ያገደዱ ዋሲደሶና።

22 ፊልጶሲ ቢዲ ኢንዲሪያሳሰ ኦዲን ናምዓይ ቢዲ፣ ዬሱሳሰ ኦዲደሶና።

23 ዬሱሲ ኤንታኮ፣ «አሳ ናዓይ፣ ቦንቹቲያ ዋዴይ ጋኪሰ።

24 ታኒ ሂንቲው ቱማ ኦዲይሰ፤ ኢሲ ገሰቲ አይፊይ ቢታን ዋዲዳ ዋቆና ኢዲኮ ባርካ አቲሰ። ሽን ሄ ገሰቲ አይፊይ ዋቂኮ ዳሮ አይፊ አይፊሰ።

25 ባ ሸምፑዋ ደሲያ ኦኒካ ዳይሴሰ፤ ባ ሸምፑዋ ሃ አላሚያን ኢዲያ ኦኒካ ሜሪና ዳያሰ አሼሰ።

26 ታኒ ዳዲያሱዋን ታራ ዳና ሜላ ታው ኦላናው ኮያ ኦኒካ ታና ካላናው በሴሰ። ታው ኦሊያ ኦናካ ታ አዋይ ቦንቻና።

ዬሱሲ ባ ሃይቁዋባ ሲንላቲዲ ኦዲሰ

27 «ሃሲ ታ ሸምፖይ ዳር ኤንዔቲሰ፤ ያቲን ዋይሳ? ታ አዋው፣ ታና ሃ ሳቴፔ አሻርኪ» ያጎ? አካይ፣ ታኒ ዬዳይ ዋዬ ኤካናሳ።

28 ታ አዋው፣ ኔ ሱንላ ቦንቻ» ያገሰ።

ሄ ዋዴ ሳሎፔ፣ «ታኒ ታ ሱንላ ቦንቻሰ፤ ዛራዳካ ቦንቻና» ያገያ ቃላይ ዬሰ።

29 ሄ በሳን ኤቁዳ ዳር አሳይ ሄ ቃላ ሲዒዲ፣ «ሄሲ ዳዳ» ያገደሶና።

ሃራቲ ቃሲ፣ «ኪታንቾይ ኢያው ኦዲሰ» ያገደሶና።

30 ዬሱሲ ዛራዲ ኤንታኮ፣ «ሃ ቃላይ ሂንቲ ገሾ ዩሲፔ አቲን ታ ገሾ ገደና።

31 ሃ አላሜይ ፐርዴቲያ ዋዴይ ሃሲ፤ ሃ አላሜያ ሃሬይሲ ሃሲ ካሬ ሆሌታና።

32 ቃሲ ታኒ ሳዓፔ ጶቁ ኦሴቲዳ ዋዴ አሳ ኡባ ታኮ ኤሃና» ያገሰ።

12:25 ማቶ 10:39፤ 16:25፤ ማር 8:35፤ ሉቃ 9:24፤ 17:33

33 ኢህሳ ሄሳ ገደይ ኣይ ሜላ ሃይቆ ሃይቃኔኮ ኤንታው ቆንጨሳናሳ።

34 ዳር ኣሳይ ዛሪዲ፡ «ኮ ሂጌይ ኪሪሰቶሲ ሜሪናው ዳዔይሳ ኦዴሰ። ያተን፡ ኔኒ ዋይጋዳ፡ «ኣሳ ናዓይ ቶቁ ጋናው ቤሰሰ) ጋይ? «ኢ፡ ኣሳ ናዓይ ኦኔ?» » ያገደሰና።

35 ዬሱሲ፡ «ፖጆይ ሂንቴራ ጉላ ዋዴ ጋሞዓና። ሂንቴው ቋሞና ሜላ ፖጆይ ዳዒሺን፡ ፖዑዋን ሃሙተቴ። ቋሚን ሃሙተያ ኣሲ ኣው ቢያኮ ኤሬና።

36 ፖጆ ናይታ ገዳና ሜላ ፖጆይ ዳዒሺን ፖዑዋ ኣማኒቴ» ያገሰ።

ኣይሁዳቴ ኣማኒቦኮና

ዬሱሲ ሄሳ ኦዲዳፔ ጉዬ ቢዲ ኤንታፊ ጌሚሰ።

37 ኢህሳ ሜላ ማላታታ ኤንታ ሲንላን ኦሊንካ ኣማኒቦኮና።

38 ናቢያ ኢሳያሲ፡

«ጎዳው፡ ኮ ማርካቴላ ኦኒ ኣማኒዴ?

ጎዳይ ባ ዋልቃ ኦዴሰ ቆንጨሲዴ?»

ገደይሲ ቱማ ገዳና ሜላ ኤንቴ ኢያ ኣማኒቦኮና።

39-40 ቃሲካ ኢሳያሲ፡

«ኤንታ ኣይፊይ ጄሎና ሜላ፡

ኤንታ ዋዛናይ ኣኬኮና ሜላ፡

ኤንቴ ያሳኮ ሰሚን፡ ኢ ኤንታ ፓሶና ሜላ፡

ያሳይ ኤንታ ኣይፊያ ቆቁሲሰ።

ኤንታ ዋዛና ሚንሊሰ»

ገዳ ገሾ ኤንቴ ኣማናናው ዳንዳዒቦኮና።

41 ኢሳያሲ ሄሳ ገደይ፡ ዬሱሳ ቦንቐዋ ቤዒዳ ገሾኔ ኢያባ ኦዲዳ ገሾሳ።

42 ገዲኮካ፡ ኣይሁዳታ ሃላቃታፔካ ዳርቴ ዬሱሳ ኣማኒደሶና። ሺን ፋሪሳዌቲ ባንታና ኣይሁዳታ ዋሳ ኬላፊ ኬሶሶና ገዲ ያዩዳ ገሾ ኣማኒዳ ገዲ ቆንጨን ማርካቴቦኮና።

43 ሄሳ ኤንቴ ኦሊዳይ፡ ያሳን ኤሬታናይሳፊ ኣሊዲ ኣሳን ኤሬታናይሳ ደሲዳ ገሾሳ።

44 ዬሱሲ ባ ቃላ ቶቁ ኦሊዳ፡ «ታና ኣማኒያ ኦኒካ ታና ከቲዳይሳካ ኣማኔሰፔ ኣቲን ታ ያላላ ኣማኔና።

45 ታና ቤዒያ ኦኒካ ታና ከቲዳይሳካ ቤዒሰ።

12:34 ማዝ 110:4፤ ኢሳ 9:7፤ ሂዝ 37:25፤ ዳኔ 7:14 12:38 ኢሳ 53:1
12:39-40 ኢሳ 6:10

- 46 ታና ኣማኒያ ኡባይ ቆማን ዶና ሜላ ታኒ ፖፖ ጊዳዳ ኣላሚያ ያሰ።
- 47 ታ ቃላ ሲዒዲ ከቲቶና ኦናካ ታኒ ፐርዲኬ። ኣይሰ ጊኮ። ታኒ ኣላሚያ ኣሻናው ያሲፔ ኣቲን ፐርዳናው ያቢኬ።
- 48 ታና ኢጻይሳኔ ታ ቃላ ኤኮና ኦናካ ፐርዳይሲ ዳዔሰ። ታኒ ኦዲዳ ቃላይ ወርሴላ ጋላስ ሄ ኡራ ፐርዳና።
- 49 ኣይሰ ጊኮ። ታኒ ሄሳ ታፔ ኦዲኬ። ሺን ታና ከቲዳ ታ ኣዋይ ታኒ ጋናይሳኔ ኦዳናይሳ ከቲሰ።
- 50 ቃሲ ኢያ ከታይ ሜሪና ዳፖ ጊዳይሳ ታኒ ኤራይሰ። ሄሳ ጊሾ። ታኒ ኦዳይሲ ታ ኣዋይ ታና ኦዳ ጊዳይሳ» ያጊሰ።

13

ዮሱሲ ባ ታማሬታ ቶሁዋ ሜጨሰ

- 1 ፓሲካ ቦንቺያ ጋላሳይ ጋካናፔ ሲንላቲዲ ሃ ኣላሚያ ኣጊዲ ኣዋኮ ቢያ ዋዳይ ጋኪዳይሳ ዮሱሲ ኤሪሰ። ሃ ኣላሚያን ዳዒያ ባይሳታ ኡባ ዋዳ ዶሲሰ፤ ወርሴላ ጋካናወካ ኤንታ ዶሲሰ።
- 2 ዮሱሳራኔ ኢያ ታማሬታራ ኢሲፌ ካሆ ሞሶና። ሄሳፌ ካሴ ፃላሄይ ሲሞና ናባ ኣሰቆርታ ዪሁዲ ዮሱሳ ኣላ ኢማናዳ ኢያ ዋዛናን ኢታ ቆፋ ዋላሰ።
- 3 ዮሱሲ ኣዋይ ኡባባ ኢያ ኩሺን ዋላዳይሳ፣ ኢ ያሳ ማታፔ ዪዳይሳኔ ሲሚዲ ኢያኮ ባናይሳ ኤሪሰ።
- 4 ዮሱሲ ጋይታ ቦላፌ ዳንዲዲ ቦላ ባጋ ማዑዋ ቃሪ ዋላዲ፣ ፖፃ ኤኪዲ ባ ጻሳን ማርፃፊሰ።
- 5 ሄሳፌ ጉዬ፣ ሃሌ ሚቻ ሚሺን ቲጊዲ፣ ባ ታማሬታ ቶሁዋ ሜጨሰ፤ ቃሲ ባ ጻሳን ዳንጨዳ ፖፃን ቁቺሰ።
- 6 ዮሱሲ ሲሞን ጳዒሮሳኮ ያ ዋዳ ጳዒሮሲ፣ «ጎዳው፣ ኔ ታ ቶሁዋ ሜጨኔ?» ያጊሰ።
- 7 ዮሱሲ ዛሪዲ ኢያኮ፣ «ታኒ ኦሌይሳ ኔ ሃዒ ኤራካ፣ ሺን ጉዬፔ ኣኬካና» ያጊሰ።
- 8 ያቲን፣ ጳዒሮሲ፣ «ኔ ታ ቶሁዋ ኡባራካ ሜጨካ» ያጊሰ። ዮሱሲ ኢያኮ፣ «ታኒ ኔ ቶሁዋ ሜጨና ኢዲኮ ኔወኔ ታው ኢሲፌቴላ ባዋ» ያጊሰ።
- 9 ጳዒሮሲ ዮሱሳኮ፣ «ጎዳው፣ ያቲኮ፣ ታ ቶሁዋ ፃላላ ጊዶናሺን ታ ኩሺያኔ ታ ሁዒያ ሜጨ» ያጊሰ።
- 10 ዮሱሲ ዛሪዲ፣ «ቦላ ሜጨቲዳ ኦኒካ ቶሆፔ ሃራባ ሜጨታናው ኮሺና፤ ኢያው ኡባሶይ ጌሺ። ሂንቴ ጌሺ፣ ሺን ኡባይ ጌሺ ጊዳኬታ» ያጊሰ።

11 ዩሱሲ ባና አላ አማና ኡራይ ኦኔኮ ኤሪያ ጊሾ «ሂንቴ ኡባይ ጌሺ ጌዳኬታ» ያገለገሉ።

12 ኤንታ ቶሁዋ ሜጨዳፔ ጉዬ ዩሱሲ ባ ማዑዋ ዛሪ ማዒሰ። ሲሚ ጋይታ ቦላ ኡቲዲ ኤንታኮ፣ «ታኒ ሂንቴው ኦሊዳይሳ ኦኔኬቲ?»

13 ሂንቴ ታና አሰታማሬኔ ጎዳ ጌታ፤ ታኒ ሂንቴ ጌይሳ ጊዲያ ጊሾ ሎዎ ጊዳታ።

14 ታኒ ሂንቴው ጎዳኔ አሰታማሬ ጊዳሽ ሂንቴ ቶሁዋ ሜጨኮ ሂንቴካ ኢሶይ ኢሱዋሰ ሄሳዳ ኦላናው ቤሴስ።

15 ሂዛ፣ ታኒ ሂንቴው ኦሊዳይሳዳ ሂንቴካ ኦላና ሜላ ሂንቴው ለሚሶ ጊዳሰ።

16 ታኒ ሂንቴው ቱማ ኦዳይስ፤ አይሌይ ባ ጎዳፔ፣ ከቴቲዳይሲ ከቲዳይሳፌ አዳና።

17 ሂንቴ ሄሳ ኤሪዲ ኦሊያባ ጊዲኮ አንጃቲዳይሳታ።

18 «ታኒ ሂንቴና ኡባ ጊኬ፤ ታኒ ዶሪዳይሳታ ኡሪይስ። ሺን ጌሻ ማፃፋን፣ ጎታ ባርሲዳይሲ ታ ኩሺያ ሳሻስ» ጌቴቲዳይሲ ቱማ ጊዳናው ቤሴስ።

19 ታኒ ታና ጊዳይሳ ሂንቴ አማናና ሜላ ሄሲ ሃናናፔ ሲንሳታዳ ሂንቴው ኦዳይስ።

20 ታኒ ሂንቴው ቱማ ኦዳይስ፤ ታኒ ከቲዳ ኦናካ ሞኪያ ኡሪይ ታና ሞኬስ። ታና ሞኪያ ኦኒካ ታና ከቲዳይሳ ሞኬስ» ያገለገሉ።

ዩሱሲ ባና አላ አማናይ ኦኔኮ ኮይሮቲዲ ኦዲሰ (ማቶ 26:20-25፤ ማር 14:17-21፤ ሉቃ 22:21-23)

21 ዩሱሲ ሄሳ ኦዲዳፔ ጉዬ ባ ዎዛናን ዳሮ ኡንዔቲዲ፣ «ታኒ ሂንቴው ቱማ ኦዳይስ፤ ታና ሂንቴፌ ኢሶይ አላ አማና» ጊዲ ቆንጨሲዲ ኦዲሰ።

22 ኢ ኦይባ ኦዲያኮ ኢያ ታማሬታሰ ኤሬቶና ኢዲን ኢሶይ ኢሱዋ ጴሊዶሶና።

23 ኢያ ታማሬታፔ ኢሶይ፣ ዩሱሲ ዶሴይሲ፣ ዩሱሳ ማታን ኡቲሰ።

24 ሄሳ ጊሾ፣ ሲሞን ጳዒሮሲ ኢያ ቃምዎቲዲ፣ «ኢ ኦና ጊያኮ ኦኔ ኦይቻ» ያገለገሉ።

25 ሄሳ ጊሾ፣ ሄ ታማሬይ ዩሱሳኮ ሸቂዲ ሃይላን፣ «ጎዳው፣ ኢ ኦኔ?» ያገለገሉ።

13:12 ሉቃ 22:27 13:16 ማቶ 10:24፤ ሉቃ 6:40፤ የሃ 15:20 13:18 ማዝ 41:9 13:20 ማቶ 10:40፤ ማር 9:37፤ ሉቃ 9:48፤ 10:16

26 ዩሱሱ ዛሪዲ፡ «ታኒ ኡይላ ዎዌን ቱሻዳ ባርሴይሳ» ያገሰ።
ቃሲ ኡይላ ሜንሱ ኤኪዲ፡ ዎዌን ቱሺዲ፡ ሲሞና ናዓ አሰቆሮታ
ዩሱዳ ባርሴሰ።

27 ዩሱዲ ኡይላ ባሪዳ፤ ጉዬ ዓላሄይ ሶሁዋራ ዩሱዳን
ጌሊሰ። ዩሱሱ ኢያኮ፡ «ኔኒ ኦላናው ቆፒዳባ ኤሌሳዳ ኦላ»
ያገሰ።

28 ሺን ጋይታ ቦላ ኡቲዳይሳታ፤ ኦኒካ ዩሱሱ ሄሳ አይሰ ኢያኮ
ገዳኮ ኤሪቤና።

29 ዩሱዲ ሚሽ ኦይኪያ ገሾ ኢያ ታማሬታ፤ ኢሶቲ ኢሶቲ
ዩሱሱ ኢያ፡ «ፓሲካ ቦንቲያ ጋላሳሰ ባንታው ኮሺያባ ሻማ ዎይኮ
ማንቆታሰ ሙፃታ ኢማ ገሰ» ያገዱ ቆፒደሶና።

30 ዩሱዲ ኡይላ ባሪዳ ሜላ ሶሁዋራ ካሬ ኬዩሰ። ሄ ዎዴ
ሳዒ ቃማ።

ኦራላ ኪታ

31 ዩሱዲ ካሬ ኬዩዳ፤ ጉዬ፡ ዩሱሱ፡ «ሃዒ አሳ ናዓይ
ቦንቲቲሰ፤ ያሳይካ ኢያ ባጋራ ቦንቲቲሰ።

32 ያሳይ ኢያ ባጋራ ቦንቲቲኮ ኢ ባ ሁዔን አሳ ናዓ ቦንቻና፤
ቃሲ ኢ ሄሳ ኤሌሲዲ ኦላና።

33 ታ ናይቶ፡ ታኒ ሂንቴራ ዳሮ ዎዴ ጋሞዒኬ። ሂንቴ ታና ኮያና፡
ሺን ታኒ አይሁዳታሰ ኦዲዳይሳ ሜላ፡ «ሂንቴ ታኒ ቢያሱዋ ባናው
ዳንዳዒኪታ።»

34 ታኒ ሂንቴው አሚያ ኦራላ ኪታይ ሃይሳ፤ ኢሶይ ኢሱዋ
ደሲቲ። ታኒ ሂንቴና ደሲዳይሳዳ ሂንቴ ኢሶይ ኢሱዋ ደሳናው
ቤሴሰ።

35 ሂንቴ ኢሶይ ኢሱዋራ ደሴቲኮ ሂንቴ ታ ታማሬ ገዳይሳ
አሳ ኡባይ ኤራና» ያገሰ።

**ጳዳርሲ ካዳናይሳ ዩሱሱ ኮይሮቲዲ ኦዲሰ
(ማቶ 26:31-35፤ ማር 14:27-31፤ ሉቃ 22:31-34)**

36 ሲሞን ጳዳርሲ ዩሱሳኮ፡ «ጎዳው፡ ኔኒ አው ባይ?» ያገሰ።
ዩሱሱ ዛሪዲ፡ «ታኒ ቢያሱዋ ኔኒ ሃዒ ካላናው ዳንዳዓካ፡
ሺን ጉዬ፤ ታና ካላና» ያገሰ።

37 ጳዳርሲ፡ «ጎዳው፡ ታኒ ኔና ሃዒ ካላናው አይሰ
ዳንዳዒኪና? ታኒ ኔ ገሾ ሃይቃናዉካ ገጋ ኡታሰ» ያገሰ።

38 ዩሱሲ ዛሪዲ፡ «ታ ጊሾ ሃይቃናው ቱማ ገጋ ኡታዲ? ታኒ ኔው ቱማ ኦዲይሰ፤ ኩቶይ ዋሳናፔ ሲንፉ ኔኒ ታና ሄቩ ቶሆ ካዳና» ያገሰ።

14

ዩሱሲ አዋኮ ኤፊያ ኦጌ

1 ዩሱሲ ባ ታማሬታኮ፡ «ሂንቴ ዋዛናይ ኡንዔቶፎ፡ ያሳ አማኒቴ፡ ታናካ አማኒቴ።

2 ታ አዋ ኩላን ዳሮ ቤሲ ዳዔሰ። ታኒ ሂንቴው ቤሴ ገሊሳናው ባይሰ። ሄሳ ገደናኮ ታኒ ሂንቴው ኦዲኬሽን።

3 ታኒ ባዳ ቤሴ ገሊሲዳፔ ጉዬ ታኒ ዳዔያሱዋን ሂንቴ ዳና ማላ ሲማ ያዳ ሂንቴና ታኮ ኤፋና።

4 ሂንቴ ታኒ ቢያሱዋ ኤፊያ ኦጌያ ኤሬታ» ያገሰ።

5 ያቲን፡ ቶማሲ፡ «ጎዳው፡ ኔኒ ቢያሱዋ ኦኒ ኤሮኮ፤ ኦጌያ ዋቲዲ ኤራናው ዳንዳዓኔ?» ያገሰ።

6 ዩሱሲ ዛሪዲ፡ «ኦጌይ፡ ቱማይኔ ዳዖይ ታና። ታ ባጋራ ገደና ኢዲኮ ኦኒካ ታ አዋኮ ባናው ዳንዳዓና።

7 ሂንቴ ታና ኤሪያባ ገዲያኮ፡ ታ አዋካ ኤራና። ሽን ሂዛፔ ደሚዲ ሂንቴ ኢያ ኤሬታኔ ኢያ ቤዒዳታ» ያገሰ።

8 ፊልጶሲ ዩሱሳኮ፡ «ጎዳው፡ አዋ ኦና ቤሳ፤ ሄሲ ኦሰ ገደና» ያገሰ።

9 ዩሱሲ ዛሪዲ፡ «ታኒ ሃይሳ ማላ ዋዳ ሂንቴራ ዳዒንካ ታና ኤሪኪ? ታና ቤዒዳ ኡራይ አዋካ ቤዒሰ። ያቲን፡ ኔኒ ዋይጋዳ፡ (አዋ ኦና ቤሳ) ጋይ?

10 ታኒ አዋራ ኢሲኖ ገዳይሳኔ አዋይካ ታራ ኢሲኖ ገዳይሳ ኔኒ አማኒኪዬ? ታኒ ሂንቴው ኦዲያ ቃላ ታኒ ታፔ ኦዲኬ፡ ሽን ታናን ዳዒያ አዋይ ባ ኦሱዋ ኦፊሰ።

11 ታኒ አዋን ዳዔይሳኔ አዋይካ ታናን ዳዔይሳ አማኒቴ። ሄሳ አማናና ኢዲኮ ታ ኦፊያባታን ታና አማኒቴ።

12 «ታኒ ሂንቴው ቱማ ኦዲይሰ፤ ታና አማኒያ ኡራይ ታኒ ኦፊያ ኦሱዋፔ አዲያ ኦሶ ኦፋና። ታኒ አዋኮ ቢያ ገሾ ታና አማኒያ ኦኒካ ሃይሳፌ አዲያ ኦሶ ኦፋና።

13 አዋይ ናዓ ባጋራ ቦንቼታና ማላ ታ ሱንላን ሂንቴ ዋሲያ ኡባ ታ ሂንቴው ኦፋና።

14 ታ ሱንላን አይቢባካ ሂንቴ ኦይቺኮ ታ ሂንቴው ኦፋና።

ዩሱሲ ጌሻ አያና አማናው ቃላ ጌሊሰ

15 «ሂንቴ ታና ደሲኮ ታ ኪታ ናጋና።

16 ታኒ አዋ ዋሳና፤ ሂንቴራ ሜሪናው ዳና ሜላ ሚንጤይሳ ሂንቴው አማና።

17 ሄ አያናይ ያሳ ቱማ ቆንጨሴስ። ሃ አላሚያ አሳይ ኢያ ቤዖና ጊሾኔ ኤሮና ጊሾ ኢያ ኤካናው ዳንዳዎኮና። ሺን ኢ ሂንቴራ ዳዒያ ጊሾኔ ሂንቴ ጊደን ዳና ጊሾ ሂንቴ ኢያ ኤሬታ።

18 «ታኒ ሂንቴና አያ አጤ ባይና ርዓዳ ሂንቴ ፃላላ አጊከ፤ ሲማዳ ሂንቴኮ ያና።

19 ጉሳ ዋዴፔ ጉዬ አላሚይ ታና ዛሪ ቤዒና፤ ሺን ሂንቴ ቤዒና። ታኒ ዳዎን ዳዒያ ጊሾ ሂንቴካ ዳዎን ዳዒና።

20 ታኒ ታ አዋን፣ ሂንቴ ታናን፣ ቃሲ ታኒ ሂንቴናን ዳዒይሳ ሂንቴ ሄ ጋላሰ ኤራና።

21 «ታ ከታ ኤከዲ ናጌይ ታና ደሴስ። ታና ደሴይሳ ታ አዋይካ ደሴስ፤ ታኒካ ኢያ ደሳይሰ፤ ታኒ ኢያው ቆንጫና» ያጊሰ።

22 አሰቆርታ ዪሁዳ ጊደና ዪሁዳ ዬሱሳኮ፣ «ሳዳው፣ ኔኒ ዋታዳ አላሚያሰ ጊደናሺን ኑስ ኔና ቆንጨሳኔ?» ያጊሰ።

23 ዬሱሴ ዛሪዲ፣ «ታና ደሴያ ኦኒካ ታ ቃላሰ ከቱታና። ታ አዋይ ኢያ ደሳና። ቃሲ ታ አዋይኔ ታኒ ኢያኮ ዪዲ ኢያራ ዳና።

24 ታና ደሴና ኦኒካ ታ ቃላሰ ከቱቱና። ሂንቴ ሲዒያ ቃላይ ታና ከቱዳ አዋባፔ አቲን ታባ ጊዳና።

25 «ታኒ ሂንቴራ ሃዒ ዳዒሽ ሄሳ ሂንቴው ኦዳሰ።

26 ሺን አዋይ ታ ሱንሳን ከታና ሚንጤይያ ጌሻ አያናይ፣ ሂንቴና ኡባባ ታማርሳና። ታኒ ሂንቴው ኦዲዳ ኡባ ኢ ሂንቴና ሃሳዪሳና።

27 «ሳርቱሳ ሂንቴው አማና። ታኒ ታ ሳርቱሳ ሂንቴው አማና። ታ አሚያ ሳርቱሳይ አላሚይ አሚያ ሳርቱሳ ሜላ ጊዳና። ሄሳ ጊሾ፣ ኡንዔቶፊቱ፣ ያዮፊቱ።

28 ታኒ ባና፣ ሺን ሲማዳ ሂንቴኮ ያና፣ ጊዳይሳ ሲዒዳታ። ሂንቴ ታና ቱማ ደሴያባ ጊዲያኮ ታ አዋይ ታፔ አዲያ ጊሾ ታኒ ኢያኮ ቤይሳን ሂንቴ ኡፋይታና።

29 ሄሲ ሃኒያ ዋዴ ሂንቴ አማናና ሜላ ሄሲ ሃኖና ዳዒሺን ሲንሳታዳ ታኒ ሂንቴው ኦዳሰ።

30 «ሃ አላሚያ ሃሪይሲ ያ ጊሾ ሃዛፔ ጉዬ ሂንቴራ ዳር ኦዴቲከ። ታና ኢ አይኮካ ኦሳናው ዳንዳዔና።

31 ሺን ታኒ አዋ ደሴይሳ አላሚይ ኤራና ሜላ ታ አዋይ ታና ከቲዳይሳ ኡባ ኦሳይሰ። ዳንዲቱ፤ ሃይሳፊ ሶሰ።

15

ዋይኒያ ቱማ ኡባይ ዬሱሳ

- 1 «ታኒ ወይኒያ ቱማ ኡባ። ጎሻንቾይ ታ ኣዋ።
- 2 ታ ቦላ ዳዒያ ኣይፌ ኣይፎና ታሺያ ኡባ ኢ ካሬስ። ኣይፊያ ታሺያ ካሴይሳፌ ኣጂ ኣይፋና ሜላ ሄ ታሺያ ኢ ገረሳና።
- 3 ታኒ ሂንቴው ኦዲዳ ቃላ ገሾ ሂንቴ ጌሺ።
- 4 ታናን ዳዒቴ፤ ታኒካ ሂንቴናን ዳዒና። ወይኒያ ታሺይ ኡባራ ዳዖና ኢጂኮ ሄ ታሺይ ባርካ ኣይፌ ኣይፋናው ዳንዳዔና። ሄሳዳካ፣ ሂንቴካ ታናን ዳዖና ኢጂኮ ኣይፌ ኣይፋናው ዳንዳዔኬታ።
- 5 «ታኒ ወይኒያ ኡባ፤ ሂንቴ ታሺታ። ታናን ዳዔይሰኔ ታኒ ኢያን ዳዔይሰ፣ ኢ ዳሮ ኣይፌ ኣይፋና። ታ ባይና ሂንቴ ፃላላ ኣይኮካ ኦላናው ዳንዳዔኬታ።
- 6 ታናን ደና ኡራይ ታሺዳ ካሬን ዩጊቴዲ ሜላና። ሄሳ ሜላ ታሺቴ ሸቁዲ ታማን ዩጌታና፣ ፀጌታና።
- 7 ሂንቴ ታናን ዳዒኮ፣ ታ ቃላይካ ሂንቴናን ዳዒኮ፣ ሂንቴ ኮያባይ ኣይባ ገዲኮካ ዋሲቴ፤ ሂንቴ ኤካና።
- 8 ሂንቴ ዳሮ ኣይፌ ኣይፊያ ታ ታማሬ ገዲኮ፣ ሄሳን ታ ኣዋይ ቦንቼታና።
- 9 ኣዋይ ታና ደሴይሳዳ ታኒካ ሂንቴና ደሳይሰ፤ ታ ሲቁዋን ዳዒቴ።
- 10 ታኒ ታ ኣዋ ኪታ ናጋዳ ኢያ ሲቁዋን ዳዒዳይሳዳ ሂንቴካ ታ ኪታ ናጊኮ ታ ሲቁዋን ዳና።
- 11 «ታ ኡፋይሳይ ሂንቴናን ገዳና ሜላኔ ሂንቴ ኡፋይሳይ ፖሎ ገዳና ሜላ ታኒ ሂንቴው ሄሳ ኦዳስ።
- 12 ታ ኪታይ ሃይሳ፤ ታኒ ሂንቴና ደሴዳይሳዳ ሂንቴካ ኢሶይ ኢሱዋ ደሲቴ።
- 13 ባ ሼምቸዋ ባ ላጊያሰ ኣሌዲ ኢሜይሳፌ ኣጂያ ገታ ሲቆይ ባዋ።
- 14 ታኒ ሂንቴና ኪቲዳባ ኡባ ኦሊኮ ሂንቴ ደሴቲዳይሳታ።
- 15 «ኣይሌይ ባ ጎዳይ ኦሊያባ ኤሮና ገሾ ታኒ ሂንቴና ሂዘፔ ጉዬ ኣይሌታ ጊኬ። ሺን ታ ኣዋፔ ሲዒዳ ኡባ ታኒ ሂንቴው ኦዲዳ ገሾ ሂንቴና ደሴቲዳይሳታ ጋስ።
- 16 ታኒ ሂንቴና ደራሲፔ ኣቲን ሂንቴ ታና ደሪቤኬታ። ሂንቴ ቢዲ ቆየና ኣይፌ ኣይፋና ሜላ ታኒ ሂንቴና ሹማስ። ያኒኮ ታ ኣዋይ ሂንቴ ታ ሱጎላን ዋሲዳባ ኡባ ኢማና።
- 17 ታ ኪታይ ሃይሳ፣ ኢሶይ ኢሱዋ ደሲቴ።

ዬሱሲ አላሜይ ኢፃናይሳ ኦዲሰ

18 «አላሜይ ሂንቴና ኢጂኮ ኮይሮቲዲ ታና ኢጂዳይሳ አኬኪቴ።
19 ሂንቴ አላሚያባ ጊዲያኮ አላሜይ ባባዳ ሂንቴና ደሳና።
ሺን ታኒ ሂንቴና አላሜፔ ደሪዳ ጊሾኔ ሂንቴ አላሚያባ ጊደና ጊሾ አላሜይ ሂንቴና ኢጂሰ።

20 (አይሌይ ባ ጎዳፔ አጭና) ጋዳ ታኒ ሂንቴው ኦዲዳይሳ አኬኪቴ። ኤንቲ ታና ጎዲዳባ ጊዲኮ ሂንቴናካ ጎዳና። ኤንቲ ታ ቃላ ናጊዳባ ጊዲኮ ሂንቴ ቃላካ ናጋና።

21 ሺን ኤንቲ ታና ከቲዳይሳ ኤሮና ጊሾ ሃ ኡባ ታ ጋሶን ሂንቴ ቦላ ኦላና።

22 ታኒ ያዳ ኦደናባ ጊዲያኮ ኤንታው ናጋራ ጊዴና። ሺን ሃዒ ኤንቲ ኦሌዳ ናጋራሰ ጋሶያባይ ባዋ።

23 ታና ኢጂይሲ ታ አዋካ ኢጂሰ።

24 ኦኒካ ኦሌቦና ኦሶ ታ ኤንታ ጊደን ኦላቦናባ ጊዲያኮ ኤንታው ናጋራ ጊደና አታና። ሺን ሃዒ ኤንቲ ታኒ ኦሌዳ ኦሱዋ ቤዒዲ ታናካ ታ አዋካ ኢጂደሶና።

25 ሺን ኤንታ ሂጊያን፣ (ታና ጮ ኢጂደሶና) ጌቲቲዲ ፃፊቲዳይሲ ፖሌታና ሜላ ሄሲ ሃኒሰ።

26 «አዋፔ ያ ቱማ ቆንጨሲያ ኣያና ታ ሂንቴው ኪታና። ኢ ሂንቴና ሚንጮላና፣ ታባ ማርካታና።

27 ሂንቴካ ኮይሮፔ ደሚዲ ታራ ዴዒያ ጊሾ ታባ ማርካታና።

16

- 1 «ታኒ ሄሳ ሂንቴ አማኖይ ጳዮና ሜላ ሂንቴው ኦዳሰ።
- 2 ኤንቲ ሂንቴና አይሁዴ ዋሳ ኬላታፔ ኬሲ ዬዳና። ሄሳዳካ፣ ሂንቴና ዋጂያ ኦኒካ ያሲ ኮያባ ኦሌያ ዳኒያ ዋዴይ ያና።
- 3 ኤንቲ ሄሳ ሂንቴ ቦላ ኦሌይ ታና ዋይኮ አዋ ኤሮና ጊሾሳ።
- 4 ሺን ኤንቲ ሄሳ ሂንቴ ቦላ ኦሌያ ዋዴይ ጋኪያ ዋዴ ታኒ ሂንቴው ኦዲዲዳይሳ ሂንቴ አኬካና ሜላ ታኒ ሂንቴው ሃይሳ ኦዳሰ።

ጌሻ ኣያና ኦሱዋ

«ሲንላታዳ ታኒ ሃይሳ ሂንቴው ኦደና ጋምዒዳይ ታ ሂንቴራ ዴዒያ ጊሾሳ።

5 ሺን ሃዒ ታኒ ታና ከቲዳይሳኮ ባይሰ፤ ሂንቴፌ ኦኒካ፥ ሳዉ ባይ?› ጊዲ ታና ኦይቼይ ባዋ።

6 ሺን ታኒ ሃሳ ኦዲዳ ጊሾ ሂንቴ ዎዛናን ዳር ኣዛኖይ ዴዔሰ።

7 ሺን ታኒ ሂንቴው ቱማ ኦዲይሰ፤ ታኒ ቢኮ ሂንቴው ሎዎ። ኣይሰ ጊኮ፥ ታኒ ቦና ኢዲኮ ሚንጮጮይሲ ሂንቴኮ ዬና። ሺን ታኒ ቢኮ ኢያ ሂንቴኮ ዬዳና።

8 ሚንጮጮይሲ ዬዲ፥ ናጋራባ፥ ዲሎቴፋባጌ ፐርዳባ ሃ ኣላሚያ ኣሳ ኤሪሳና።

9 ናጋራባይ፥ ኣሳይ ታና ኣማኖና ጊሾሳ።

10 ዲሎቴፋባይ፥ ታኒ ኣዋኮ ቢያ ጊሾኔ ሂንቴ ታና ዛሪ ቤዖና ጊሾሳ።

11 ፐርዳባይ፥ ቃሲ ኣላሚያ ሃሪይሲ ፐርዳቲዳ ጊሾሳ።

12 «ታኒ ሂንቴው ኦዲያባይ ዳርባይ ዴዔሰ፥ ሺን ሃዒ ሂንቴው ጌሌና።

13 ቱማ ኣያናይ ያ ዎዴ ሂንቴና ቱማቴፋ ኡባኮ ካሌፋና። ኢ ሲዒዳባ ኦዴሲፔ ኣቲን ባፔ ኣይቢባካ ኦዴና። ቃሲ ሲንፋፌ ያናባ ሂንቴው ኢ ኦዳና።

14 ኢ ታው ዴዔይሳፌ ኤኪዲ ሂንቴው ኦዲያ ጊሾ ኢ ታና ቦንቻና።

15 ኣዋሰ ዴዒያባ ኡባይ ታባ፤ «ሚንጮጮይሲ ታው ዴዔይሳፌ ኤኪዲ ሂንቴው ኦዳና» ታኒ ጊዳይ ሄሳሳ።

ሂንቴ ኣዛኖይ ኡፋይሳን ላሜታና

16 «ጉፋ ዎዴፔ ጉዬ ታና ቤዔኬታ፤ ቃሲ ጉፋ ዎዴፔ ጉዬ ሂንቴ ታና ቤዓና» ያጊሰ።

17 ኢያ ታማሪታፔ ኢሶቲ ኢሶቲ ባንታ ጊደን፥ «ጉፋ ዎዴፔ ጉዬ ሂንቴ ታና ቤዔኬታ፤ ቃሲ ጉፋ ዎዴፔ ጉዬ ሂንቴ ታና ቤዓና፤ ቃሲካ ታኒ ኣዋኮ ባይሰ ጉሳይ ዎይ ጉሴ?» ያጊደሶና።

18 «ጉፋ ዎዴፔ ጉዬ ጌይሲ ዎይ ጉሴ? ኢ ኣይ ኦዴቲያኮ ኑሰ ኤሬቴና» ያጊደሶና።

19 ኤንቲ ባና ኦይቻናው ኮዬይሳ ዬሱሲ ኤሪዲ፥ «ታኒ፥ ሪፋ ዎዴፔ ጉዬ ታና ቤዔኬታ፤ ቃሲ ጉፋ ዎዴፔ ጉዬ ሂንቴ ታና ቤዓና» ጊዳይሳሰ ሂንቴ ኢሶይ ኢሱዋ ኦይቼቲ?

20 ታኒ ሂንቴው ቱማ ኦዲይሰ፤ ሂንቴ ዬካናኔ ኣፋፃና፥ ሺን ሃ ኣላሚይ ኡፋይታና። ሃዒ ሂንቴ ኣዛኖና፥ ሺን ሂንቴ ኣዛኖይ ኡፋይሳን ላሜታና።

21 ኢሲ ማጫሲያ ናዓ ዩላና ሃኒያ ዋዴ ባ ዩሎ ዋዴይ ጋኪዳ ጊሾ ሂርጋዉሱ። ሺን ናዓ ዩሊዳፔ ጉዩ ናዒ ሃ አላሚያን ዩሌቲዳ ኡፋይሳ ጊሾ ባ ኡንዓ ደጋዉሱ።

22 ሄሳዳካ፣ ሂንቴካ ሂንቴ ዋዛናን አዛኔታ፣ ሺን ታኒ ሂንቴና ዛራዳ ቤዓና። ሂንቴ ዋዛናይ ዳሮ ኡፋይታና፤ ሄ ኡፋይሳ ኦኒካ ሂንቴፌ ኤኬና።

23 «ሄ ጋላስ ሂንቴ ታና አይቢባካ ዋሴኬታ። ታኒ ሂንቴው ቱማ ኦዳይስ፤ ሂንቴ ታ ሱንሳን ዋሲያባ ኡባ አዋይ ሂንቴው ኢማና።

24 ሃዒ ጋካናው ታ ሱንሳን አይቢባካ ዋሲቤኬታ። ሂንቴ ኡፋይሳይ ፖሎ ጊዳና ሜላ ያሳ ዋሲቴ፤ ሂንቴ ኤካና።

25 «ታኒ ሃዒ ጋካናው ሂንቴው ለሚሶን ኦዳስ፣ ሂዛፔ ታኒ ለሚሶን ኦዳና ዋዴይ ያና። ሺን አዋባ ታኒ ሂንቴው ቆንጨን ኦዳና።

26 ሄ ጋላስ ሂንቴ ታ ሱንሳን አዋ ዋሳና፤ ሂንቴ ጊሾ ታኒ አዋ ዋሲኬ።

27 አይስ ጊኮ፣ አዋይ ባ ሁዔን ሂንቴና ደሴስ። ሂንቴ ታና ደሲያ ጊሾኔ ታኒ አዋ ማታፔ ዩዳይሳ አማኒዳ ጊሾ ኢ ሂንቴና ደሴስ።

28 ታኒ አዋ ማታፔ ሃ አላሚያ ያስ፤ ቃሲ አላሚያ አጋዳ አዋኮ ባና» ያጊሰ።

29 ኢያ ታማሬቲ ዛሪዲ፣ «ሄኮ፣ ሃዒ ኔኒ ቆንጨን ኦዳሳ፤ ለሚሶን አይኮካ ኦዳካ።

30 ኔኒ ኡባባ ኤሬይሳ ኔኒ ሃዒ ኤሮስ፤ ቃሲ ኔና ኦኒካ ኦይቻና ሜላ ኔኒ ኮያካ። ሄሲ ኦና ኔኒ ያሳፌ ኪቴቲዳይሳ አማንፊስ» ያጊደሶና።

31 ያቲን፣ ዩሱሲ ዛሪዲ ኤንታኮ፣ «ሃዒ አማኔቲ?

32 ሄኮ፣ ሂንቴ፣ ሂንቴ ሶ ሂንቴ ሶ ላሌቲያ ዋዴይኔ ታ ፃላላ ዩጊ አጊዲ ባቃቲያ ዋዴይ ያና፤ ሃዒካ ዩኪቺስ። ሺን አዋይ ታራ ዴዒያ ጊሾ ታ ታ ፃላላ ጊዲኬ።

33 ሂንቴ ታራ ዴዒሼ ሳሮይ ሂንቴው ዳና ሜላ ታኒ ሄሳ ኦዳስ። አላሚን ዴዒሼ ሂንቴ ዋዩታና። ሺን ሚኒቴ፤ ታኒ አላሚያ ያናስ» ያጊሰ።

17

ዩሱሳ ዋሳ

1 የሱሲ ሃሳ ኦሚዳፔ ጉዬ ፑዴ ሳሎ ፆሊዲ፣ ሃይሳዳ ያገሰ፡ «አዋው፣ ሳቴይ ጋኪስ፤ ኔ ናዓይ ኔና ቦንቻና ሜላ ኔኔ ኔ ናዓ ቦንቻ።

2 ኔኔ ኢያው ኢሚዳ ኡባስ ኢ ሜሪና ዴዑዋ ኢማና ሜላ አሳ ኡባ ቦላ ኢያው ማታ ኢማዳሳ።

3 ሜሪና ዴዖይ፣ ኔና፣ ኢሲ ቱማ ያሳኔ ኔ ኪቲዳ ዩሱሰ ኪሪሰቶሳ ኤሮ።

4 ኔኔ ታ ኦላና ሜላ ኢሚዳ ኦሱዋ ፖላዳ ኔና ሳዓን ቦንቻሰ።

5 ሃዒካ፣ አዋው፣ አላሜይ ሜዴታናፔ ሲንጤ ኔ ማታን ታው ዴዒያ ቦንቹዋን ታና ቦንቻ።

6 «አላሚያ አሳፔ ኔኔ ታው ኢሚዳይሳታ ኔና ኤሪሳሰ። ኤንቲ ኔይሳታ፤ ኔኔ ኤንታ ታው ኢማዳሳ። ኤንቲ ኔ ቃላስካ ኪቲቲደሶና።

7 ኔኔ ታው ኢሚዳ ኡባባይ ኔፔ ዩዳይሳ ኤንቲ ሃዒ ኤሮሶና።

8 ኔኔ ታው ኢሚዳ ቃላ ታኒ ኤንታው ኢማሰ፤ ኤንቲካ ሄ ቃላ ኤኪደሶና። ታኒ ኔ ማታፔ ዩዳይሲ ቱማ ገዴይሳ ኤሪዲ ኔኔ ታና ኪቲዳይሳካ አማኒደሶና።

9 «ታኒ ኤንታው ዋሳይሰ። ኤንቲ ኔይሳታ ገዲያ ገሾ ኔኔ ታው ኢሚዳ አሳሰ ዋሳይሲፔ አቲን አላሚያሰ ዋሲኬ።

10 ታው ዴዒያ ኡባባይ ኔባ፤ ኔው ዴዒያ ኡባይካ ታባ። ታኒ ኤንታ ባጋራ ቦንቹታሰ።

11 ታኒ ሃዘፔ ጉዬ አላሜን ዴዒኬ፤ ኤንቲ አላሜን ዴዖሶና። ታኒ ሃዒ ኔኮ ባይሰ። ጌሻ አዋው፣ ሃ ኔኔ ታው ኢሚዳይሳቲ ኔራኔ ታራ ኢሲኖ ገዲዳይሳዳ ኤንቲ ኢሲኖ ገዲና ሜላ ኤንታ ኔ ታው ኢሚዳ ኔ ሱንላን ናጋ።

12 ታኒ ኤንታራ ሳዓን ዴዒሼ፣ ኔ ታው ኢሚዳ ኔ ሱንላ ዋልቃን ኤንታ ናጋሰ። ጌሻ ማፃፋይ ገዲይሲ ፖሌታና ሜላ ጳዮይ ቤሲያ ኡራፔ አቲን ኤንታፌ ሃሪ ኦኒካ ጳዩቤና።

13 «ሃዒ ታኒ ኔኮ ባይሰ። ታ ኡፋይሳይ ኤንታ ዋዛናን ፖሎ ገዲና ሜላ ሃይሳ ታኒ አላሜን ዴዒሼ ኦዳይሰ።

14 ታኒ ኤንታው ኔ ቃላ ኢማሰ። ታኒ አላሜፔ ገዲናይሳዳ፣ ኤንቲካ አላሜፔ ገዲና ገሾ አላሜይ ኤንታ ኢፂሰ።

15 ኔኔ ፃላሄፔ ኤንታ ናጋና ሜላፔ አቲን አላሜፔ ኬሳና ሜላ ዋሲኬ።

16 ታኒ አላሜፔ ገዲናይሳዳ ኤንቲካ አላሜፔ ገዲኮና።

17 ኔኔ ኔ ቱማቴላን ኤንታ ኔባ ኦላ፤ ኔ ቃላይካ ቱማ።

18 ኔኔ ታና አላሚያ ኪቲዳይሳዳ ታኒካ ኤንታ አላሚያ ኪታሰ።

19 ቃሲ ኤንቲ ቱማ ኔባ ጊዳና ሜላ ኤንታ ጊሾ ታኒ ታ ሁዒያ ኔው ኢማይስ።

20 «ታኒ ኤንታ ፃላላሰ ጊዳናሽን ኤንቲ ቃላ ኦዲን፣ ታና ኢማናናይሳታሰካ ዋሳይስ።

21 ኤንቲ ኡባይ ኢሲኖ ጊዳና ሜላ ታኒ ዋሳይስ። ኣዋው፣ ኔ ታናን ዴዔይሳዳ፣ ቃሲ ታ ኔናን ዴዔይሳዳ ኤንቲ ኦናን ዳና ሜላ ዋሳይስ። ሄ ዋዴ ኔኒ ታና ከቲዳይሳ ኣላሜይ ኢማናና።

22 ኔኒኔ ታኒ ኢሲኖ ጊዳይሳዳ፣ ኤንቲ ኢሲኖ ጊዳና ሜላ፣ ኔኒ ታና ቦንቸዳይሳዳ፣ ታኒካ ኤንታ ቦንቸሰ።

23 ታኒ ኤንታን፣ ኔኒ ታናን ዴዔይሳዳ ኤንቲ ፖሎ ኢሲኖ ጊዳና ሜላ ኔና ዋሳይስ። ሄሲካ፣ ኔ ታና ከቲዳይሳኔ ኔ ታና ደሲዳ ደሱዋን ኤንታ ደሲዳይሳ ኣላሜይ ኤራን ሜላሳ።

24 «ኣዋው፣ ኔኒ ታው ኢሚዳይሳቲ ታኒ ዴዔይሳውዋን ታራ ዳና ሜላ ከያይስ። ኣላሜይ ሜዴታናፔ ሲንፍ ኔኒ ታና ደሲዳ ጊሾ ታው ኢሚዳ ታ ቦንቸዋ ኤንቲ ቤዓና።

25 «ጌሻ ኣዋው፣ ኣላሜይ ኔና ኤራና፣ ሽን ታኒ ኤራይስ። ቃሲ ኔኒ ታና ከቲዳይሳ ሃይሳቲ ኤሮሶና።

26 ኔኒ ታና ሲቂዳ ሲቆይ ኤንታናን ዳና ሜላ፣ ቃሲ ታኒ ኤንታናን ጊዳና ሜላ፣ ታኒ ኔ ሱንሳ ኤንታ ኤሪሳስ፤ ሲንሳሰካ ኤሪሳና» ያገሰ።

18

ዬሱሳ ኦይኬቴላ

(ማቶ 26:47-56፤ ማር 14:43-50፤ ሉቃ 22:47-53)

1 ዬሱሲ ዋሳ ኦንጊዳፔ ጉዬ ባ ታማሬታራ ቁዲሮና ዛንጋራ ፒኒዲ፣ ሄ ቤሳን ዴዒያ ኣታኪልቲያ ጊዶ ጌሊደሶና።

2 ዬሱሲ ኡባ ዋዴ ባ ታማሬታራ ያን ሸቂያ ጊሾ ዬሱሳ ኣሌ ኢሚዳ ዩሁዲ ሄ ቤሳ ኤሪሰ።

3 ሃሳ ጊሾ፣ ዩሁዲ ፓኖሴ፣ ያምፔ፣ ቶራኔ ጎንዳሌ ኦይኪዳ ዳሮ ዋታዳሬታ፣ ካሂኔ ሃላቃቲኔ ፋሪሳዊቲ ከቲዳ ያሳ ኬላ ናጊያ ፖሊሴታ ካሌሌ ኤኪዲ፣ ሄ ቤሳ ቢስ።

4 ዬሱሲ ባና ጋካና ሃኒያባ ኡባ ኤሪዲ፣ ጋፃ ኬዩዲ፣ «ኦና ኮዬቲ?» ያገሰ።

5 ኤንቲ ዛሪዲ፣ «ናዚሬቲ ዬሱሳ ኮኖስ» ያገደሶና።

ኢ ዛሪዲ፣ «ታኒ ዬሱሳ» ያገሰ።

ዬሱሳ ኣሌ ኢሚዳ ዩሁዲ ያን ኤንታራ ኤቂስ።

6 ኢ፡ «ታኒ ዩሱሳ» ጊዳ ዋዴ ኤንቲ ጉዬ ሸቂዲ፡ ሳዓን ኩንዲደሶና።

7 ዩሱሱ ቃሲካ፡ «ኦና ኮዬቲ?» ያጊዲ ኦይቺሰ።

ኤንቲ፡ «ናዚሬቴ ዩሱሳ ኮዮሰ» ያጊደሶና።

8 ኢ ዛሪዲ፡ «ታኒ ዩሱሳ ጊዴይሳ ሂንቴው ኦዳሰ። ሂዛ፡ ሂንቴ ታና ኮያባ ጊዲኮ ሃይሳታ ዩዲቴ» ያጊሰ።

9 ኢ ሄሳ ጊዲይ፡ «ኣዋው፡ ኔኒ ታው ኢሚዲይሳታፔ ሃሪ ኣቶሺን ኢሱዋካ ቆይሳቢኬ» ጊዳይሲ ፖሌታና ማላሳ።

10 ሲሞን ጳዳሮሳሰ ማሺ ደዔሰ። ኢ ሄ ማሻ ሾዲዲ ካሂኔ ሃላቃ ኣይሊያሰ ኡሻቻ ሃይላ ሾጨዲ፡ ቃንዒ ዩጊሰ። ሄ ኣይሊያ ሱንሳይ ማልኮሳ።

11 ዩሱሱ ጳዳሮሳኮ፡ «ኔ ማሻ ሾሁዋን ዛራ። ታ ኣዋይ ታው ኢሚዳ ፀዓፔ ታኒ ኡዮናባ ኔው ዳኒ?» ያጊሰ።

ዩሱሱ ሃና ሲንጼ ሸቂሰ

(ማቶ 26:57-58፤ ማር 14:53-54፤ ሉቃ 22:54)

12 ሮሜ ዋታዳሬቲኔ ኤንታ ሃላቃይ ያሳ ኬላ ናጊያ ፖሊሴታራ ኢሲፌ ዩሱሳ ኦይኪዲ ቃቺደሶና።

13 ኮይሮ ዩሱሳ ሃናኮ ኤፊደሶና። ሃኒ ሄ ላይሊ ካሂኔ ሃላቃ ጊዲያ ቃያፋ ቦሎ።

14 ቃያፊ፡ «ኣሳ ኡባ ጊሾ ኢሲ ኣሲ ሃይቂኮ ሎ?» ጊዲ ካሴ ኣይሁዳታ ዞሪዳይሳ።

ጳዳሮሲ ዩሱሳ ካዲሰ

(ማቶ 26:69-70፤ ማር 14:66-68፤ ሉቃ 22:55-57)

15 ሲሞን ጳዳሮሲኔ ሃራ ኢሲ ታማሬይ ዩሱሳ ካሊዲ ቢደሶና። ካሂኔ ሃላቃይ ሄ ሃራ ታማሬያ ሎይሊ ኤሬሰ። ሄሳ ጊሾ፡ ኢ ዩሱሳራ ካሂኔ ሃላቃ ዛባ ጌሊሰ።

16 ሺን ጳዳሮሲ ካሬራ ዲርሳ ፔንጌን ኤቂሰ። ካሂኔ ሃላቃይ ኤሪያ ሃራ ታማሬይ ካሬ ኬዱዲ፡ ፔንጌያ ናጊያ ናዔሰ ኦዲዲ፡ ጳዳሮሳ ጋላ ጌልሲሰ።

17 ፔንጌያ ናጊያ ናዔያ ጳዳሮሳኮ፡ «ኔኒ፡ ሄ ኣዲያ ታማሬታፔ ኢሱዋ ጊዲኪ?» ያጋሰ።

ጳዳሮሲ ዛሪዲ፡ «ኣካይ፡ ታኒ ጊዲኬ» ያጊሰ።

18 ሳዓይ ማጊያ ጊሾ ኣይሊቲኔ ናጌይሳቲ ዓፋ ታማ ኤሊዲ፡ ዩዩ ኣቂ ኤቂዲ ካዮሶና። ጳዳሮሲካ ኤንታራ ኤቂዲ ታማ ካዬሰ።

ካሂኔ ሃላቃይ ዩሱሳ ኦይቸሰ

(ማቶ 26:59-66፤ ማር 14:55-64፤ ሉቃ 22:66-71)

19 ካሂኔ ሃላቃይ ዩሱሳ፡ ኢያ ታማሬታባኔ ኢያ ቲሚርቲያባ ኦይቸሰ።

20 ዩሱሲ ዛሪዲ፡ «ታኒ ኣሳ ኡባሰ ቆንጩን ኦዲሰ። ታኒ ኣይሁዳ ኡባይ ሸቂያ ኣይሁዳ ዋሳ ከላኒኔ ያሳ ከላን ኡባ ዋዴ ታማርሳሰ። ጌማን ኣይኮካ ኦዲቢኬ።

21 ያቲን፡ ኔኒ ታና ኣይሰ ኦይቻይ? ታ ኦዲሺን ሰዒዳ ኣሳ ኦይቻ። ሄ ኣሳይ ታኒ ኦዲዲይሳ ኤርሶና» ያገሰ።

22 ዩሱሲ ሄሳ ገዳ ዋዴ ሄ ቤሳን ኤቂዳ ዋታዳሬታፔ ኢሶይ ዩሱሳ ባቂዲ፡ «ካሂኔ ሃላቃሰ ሃይሳዳ ዛሪይ?» ያገሰ።

23 ዩሱሲ ዛሪዲ፡ «ታኒ ኢታባ ኦዲዳባ ገዲኮ ሃይሳን ዴዒያ ኣሳ ኡባ ሰንላን ኦዲ። ሺን ታኒ ቱማ ኦዲዳባ ገዲኮ ታና ኣይሰ ባቃይ?» ያገሰ።

24 ሄሳ ገሾ፡ ሃኒ፡ ዩሱሲ ቃሼቲዳ ሜላ ካሂኔ ሃላቃ ቃያፋኮ ዩዲሰ።

ጳዊርሲ ዩሱሳ ዛሪ ካዲሰ

(ማቶ 26:71-75፤ ማር 14:69-72፤ ሉቃ 22:58-62)

25 ጳዊርሲ ያን ኤቂዲ፡ ታማ ካዲሺን፡ ሃራቲ ኢያኮ፡ «ኔኒ ሃ ኣዲያ ታማሬታፔ ኢሱዋ ገዲኪ?» ያገሰ።

ጳዊርሲ ዛሪዲ፡ «ኣካይ፡ ታኒ ገዲኪ» ያገዲ ካዲሰ።

26 ካሂኔ ሃላቃ ኣይሌታፔ ኢሶይ፡ ጳዊርሲ ሃይሳ ቃንጻዳ ኣዲያ ዳቦይ፡ ጳዊርሳኮ፡ «ታኒ ኔና ኢያራ ኣታኪልቲያ ገደን ቤዓቢኪና?» ያገዲ ኦይቸሰ።

27 ጳዊርሲ ቃሰካ ካዲሰ። ሶሁዋራ ኩቶይ ዋሲ ኣገሰ።

ዩሱሲ ጲላያሳ ሰንላን

(ማቶ 27:1-2፤ 11-14፤ ማር 15:1-5፤ ሉቃ 23:1-5)

28 ዋንታ ጉራ፡ ኤንቲ ዩሱሳ ቃያፋ ሶፔ ዳሪያ ሃሬይሳ ኦሶ ከሊ ኤፊደሶና። ኣይሁዳቲ ፓሲካ ባሌ ካሳ ማናው ባንታና ቱኒሶና ሜላ ዳሪያ ሃሬይሳ ኦሶ ከላ ጌሊቦኮና።

29 ሄሳ ገሾ፡ ጲላያሲ ኤንታኮ ካሬ ከዩዲ፡ «ሃ ኣዲያ ኣይሰ ዋቲቲ?» ያገሰ።

30 ኤንቲ፡ «ኢ ኢታ ኦላናባ ገዲያኮ ኑኒ ኢያ ኔኮ ኤሆኮ» ያገደሶና።

31 ጲላያሲ ዛሪዲ፡ «ሃንቲ ኢያ ኤኪ ኤፊዲ፡ ሃንቲ ሃጌይ ጌይሳዳ ኢያ ቦላ ፐርዲቲ» ያገሰ።

አይሁዳት፣ «አናካ ዋዲያ ማቲ ኑስ ባዋ» ያገደሰና፤
32 ሄሲ ሃሊ ዳይ ዩሱሲ አይ ማላ ሃይቆ ሃይቃኑኮ ኤሪሳናው
ኦዲዳይሲ ፖሌታናሳ።

33 ጲላዎሲ ባ ኦሶ ከፋ ዛሪ ጌሊዲ፣ ዩሱሳ ጭሊዲ፣ «ኔኔ
አይሁዳ ካዎ?» ያገደዲ ኦይቸሰ።

34 ዩሱሲ ጲላዎሳ፣ «ሃ ኦይቫ ኔኔ ኔፔ ኦይቻዬ ዋይኮ ሃራ
አሲ ኔው ታባ ኦዲዳ?» ያገሰ።

35 ጲላዎሲ ዛሪዲ፣ «ታ አይሁዳ አሴ? ኔ አሳይኔ ካሂኔ
ሃላቃቲ ኔና ታው አሊ ኢሚደሶና። ኔ አይ ኦላዲ?» ያገሰ።

36 ዩሱሲ፣ «ታ ካዎቲላይ ሃ አላሚያና ገዴና። ኢ ሃይሳን
ገዲያኮ ታ አይሁዳታ ሃላቃታሰ አቆ ኢሜቶና ማላ ታ አይሌቲ
ታው ኦሌታና። ሺን ታ ካዎቲላይ ሃ አላሚያና ገዴና» ያገሰ።

37 ሄሳ ገሾ፣ ጲላዎሲ ዩሱሳኮ፣ «ያቲን፣ ኔኔ ካዎዬ?» ያገዲ
ኦይቸሰ።

ዩሱሲ ዛሪዲ፣ «ቱማ ታ ካዎ ገዴይሳ ኔ ጋዳሳ። ታኒ
ዩሌቲዳይኔ ሃ አላሚያ ዩዳይ ቱማቲላሰ ማርካታናሳ። ቱማ ባጋ
ገዲዳ ኦኒካ ታኒ ጌይሳ ሲዔሰ» ያገሰ።

38 ጲላዎሲ፣ «ቱሚ አይቤ?» ያገሰ።

ጲላዎሲ ሄሳ ገዳፔ ጉዬ አይሁዳታኮ ካሬ ከዩዲ፣ «ታኒ ኢያፔ
አይ ኢታካ ዴማቢኮ።

39 ሺን ፓሲካ ባሌ ጋላሰ፣ ኢሲ አሴ ሃንቲው ቃሾፔ ቢሊያ
ሜዜይ ዴዔሰ። ታኒ ሃንቲው አይሁዳታ ካወዋ ቢላና ማላ
ኮዩቲ?» ያገሰ።

40 ኤንቲ ዛሪዲ፣ ባንታ ቃላ ቶቁ ኦሊዲ፣ «ባርባና ቢላፌ
አቲን ኢያ ገዴና» ያገደሰና። ሺን ባርባኒ ፓንጋ።

19

ዋታዳሬቲ ዩሱሳ ቶቸደሶና (ማቶ 27:27-32፤ ማር 15:15-21)

- 1 ሄሳፌ ጉዬ፣ ጲላዎሲ ዩሱሳ ጋራፊሲሰ።
- 2 ዋታዳሬቲ አጉንፋ ካላቻ ሜዲዲ ኢያ ሁዔን ዋሊደሶና። ቃሲ
ዘዎ ማዎ ኢያ ማይዚደሶና።
- 3 ኢያኮ ሺቂዲ፣ «አይሁዳ ካወዋው፣ ማሪናው ካዎታ» ያገዲ
ኢያ ባቂደሶና።

4 ጲላዎሲ ቃሲካ ካሬ ከዬዲ፣ አይሁዳታኮ፣ «ሄኮ፣ ታኒ ኢያፔ አይ ኢታካ ዳማቦናይሳ ሂንቴ ኤራና ማላ ኢያ ሂንቴኮ ካሬ ከሳና» ያገሰ።

5 ሄሳፌ ጉዬ፣ ዬሱሲ አጉንሳ ካላቻ ባ ሁዔን ዎሊዲ፣ ዘዎ ማዎ ማዒዲ፣ ካሬ ከዬሰ። ጲላዎሲ አይሁዳታኮ፣ «ኡራ ሃይሳ ቤዒቴ» ያገሰ።

6 ካሂኔ ሃላቃቴኔ ያሳ ከላ ናጌይሳቲ ኢያ ቤዒዳ ዎዴ ባንታ ቃላ ቶቁ ኦሊዲ፣ «ማሰቃሊያ ቦላ ካቃ! ካቃ!» ያገደሶና።

ጲላዎሲ ኤንታኮ፣ «ሂንቴ ኢያ ኤፊዲ፣ ማሰቃሊያ ቦላ ካቁቴ። ታኒ ኢያፔ አይ ኢታካ ዳማቦኪኬ» ያገሰ።

7 አይሁዳቲ ዛሪዲ፣ «ኮሰ ሂጌይ ዳዔሰ። ኢ ባና ያሳ ናዓ ኦሊዲ ገሾ ኮ ሂጌያሶ ኢ ሃይቃናው ቤሴሰ» ያገደሶና።

8 ጲላዎሲ ሄሳ ሲዒዳ ዎዴ ካሴይሳፌ ዳር ያዩሰ።

9 ቃሲካ ጲላዎሲ ባ ኦሶ ከሌ ሲሚ ጌሊዲ ዬሱሳኮ፣ «ኔኒ አዉፔ ያዲ?» ያገዲ ኦይቺሰ። ሺን ዬሱሲ ኢያው አይኮካ ዛሪቤና።

10 ሄሳ ገሾ፣ ጲላዎሲ፣ «ታው ኦዲኪ? ኔና ቢላናው ዎይኮ ማሰቃሊያ ቦላ ካቃናው ታው ማቲ ዳዔይሳ ኤሪኪ?» ያገሰ።

11 ዬሱሲ፣ «የሳይ ኔው ማታ ኢሚቦናባ ገዲያኮ ታ ቦላ ማቲ ኔው ዳናሺን። ሄሳ ገሾ፣ ታና ኔው አሌ ኢሚዳይሰ አዲያ ናጋራ ኦሊሰ» ያገሰ።

ዬሱሳ ቦላ ሃይቆ ፒርዲደሶና
(ማቶ 27:15-31፤ ማር 15:6-20፤ ሉቃ 23:13-25)

12 ጲላዎሲ ሄሳ ሲዒዳ ዎዴ ዬሱሳ ቢላናው ኦኔ ኮዩሰ። ሺን አይሁዳቲ ባንታ ቃላ ቶቁ ኦሊዲ፣ «ኔኒ ኢያ ቢሊያባ ገዲኮ ካዉዎ ቁሳሬ ባጋ ገዳካ። ባና ካዎ ገያ ኦኒካ ቁሳሬ ሞርኬ» ያገደሶና።

13 ጲላዎሲ ሄሳ ሲዒዲ ዬሱሳ ካሬ ከሴሰ። ያቲዲ፣ «ሎቺ ሹቺ» ገያሶን ፒርዳ ኦይዲያን ኡቲሰ። ኢብሪይሰዔ ቃላን ሄ ቤሳይ «ጋባታ» ጉሱ።

14 ሄ ጋላሳይ ፓሲካ ባሌ ቦንቻናው ገጌቴላ ጋላሰ። ሄ ዎዴ ሳዒ ኡሱቸን ሳቴ ሄራ። ጲላዎሲ አይሁዳታኮ፣ «ሂንቴ ካዉዎ ሃይሳ ቤዒቴ» ያገሰ።

15 አይሁዳቲ ባንታ ቃላ ቶቁ ኦሊዲ፣ «ዲጋ! ዲጋ! ማሰቃሊያ ቦላ ካቃ» ያገደሶና።

ጲላዎሲ ዛሪዲ፣ «ሂንቴ ካዉዎ ታኒ ማሰቃሊያ ቦላ ካቃናይሳ ኮዬቲ?» ያገዲ ኦይቺሰ።

ካሂኔ ሃላቃቲ፡ «ቁሳሬፔ ሃራ ካዎይ ኑስ ባዎ» ያገደሶና።
16 ሄሳፌ ጉዬ፡ ኤንቲ ዬሱሳ ማስቃሊያ ቦላ ካቃና ሜላ ጲላዖሲ ኤንታው ኣሉ ኢሚሰ።

ዬሱሲ ካቂቲሰ
(ማቶ 27:32-44፤ ማር 15:21-32፤ ሉቃ 23:26-43)

ኤንቲ ዬሱሳ ኮይኪዲ ኤፊደሶና።
17 ዬሱሲ ባ ማስቃሊያ ቶኪዲ፡ «ሁዔ ጉጌ» ገያ ቤሳ ቢስ። «ሁዔ ጉጌ» ጉሳይ ኢብራይስጫ ቃላን «ጎልጎታ» ጉሱ።

18 ኤንቲ ሄ ቤሳን ማስቃሊያ ቦላ ዬሱሳ ካቂደሶና። ቃሲ ኢያራ ሃራ ናምዑ ኣሳታ፡ ኢሱዎ ያ ባጋራ ሃንኩዎ ሃ ባጋራ ማስቃሊያ ቦላ ካቂደሶና።

19 ጲላዖሲ፡ «ኣይሁዴታ ካዉዎ፡ ናዚሬቴ ዬሱሳ» ያገያ ፀፊ ፃፊዲ ማስቃሊያ ቦላ ዎሊሰ።

20 ዬሱሲ ማስቃሊያ ቦላ ካቂቲዳ ቤሳይ ካታማስ ማታን ዴዒያ ገሾ ዳሮ ኣይሁዴቲ ሄ ፀፊያ ናባቢደሶና። ፀፊይ ፃፊቲዳይ ኢብራይስጫ ደናን፡ ላቲኔ ደናኒኔ ገሪኬ ደናና።

21 ሄሳ ገሾ፡ ካሂኔ ሃላቃቲ ጲላዖሳኩ፡ « ሃ ኣዴይ ባና ኣይሁዴ ካዎ ያገሰን ጋዳ ፃፋፔ ኣቲን ሳይሁዴ ካዎ ጋዳ ፃፎፓ » ያገደሶና።

22 ያቲን፡ ጲላዖሲ፡ «ታ ፃፊዳይሳ ፃፋሰ» ያገዲ ዛሪሰ።

23 ዎታዳሬቲ ማስቃሊያ ቦላ ኢያ ካቂዳፔ ጉዬ ኢያ ማዑዎ ኤኪዲ፡ ኣይዱ ቤሳን ሻኪዲ፡ ኢሶ ኢሶ ኤኪደሶና። ዬዳ ማዒቲያ ኢያ ኣዱሳ ማዑዎ ኤኪደሶና።

24 ዎታዳሬቲ፡ «ኦና ጋካኔኩ፡ ሳማ ዬጋናፔ ኣቲን ማዑዎ ፔጶኮ» ያገደሶና። ሄሲ ሃኒዳይ ጌሻ ማፃፋን፡

«ታ ማዑዎ ሻኪ ኤኪደሶና፤

ታ ኣዱሳ ማዑዎ ቦላካ ሳማ ዬገደሶና»

ጌቲቲዳይሲ ፖሌታና ሜላሳ። ሄሳ ገሾ፡ ዎታዳሬቲ ሄሳ ኣሉደሶና።

25 ሺን ዬሱሳ ማስቃሊያ ማታን ኢያ ኣያ፡ ኢያ ኣዬ ሚቺያ፡ ቁሊዮጵ ማቺያ ማይራማኔ ማግዳላ ማይራማ ኤቂደሶና።

26 ዬሱሲ ባ ኣዪጫኔ ኢ ደሲያ ታማሬይ ያን ኤቂዳይሳታ ቤዒዲ፡ ባ ኣዬኩ፡ «ታ ኣዬ፡ ኔ ናዓ ሃይሳ ቤዓ» ያገሰ።

27 ሄሳፌ ጉዬ፡ ሄ ታማሬያኩ፡ «ኔ ኣዪው ሃኖ ቤዓ» ያገሰ። ሄ ታማሬይ ኢዮ ሄ ዎዴፔ ደሚዲ ባራ ዳና ሜላ ሶ ኤፊሰ።

ዬሱሲ ሃይቂስ

(ማቶ 27:45-56፤ ማር 15:33-41፤ ሉቃ 23:44-49)

28 ሃሳፌ ጉዬ፣ ዬሱሲ ኡባይ ሃዒ ፖሌቲዲያሳ ኤሪዲ፣ ጌሻ ማፃፋን ፃፌቲዲይሲ ፖሌታና ሜላ «ታና ሳሜስ» ያገሰ።

29 ሄ ቤሳን ኢሲ ፀጋ ኩሜላ ጫላ ዋይኔይ ዴዔስ። ኤንቲ ኢስፖንጃ ሄ ዋይኒያን ዩጊዲ፣ ሂሶጾ ሚላ ጻራን ዋሉዲ፣ ዬሱሳ ደናኮ ሺሺደሶና።

30 ዬሱሲ ዋይኒያ ጋንዒ ቤዒዲ፣ «ፖሌቲስ» ያገሰ።

ሃሳፌ ጉዬ፣ ባ ሁዒያ ዘቂ ኦሉዲ ባ ሼምፑዋ ኢሚስ።

ዬሱሳ ሚያ ቶራን ጫዲደሶና

31 ሄ ጋላሳይ ገጌቴላ ጋላስ ጊዲያ ገሾኔ ዋንቴላ ጋላሳይ ቦንቾ ሳምባታ ጊዲያ ገሾ ኣሳታ ኣሃይ ማስቃሊያ ቦላ ሳምባታ ጋላስ ፔያና ሜላ ኤንታ ቶሁዋ ሚንሉዲ፣ ማስቃሊያፔ ዋጂሳና ሜላ ኣይሁዴቲ ጲላያሳ ዋሲደሶና።

32 ሃሳ ገሾ፣ ዋታዳሬቲ ቢዲ፣ ዬሱሳራ ካቂቲዳ ናምዑ ኣሳታ ቶሁዋ ሚንሉደሶና።

33 ሺን ዬሱሳኮ ዩዳ ዋዴ ኢ ሃይቂዲያሳ ቤዒዲ፣ ኢያ ቶሁዋ ሚንሉቦኮና።

34 ሺን ዋታዳሬታፔ ኢሶይ ኢያ ሚያ ቶራን ጫዲን ሶሁዋራ ሱሉኔ ሃሉ ጎገሰ።

35 ሃንቲ ኣማናና ሜላ ሃሳ ቤዒዲይሲ ማርካቲስ። ኢያ ማርካቴላይካ ቱማ። ቃሲ ኢ ኦዴይሲ ቱማ ገዴይሳ ኤሬስ።

36 ሄሲ ሃኒዲይ ጌሻ ማፃፋይ፣ «ኢያ ሜቁላታፔ ኢሶይካ ሚቁና» ገዲይሲ ፖሌታና ሜላሳ።

37 ቃሲካ ጌሻ ማፃፋይ ሃራ ቤሳን፣ «ኤንቲ ባንታ ጫዲዲያሳ ቤዒና» ያገሰ።

ዬሱሲ ሞጌቲስ

(ማቶ 27:57-61፤ ማር 15:42-47፤ ሉቃ 23:50-56)

38 ሃሳፌ ጉዬ፣ ኣርማቲያሳ ካታማፔ ዩዳ ዮሴፊ ዬሱሳ ኣሃ ኤካናው ጲላያሳ ዋሲስ። ዮሴፊ ኣይሁዴታስ ያዩዳ ገሾ ቆሳን ዬሱሳ ካሌይሳ።

ጲላያሳ፣ «ኤካ» ያገሰ። ሃሳ ገሾ፣ ዮሴፊ ቢዲ ዬሱሳ ኣሃ ኤኪስ።

19:28 ማዝ 69:21፤ 22:15 19:36 ኬሳ 12:46፤ ታይ 9:12፤ ማዝ 34:20
19:37 ዛካ 12:10፤ ዮ.ቆ 1:7

39 ቃሲ ኒቆዲሞስ፣ ሃይሳፌ ካሴ ዩሱሳኮ ቃማ ዩዳይስ፣ ካርቤኔ ጎዳሬ ኡፋራ ዋላኬቲዳ ሃስታማኔ ኢሲ ኪሎ ገራሜ ገዲያ ሺቶ ኤኪዲ ዮሴፋራ ዩስ።

40 ሄ ናምፀ ኣሳቲ ዩሱሳ ኣሃ ኤኪዲ፣ ኣይሁዳቲ ኣሃ ፃዲያ ማራን፣ ሺቶራ፣ ሞጎ ኣፊላን ፃዲዶሶና።

41 ዩሱሲ ማስቃሊያ ቦላ ካቋቲዳ ቤሳን ዳሮ ኣታኪልቲይ ዴዔስ። ሄ ኣታኪልቲያ ገደን ሹቻፌ ዋጩቲዲ ኦሴቲዳ ቡሮ ኦኒካ ሞጌቲቦና ኦራፋ ዱፎይ ዴዔስ።

42 ሄ ጎንጎሎይ ማታን ዴዔያ ገሹኔ ኣይሁዳቲ ሳምባታስ ገጌቲያ ጋላስ ገዲያ ገሹ ዩሱሳ ኣሃ ያን ሞጊዶሶና።

20

ዩሱሲ ሃይቆፔ ዴንዲስ

(ማቶ 28፡1-8፤ ማር 16፡1-8፤ ሉቃ 24፡1-12)

1 ዋጋ ዋዴ ዋንታ ቡሮ ጌዮና ዴዒሺን፣ ማግደላ ማይራማ፣ ዩሱሲ ሞጌቲዳ ዱፋዋ ባዳ ሹቻይ ሄ ዱፋዋ ዶናፔ ዴንዲዳይሳ ቤዓሱ።

2 ሲሞን ጳዲሮሳኮኔ ዩሱሲ ዶሲያ ሃንኮ ታማሪያኮ ዋፃ ባዳ፣ «ዱፋዋፔ ጎዳ ኤፊዶሶና፤ ኢያ ኣጩን ዋሊዳኮ ኑ ኤሮኮ» ያጋሱ።

3 ሃሳ ገሹ፣ ጳዲሮሲኔ ሃንኮ ታማሪይ ከዩዲ ዱፋዋ ቢዶሶና።

4 ናምዓይካ ኢሲፌ ዋዲዶሶና፣ ሺን ሃንኮ ታማሪይ ጳዲሮሳፔ ኣዲዲ ሲንፋቲዲ ዱፋዋ ጋኪስ።

5 ሄ ታማሪይ ሆኪዲ፣ ሞጎ ኣፊላ ቤዒስ፣ ሺን ዱፋዋን ዋዲቤና።

6 ሲሞን ጳዲሮሲ ኢያ ካሊ ዩዲ፣ ዱፋዋን ዋዲዲ ሞጎ ኣፊላይ ያን ዴዔይሳ ቤዒስ።

7 ቃሲ ዩሱሳ ሁዔን ፃፃቲዳ ኣፊላይ ፃፃቲዳ ሚላ ዲማ ኢሲ ቤሳን ዴዔይሳ ቤዒስ። ሄ ኣፊላይ ዱማ ዴዔሲፔ ኣቲን ሞጎ ኣፊላራ ኢሲፌ ዴና።

8 ሄ ዋዴ ሲንፋቲዲ ዱፋዋ ጋኪዳ ሃንኮ ታማሪይ ጌሊ ቤዒዲ ኣማኒስ።

9 ዩሱሲ ሃይቆፔ ዴንዳናው ቤሴይሳ ኦዲያ ጌሻ ማፃፋ ቃላ ኤንቲ ቡሮ ኣኬኪቦኮና።

10 ሃሳፌ ጉዬ፣ ኢያ ታማሪቲ ባንታ ሶ ሲሚዲ ቢዶሶና።

ዩሱሲ ማግደላ ማይራሚስ በንጉስ
(ማቶ 28:9-10፤ ማር 16:9-11)

11 ሺን ማይራሚ ሄ ዱፋዋ ደናን ኤቃዳ ዩካሼ ሆካዳ ዱፋዋ ጊደ ያለሱ።

12 ቦላ ማዖ ማዒዳ ናሞዑ ኪታንቸቲ ዩሱሳ አሃይ ዘንዒዳሱዋን ኢሶይ ሁዔሶራ ሃንኮይ ቶሆሶራ ኡቲዳሺን በዓሱ።

13 ኤንቲ ኢኮ፣ «ማጨሴቴ፣ አይሰ ዩካይ?» ያጊዲ ኦይቸደሶና።

ኢያ፣ «ኤንቲ ታ ጎዳ ኤፊደሶና፤ ኤንቲ አዉን ዋሊዳኮ ታኒ ኤሪኬ» ያጋሱ።

14 ሂሳ ጊዳፔ ጉዬ፣ ኢያ ጉዬ ሲማ ያሊያ ዋዴ ዩሱሲ ያን ኤቁዳይሳ በዓሱ። ሺን ኢ ዩሱሳ ጊዲዳይሳ ኤራቡኩ።

15 ዩሱሲ ኢኮ፣ «ማጨሴቴ፣ አይሰ ዩካይ? ኦና ኮያይ?» ያጊዲ ኦይቸሰ።

ማይራሚ አታኪልቴ ኦሳንቸዋ ዳኒን፣ «ጎዳው፣ ኔ ኤኪዳባ ጊዲኮ፣ ኢያ አዉን ዋሊዳኮ ታው ኦዳርኪ። ታኒ ኢያ ኤካና» ያጋሱ።

16 ዩሱሲ ኢኮ፣ «ማይራሚ» ያጊሰ።

ኢያ ኢያኮ ሲማዳ፣ ኢብራይሰፄ ደናን «ሬቡኒ» ያጋሱ። ሄሳሰ በርሼላይ «አስታማሪያው» ጉሱ።

17 ዩሱሲ ኢኮ፣ «ታኒ ቡር ታ አዋኮ ቦና ጊሾ ታና ኦይካዳ አሻናው ኮዮፓ። ሺን ታ ኢሻታኮ ባዳ፣ ሩታኒ ታ አዋኮኔ ሂንቲ አዋኮ፣ ታ ያሳኮኔ ሂንቲ ያሳኮ፣ ሲማና ጊሰ» ጋዳ ኤንታው ኦዳ» ያጊሰ።

18 ማግደላ ማይራሚ ጎዳ በዒዳይሳኔ ኢው ሄሳ ኢ ኦዲዲዳይሳ ባዳ ኢያ ታማሪታሰ ኦዳሱ።

ዩሱሲ ባ ታማሪታሰ ቆንጨሰ
(ማቶ 28:16-20፤ ማር 16:14-18፤ ሉቃ 24:36-49)

19 ዋጋ ዋዴ ኦማርሲ፣ ኢያ ታማሪቲ አይሁዳታሰ ያዩዲ ካሪያ ጎርዲዲ ሸቁ ኡቲዳሺን፣ ዩሱሲ ዩዲ፣ ኤንታ ጊደን ኤቁዳ፣ «ሳርይ ሂንቲው ጊደ» ያጊሰ።

20 ሄሳ ጊዲ ሲሚዲ ባ ኩሺያኔ ባ ሚያ ኤንታ በሲሰ። ኢያ ታማሪቲ ጎዳ በዒዳ ዋዴ ዳር ኡፋይቲደሶና።

21 ዩሱሲ ዛሪዲ ኤንታኮ፣ «ሳርይ ሂንቲው ጊደ፤ ታ አዋይ ታና ከቲዳይሳዳ ታኒካ ሂንቲና ከታይሰ» ያጊሰ።

22 ሄሳ ጊዳፔ ጉዬ፣ ኤንታ ቦላ ኡፋ ጊዲ ፑኒሰ። ቃሲ፣ «ጌሻ አያና ኤኪቴ።

23 ሂንቴ አቶ ጊዳ አሳ ናጋራይ አቶ ጌቴታና። ሂንቴ አቶ ጎናይሳታ ናጋራይ አቶ ጌቴቴና» ያገለገሉ።

ዩሱሳኔ ቶማሳ

24 ሺን ታማኔ ናምዑ ታማሬታፔ ኢሶይ፣ ዲዲሞሳ * ጌቴቲያ ቶማሲ፣ ዩሱሲ ዩዳ ዎዴ ኤንታራ ዳና።

25 ሄሳ ጊሾ፣ ሃንኮ ኢያ ታማሬቲ ቶማሳኮ፣ «ኑኒ ጎዳ ቤዒዳ» ያገገደሶና።

ሺን ቶማሲ ኤንታኮ፣ «ሚሲማሬን ኢ ጫዴቲዳ ኢያ ኩሺያን ዳዒያ ቤታ ቤዎናኔ ሄ ቤታ ታ ቢራዴን ቦቾና፣ ቃሲ ታ ኩሺያ ኢያ ሚያን ዩዳ ቤዎና አማኒኬ» ያገለገሉ።

26 ሳሚንታፌ ጉዬ፣ ዩሱሳ ታማሬቲ ቃሲካ ሶን ሺቂዲ ኡቲደሶና፤ ቶማሲካ ኤንታራ ዳዒሰ። ካሬይ ጎርዴቲዲ ዳዒሺን ዩሱሲ ዩዲ፣ ኤንታ ጊደን ኤቂዲ፣ «ሳርይ ሂንቴው ጊደ» ያገለገሉ።

27 ሄሳፌ ጉዬ፣ ዩሱሲ ቶማሳኮ፣ «ታ ኩሺያ ኔ ቢራዴያን ቦቾዳ ቤዓ። ቃሲ ኔ ኩሺያ ታ ሚያን ዩዳዳ ቤዓ፤ ሲዶፓ፣ አማና» ያገለገሉ።

28 ቶማሲ ዛሪዲ፣ «ታ ጎዳው፣ ታ ያሳው» ያገለገሉ።

29 ያቲን ዩሱሲ፣ «ኔኒ ታና ቤዒዳ ጊሾ አማናዳሳ፣ ሺን ታና ቤዎና አማኒዳይሳቲ አንጄቲዳይሳታ» ያገለገሉ።

ሃ ማፃፋ ቆፋ

30 ዩሱሲ ሃ ማፃፋን ፃፌቲቦና ሃራ ዳሮ ማላታታ ባ ታማሬታ ሲንሳን ኦሲሰ።

31 ሺን ዩሱሲ ኢ ኪሪሰቶሳ፣ ያሳ ናዓ ጊዴይሳ ሂንቴ አማናና ማላኔ አማኒዲ ኢያ ሱንሳን ዴዎ ዳማና ማላ ሄሲ ፃፌቲሰ።

21

ዩሱሲ ላፑን ባ ታማሬታሰ ቆንጨሰ

1 ሄሳፌ ጉዬ፣ ዩሱሲ ዲባርዮሳ አባ ማታን ባ ታማሬታሰ ዛሪ ቆንጨሰ። ኢ ኤንታው ሃይሳፌ ካሊዲ ዳዒያ ሃናታን ቆንጨሰ።

2 ሲሞን ጳዒሮሲ፣ ሚንቴ ጌቴቲያ ቶማሲ፣ ቃና ጋሊላፔ ዩዳ ናቲናዔሊ፣ ዛብዲዮሳ ናይቲኔ ዩሱሳ ታማሬታፔ ሃራ ናምዓቲ ኢሲፌ ዳዎሶና።

3 ሲሞን ጳዒሮሲ ኤንታኮ፣ «ታኒ ሞሎ ኦይካናው ባይሰ» ያገለገሉ።

20:23 ማቶ 16:19፤ 18:18 * 20:24 ዲዲሞሳ ጌይሳ ቢርሼላ የሃ 11:16 ያለቲ። 21:3 ሉቃ 5:5

ኤንቲ፡ «ኑካ ኔራ ባና» ያጊዲ፡ ዋጎሉዋ ጊዶ ጌሊዶሶና። ሺን ኤንቲ ሄ ቃማን አይቢ ሞሎካ ኦይኪቦኮና።

4 ዋንታ ጉራ ዓልቄይ ደላና፤ ሲንፎ፡ ዩሱሲ አባ ጋፃን ኤቁስ፡ ሺን ኢያ ታማሬቲ ዩሱሳ ጊዲዲይሳ ኤርቦኮና።

5 ዩሱሲ ኤንታኮ፡ «ታ ላጌቶ፡ ሞሎ ኦይኪቢኮኮቲ?» ያጊሰ። ኤንቲ ዛሪዲ፡ «አይኮካ ኦይኪቦኮ» ያጊደሶና።

6 ኢ ዛሪዲ፡ «ሂንቲ ጊቲያ ዋጎሉዋ፤ ኡሻቻ ባጋራ ዩጌቲ፤ ጉላ ሞሎ ሂንቲ ኦይካና» ያጊሰ። ሄሳ ጊሾ፡ ጊቲያ ኡሻቻ ባጋራ ዩጌደሶና። ሞሎይ ዳሪዳ ጊሾ ጎቹዲ ኬሳናው ጾኔቲደሶና።

7 ዩሱሲ ደሲያ ታማሬይ ጳደርሳኮ፡ «ሃይሲ ጎዳ!» ያጊሰ። ሲሞን ጳደርሲ ኢ ጎዳ ጊዲይሳ ሲዲዳ ዋዴ ካሎ ዳዒያ ጊሾ ባ ማዑዋ ማዒዲ አባ ጊዶ ጉፒ ጌሊሰ።

8 ሺን ዋጎሉዋን አቲዳ ሃንኮ ታማሬቲ ሞሎይ ኩሚዳ ጊቲያ ጎቹዲ፡ አባፌ ጋፃ ኬዩደሶና። ኤንቲ አባፌ ናሞዑ ጻቱ ዋቋ ሜላ ሃኮሶና።

9 ኤንቲ አባፌ ጋፃ ኬዩዳ ዋዴ ዓፋ ቦንቆን ሞሎይ ዳዒይሳኔ ኡይሲ ቤዒደሶና።

10 ዩሱሲ ኤንታኮ፡ «ሃዒ ሂንቲ ኦይኪዳ ሞሉዋ፤ ጉላራ ሃሚቲ» ያጊሰ።

11 ሲሞን ጳደርሲ ዋጎሉዋን ጌሊዲ፡ ጻታኔ ኢሻታማኔ ሄቸ ዋጋ ሞሎቲ ኩሚዳ ጊቲያ ጎቹዲ አባፌ ጋፃ ኬሲሰ። ሞሎይ ሄሳ ሜላ ዳር ጊዲን ጊቲይ ዳኬቲቤና።

12 ዩሱሲ ኤንታኮ፡ «ሃ ዩዲ ሚቲ» ያጊሰ። ኢ ጎዳ ጊዲይሳ ኤንቲ ኤሪዳ ጊሾ ኢያ ታማሬታ፤ ኢሶይካ፡ «ኔኒ ኦኔ?» ጊዲ ኢያ ኦይቻናው ሚኒዳይ ባዋ።

13 ዩሱሲ ዩዲ፡ ኡይሳ ኤኪዲ ኤንታው ኢሚሰ፤ ሞሉዋካ ሄሳዳ ኢሚሰ።

14 ዩሱሲ ሃይቆ፤ ዳንዲዲ ባ ታማሬታሰ ቆንጨሺን ሃይሲ ሄቸንሉ።

ዩሱሳኔ ጳደርሳ

15 ኤንቲ ሚዳ፤ ጉዩ፡ ዩሱሲ ሲሞን ጳደርሳኮ፡ «ዮና * ናዒው ሲሞና፡ ታና ሃይሳታ፤ ኦላዳ ደሳይ?» ያጊሰ።

ሲሞን ጳደርሲ፡ «ኤ ጎዳው፡ ታኒ ኔና ደሴይሳ ኔ ኤራሳ» ያጊሰ።

ዩሱሲ ኢያኮ፡ «ታ ደርሳ ማራታ ሄማ» ያጊሰ።

21:6 ሉቃ 5:6 * 21:15 ዮና፡ ጌሪኬ ደናን ዮና ጊያ ሱንላይ ጥሃሊሳ ጊያ ሱንላሰ ሳጳሉ ሱንሉ።

16 ዬሱሲ ቃሲካ፣ «ዮና ናዓው ሲሞና፣ ታና ደሳይ?» ያገለገለ። ሲሞን ጳጳሮሲ፣ «ኤ ጎዳው፣ ታኒ ኔና ደሴይሳ ኔ ኤራሳ» ያገለገለ።

ዬሱሲ፣ «ታ ደርሳታ ሄማ» ያገለገለ።

17 ዬሱሲ ሄማንሉ፣ «ዮና ናዓው ሲሞና፣ ታና ደሳይ?» ያገለገለ። ዬሱሲ ሄማንሉ ሲሞን ጳጳሮሳኮ፣ «ታና ደሳይ?» ያገለገለ። ኦይቲዳ ገሾ ጳጳሮሲ አዛኒዲ፣ «ጎዳው፣ ኔኒ ኡባባ ኤራሳ፤ ታኒ ኔና ደሴይሳ ኔ ኤራሳ» ያገለገለ።

ዬሱሲ፣ «ታ ደርሳታ ሄማ።

18 ታኒ ኔው ቱማ ኦዳይሰ፤ ኔኒ ናዓቲሳን ዳዒያ ዋዴ ኔርካ ዳንጩታዳ፣ ኔ ኮዬዳ ሶ ባሳ። ሺን ኔ ጩሚዳ ዋዴ ኔ ኩሺያ ሚጫ ቤሳና። ሃሪ ዳንጩሳና፤ ኔ ደሶና ሶ ኤፋና» ያገለገለ።

19 ዬሱሲ ሄሳ ጳጳሮሲ አይ ሜላ ሃይቆ ሃይቁዲ፣ ያሳ ቦንቲሳኔኮ ኤሪሳናው ገሰ። ሄሳ ገዳፔ ጉዬ፣ ዬሱሲ ጳጳሮሳኮ፣ «ታና ካላ» ያገለገለ።

ዬሱሳኔ ሃንኮ ታማሪያ

20 ጳጳሮሲ ጉዬ ሲሚዲ፣ ዬሱሲ ደሲያ ታማሪይ ባፔ ጉዬራ ዬይሳ ቤዒሰ። ሄ ታማሪይ፣ ካሆ ሚያሶን ዬሱሳኮ ሸቁዲ፣ «ጎዳው፣ ኔና አሉ ኢማናይ ኦኔ?» ገዳይሳ።

21 ጳጳሮሲ ሄ ታማሪያ ቤዒዲ፣ «ጎዳው፣ ሃ አዳይ ቃሲ ዋናኔ?» ያገለገለ። ዬሱሳ ኦይቲሰ።

22 ዬሱሲ ኢያኮ፣ «ታኒ ያና ጋካናው ኢ ዳና ሜላ ታኒ ኮይኮ፣ ሄሲ ኔና አይ ሜቲዴ? ኔኒ ታና ካላ» ያገለገለ።

23 ሄሳ ገሾ፣ ሄ ታማሪይ ሃይቁና ገያ ኦዳይ አሻታ ኡባ ጋኪሰ። ሺን ዬሱሲ፣ «ታኒ ያና ጋካናው፣ ኢ ዳና ሜላ ታኒ ኮይኮ ኔና አይ ሜቲዴ?» ያገለገለ። «ሃይቁና» ገቤና።

24 ሃ ኦዳባ ማርካቲዳይኔ ሃይሳ ፃፊዳይ ሄ ታማሪያ። ኢያ ማርካቲላይ ቱማ ገዳይሳ ኔኒ ኤሮሰ።

25 ዬሱሲ ኦሉዳ ሃራ ዳርባይ ዴዔሰ። ታ ቆፒን፣ ኡባባይ ሁዔን ሁዔን ፃፊቲዳኮ፣ ፃፊቲያ ማፃፋታሰ ኩሜላ አላሜይ ዋሳንው ገዳናባ ዳኔና።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5